

**NATIONAL ASSEMBLY OF
SEYCHELLES**

Wednesday 14th June, 2023

The Assembly met at 0901am

National Anthem

Moment of Reflection

Mr Speaker in the Chair

MR SPEAKER

Bonzour tou Manm Onorab. Bonzour nou bann zofisye dan Lasanble. Bonzour nou manm piblik ki pe swiv nou. Byenveni pour nou travay ozordi. Nou travay i pour lo Mosyon e parey mon'n anonse yer mon pour donn laparol Onorab Larue pour anmenn son Mosyon ki nou bezwen pran avan lezot biznes.

Me mon oule Lasanble i remarke, ki mon osi determinen pour nou pran bann Mosyon lo *TRNUC* ozordi. Alor mon bezwen met limit letan lo sa ki nou kapab donner pour sak Mosyon.

Pour Mosyon Onorab Larue mon pour termin li dan sa peryod la. Savedir avan 10er edmi. E mon pour demann bann Manm ki entervenir, pour limit zot pour 10minit e mon

pour fer en determinasyon lo *closure of debate* letan mon santi ki nou bezwen terminen. Avek sa mon a donn laparol Onorab Larue pour li anmenn son Mosyon.

HON AUDREY VIDOT

(Off-Mic)

MR SPEAKER

Onorab Vidot si ou annan en *point of order* ou ti'n devret dir mwan avan. Mon a fer en leksepsyon pour sa voyaz Onorab Larue, aköz nou lo en size ki difisil - Onorab Vidot savedir, si ou dir mwan i fek arive la les mon a ekout ou.

HON AUDREY VIDOT

Mr Speaker bonzour, bonzour tou Manm Onorab e tou dimoun ki a lekout. Mr Speaker ou'n dir yer poudir Onorab Larue pour annan en Mosyon ozordi. Me ziska ozordi la bomaten la, nou pa'n resevwar okenn *Revised Order Paper* ki detaye *wording* espesyalman, ki mannyer sa Mosyon pour ganny *take*. Eski sa i en nouvo pratik ki Lasanble pe pran a leksepsyon?

MR SPEAKER

Non. Mersi mon a reponn ou. Onorab Vidot anba *Order 44(5)*, ler en Manm in lev en *matter of*

privilege, i annan drwa anmenn sa Mosyon imedyatman *preceding other business*. Savedir i pa nesesite, i pa nesesite pour rearanz *Order Paper*. Mon'n anonse yer poudir sa Mosyon pour vini ozordi.

(Interruption off-mic)

MR SPEAKER

Onorab - Onorab Pillay ek Onorab Loze mon pa pour - mon pa – mon pa pour aksepte ki zot met retar Biznes Lasanble.

(Interruption off-mic)

MR SPEAKER

Ale. *Point of order* Onorab, Onorab Pillay.

HON SEBASTIEN PILLAY

Mersi Mr Speaker. Mr Speaker be ou pe - ou pe vyol *Standing Orders* Lasanble. *Standing Order* Lasanble dir ou koumsa, “*notice*” ki pa bezwen donner lo en Mosyon koumsa. Me an sa ki konsern “Mosyon”, i dir ou tou Mosyon i bezwen ganny ekrir dan en fason ki pour *convey* en desizyon Lasanble Nasyonal.

E lefe ki ou'n *allow* li-ou ou'n *allow* li *sufficient notice* yer. E ou ki'n dir ek li pour *move* sa Mosyon e anba *Order 40* par ou ki sipoze dir Onorab Larue

move en Mosyon. I kler, i an nwanr ek blan dan nou *Standing Orders*.

MR SPEAKER

Wi. Egzakteman. Mersi.

HON SEBASTIEN PILLAY

E la ozordi ou vin dir ek nou ozordi bomaten ki i pa bezwen ekrir, non! Nou *Standing Orders* i kler, nou *Standing Orders* i dir ki poudir *content of Motion*, en Mosyon i bezwen ganny ekrir *as to convey* en desizyon Lasanble Nasyonal.

Le sel keksoz ki ti'n devret arive yer Mr Speaker. E lala kot ou - mon santi poudir i annan en keksoz ki pe mars mal kot Lasanble Nasyonal. En *matter of privilege* i bezwen *dealt with* anba *Order 25*, parey i ganny fer anba *Order 25*.

Ou ti obliz mwan, ou ti obliz Onorab Cosgrow, ou ti obliz Onorab Herminie pour *deal* avek nou *matter of privilege* parey *Order 25* i dir. Savedir apre *Question Time*, me avan Mosyon ek *Bills*.

Se pour sa rezon ki *Standing Orders* i dir ki prezan ler sa Manm pour *move* son Mosyon, i ava pran presedans lo lezot biznes. Ou ki'n demann Onorab Larue pour *move* en Mosyon, ou ki'n demann li pa li ki'n dir ou i pe *move* en Mosyon,

apre ki ou'n demann li, ou'n dir pour pran sa Mosyon ozordi avan tou lezot Biznes Lasanble.

Napa problem ou le fer li dan sa fason ki mwan mon krwar i kontrerman *Standing Orders*. Me *content of* en Mosyon, dan nou *Standing Orders* i dir ki bezwen en Mosyon, ki *convey* en desizyon Lasanble Nasyonal i pa kapab vin dir mwan poudir sa i en Mosyon *Without Notice*.

MR SPEAKER

Mersi. Mon'n ekout ou, mon'n konpran ou Onorab.

HON SEBASTIEN PILLAY

You are violating our Standing Orders Mr Speaker.

MR SPEAKER

Mon konpran ou, mon a donn en desizyon lo la. Onorab Georges oule adres sa pwen ou?

HON BERNARD GEORGES

Wi mersi Mr Speaker mon le adres sa pwen annefe pour prouve par *a plus b* ki Onorab Lopoziyon ankor enn fwa, pe anmenn nou Lasanble *astray* e se li ki pe *mislead* Lasanble bomaten.

Kestyon i senp, anba *Order 41*, tou Mosyon i bezwen ganny drafte. I pa dir "*written*" *it says "drafted"* dan en fason ki

i convey en self-contained proposal. Me! Me! Me, sa *Order* li menm li, son premye parol se "*subject to the constitution and these Order*", "*and these orders!* *And these orders!*"

Savedir ki si i annan en lord ki al kont sa, se sa lord ki pran priyorite, e sa lord ki al kont sa se *Order 42(6) each*. "*A Motion relating to a matter of privilege is a Motion which may be moved without notice*, Onorab Vidot! *Without notice* savedir ou pa bezwen *Order Paper!*

HON SEBASTIEN PILLAY

(Off-Mic)

MR SPEAKER

Mersi. Onorab Pillay. Mon pa pour antre dan largiman lo la,

MR SPEAKER

Onorab Loze. *Order!*

(Interruption off-mic)

MR SPEAKER

Order silvouple! Order! Onorab Loze wi?

HON JOHAN LOZE

Mersi Mr Speaker. Mr Speaker mon annan en *point of order* under lord 40 nou *Standing Orders* Lasanble Nasyonal. Mr Speaker lord 40(6) *is very clear*.

It states, “A Member who is the subject of a matter of privilege shall be afforded due process.”

Now the matter of privilege to which I’m the subject was raised yesterday, yesterday, and I raised my hands in accordance with Order 40(6) to be afforded due process and I was ignored. Ou ti vwar mon lanmen leve...

MR SPEAKER

Mersi.

HON JOHAN LOZE

Ou bodyguard ti vwar mon lanmen leve. E la nou nepli lo matter of privilege ki ti’n ganny raised yer. Nou ariv lo staz pour Onorab bouz en Mosyon and I still haven’t been afforded due process on the matter of privilege that was raised yesterday Mr Speaker.

MR SPEAKER

Ok. Mersi.

HON JOHAN LOZE

And I’m putting it to the Chair Mr Speaker that....

MR SPEAKER

Mersi. Mersi Onorab mon’n konpran ou.

HON JOHAN LOZE

Mr Speaker ...

MR SPEAKER

Terminen!

HON JOHAN LOZE

I annan – be Mr Speaker, I’m the subject of...

MR SPEAKER

Terminen silvouple.

HON JOHAN LOZE

...of this process before the Assembly this morning. Mon pa kapab ganny koupe, ganny derape and everyone else pour kapab dir sa ki zot anvi.

Mon pe met devan the Chair, ki'n annan en derapaz of the Standing Orders. You went as far as to afford an unsolicited Motion. Onorab pa ti demann Mosyon li! Ou'n ofer li en Mosyon ki li i pa'n demande, e ou pa'n afford mwan due process ki dan, nou Standing Orders. So ki nou pe fer egzaktaman ozordi bomaten Mr Speaker?

MR SPEAKER

Terminen Onorab. E mon a reponn ou silvouple. Bon mon enterpretasyon Standing Orders e se mwan ki annan lotorite lo lenterpretasyon Standing Orders dan sa sityasyon.

40(4) i dir, *“The Speaker shall then state whether the*

matter may or may not affect the privileges". Mon'n rule ki wi i afekte.

40(5) i dir,

"A Member may then move a Motion" direktteman.

40 (6) i dir, *"A Member who is the subject of a matter of privilege shall be afforded due process."*

Savedir mon enterpretasyon se ki *you are afforded due process* dan sa Mosyon, pa dan - dan sa Mosyon.

(Interruption off-mic)

MR SPEAKER

Non! - Sa i *due process* -

(Interruption off-mic)

MR SPEAKER

Bann Manm i determinen pour met retar sa prose.

(Interruption off-mic)

MR SPEAKER

Mon pe swiv, mon pe swiv *Standing Orders*. Bon! Pour satisfè -

HON AUDREY VIDOT

(Off-Mic)

MR SPEAKER

Onorab Vidot ou kapab aret kriye? Bon pour satisfè zot. Mon a ekout lezot pwen. Mon pour ekout Onorab Pillay e apre Onorab Loze ankor e apre nou a komanse.

HON SEBASTIEN PILLAY

Mersi Mr Speaker. Mr Speaker premye fwa mon vwar sa kalite *blatant disregard* pour Lalwa Lasanble ganny fer par menm sa dimoun ki'n ekri sa *Standing* - ki'n donn lanmen ekri sa *Standing Orders*. Sa ki Onorab Georges in dir ou i pa korek. Tou dimoun i konn byen poudir Lasanble i bezwen pran en desizyon lo en Mosyon apre ki ou'n *raise* en keston.

Ki mannyer en Mosyon i kapab *privy*? I kapab en keksoz ki *privately known* zis par en group Lasanble be selman Lasanble ki pour pran en desizyon lo la? *It's incorrect! It's clear that it is incorrect and it's clear* ki Onorab Georges *is leading you and the Assembly astray. That's the first point.*

The second point. Order 40 is not a sequence. Order 40 pa dir poudir that Member should be afforded due process on the Motion. Non! Order 40 i dir "he should be afforded due process on the matter of privilege".

MR SPEAKER

Non.

HON SEBASTIEN PILLAY

Savedir, ler Onorab Larue ti'n *raise son matter of privilege*, ou ti devret vire demann Onorab Loze ki mannyer ou *respond to* sa ki Onorab Larue i dir? *And then* donn ou *ruling*. Ou'n fer lenterpretasyon Mr Speaker e la poudir avek Lepep Seselwa ki pe arive - ou'n fer lenterpretasyon, akoz zisteman ou konnen i annan de Mosyon *TRNUC*.

E si ou *move* en Mosyon, ki sispann Onorab Loze ozordi bomaten, ki pour arive se ki nou, nou pa pour kapab reste, pour nou debat sa Mosyon *TRNUC*.

MR SPEAKER

Ou pe ...

HON SEBASTIEN PILLAY

Ok mon ava *retract*. Mon a *retract* Mr Speaker. Mon a *retract*. Mon a *retract*.

MR SPEAKER

Mersi. Mersi.

HON SEBASTIEN PILLAY

Mr Speaker eski Onorab Georges i kapab donn mwan respe, mon'n respe li ler in koze?

MR SPEAKER

Mersi Onorab.

HON SEBASTIEN PILLAY

E mon le – mon le ...

MR SPEAKER

Onorab Pillay. Mon'n ekout ou lobzeksyon les mon a reponn. Mwan enterpretasyon *Standing Orders* se ki, sekans ki nou ete, ki sa bann *Order* in ganny mete, i annan relevans, i annan konsekans.

Donk mon pa aksepte ou largiman, e mon krwar poudir nou kapab prosede avek sa Mosyon dapre answit. Arete! Onorab Loze dernyen pwen.

HON JOHAN LOZE

Mersi Mr Speaker. Mr Speaker i annan en rezon ki sa i *worded*, “*A Member who is the subject of a matter of privilege shall be afforded due process*”. Ou *afforded due process, on the matter of privilege itself before the Motion*, ki montre poudir premyerman *the Chair* i – napa *ill will*, napa *ill intent* e sa Manm i ganny *afforded* lespas pour eksplik son lekor *before face* son *accuser*.

E sa i kree en sityasyon; en keksoz i kapab ganny rezourd amikalman, ouswa ganny senpleman *come to an agreement*, avan ki menm nou

ariv lo staz Mosyon e se sa ki en Manm i ganny sans pour li – i ganny *afforded due process*.

Be pa sa ki'n arive dan Lasanble ozordi! Nou pe ensiste ki lo sekans e nou pe kareman *disregard what is written in the Order itself*. E sa pour mwan, eski mon bezwen la prezan *that there is no ill will, and there is no malice? Kan the spirit of what is written within the Standing Orders, is being violated by the Chair itself*. E se sa mon kestyon Mr Speaker.

Ki manner la nou'n ariv lo staz Mosyon, en Mosyon pour ganny bouze kan la i klerman dir ki mon ti'n devret ganny *afforded due process* depi yer swar. *You go even further to violate the process* ou, ou ofer Manm pour li *move an unsolicited Motion*. Napa e en moman yer ki Manm i dir ou li i pe anmenn en Mosyon. Ou, ou dir li anmenn en Mosyon be sa i en zafer aranze *between Speaker ki dir i attend Caucus LDS, avek Caucus LDS en viktimizasyon*.

En Manm minoriter letan i annan size *TRNUC* pe vin devan Lasanble Nasyonal se sa ki zot pe fer. I annan zis 10 nou, zot le fer nou vin 9. Akoz? Ki zot lentansyon? Mersi Mr Speaker.

MR SPEAKER

Mersi. Onorab Lemiel osi i annan *point of order? Ok* les mon a reponn Onorab Loze avan. Mon persyade ki mon'n etidye sa *Standing Orders*, e mon krwar manner mon'n aplik *Standing Orders* i korek, i korek.

Mon'n donn Onorab Larue sa Mosyon akoz anba *Standing Orders* ler mon'n *rule* ki i annan en *matter of privilege* son Mosyon i annan *full* drwa pour li anmenn son Mosyon. Onorab Lemiel. Onorab.

HON SYLVANNE LEMIEL

Mersi Mr Speaker. Bonzour tou dimoun. Mr Speaker, mwan mon ti a konnen premyerman enn, ki *wording* sa Mosyon? Oli son *wording*?

Dezyenmman mon ti a kontan konnen si *Standing Orders*, ler in ariv ler pour pas bann zizman *or* ariv en keksoz sa *Standing Orders* i aplik zis pour *United Seychelles Members*?

(APPLAUSE)

HON SYLVANNE LEMIEL

Mon ti a kontan konnen si letan i annan en *matter of privilege* *or* letan nou annan en keksoz pour demande, nou, nou bezwen vin anler kot ou,

nou bezwen sipli ou, nou napa drwa lev la anndan, si pour lev la anndan i vin en problem.

Mon santi ki tretman, mon'n fatigue dir, tretman i pa *fair!* Tretman i pa *fair* lo tou le de kote, nou, nou en parti minoriter, nou merit ganny proteze par en Speaker. Speaker mon pour dir ozordi definitivman ou pour get ou kote akoz ou *Leader* ou parti, ou pour get zot, ou konpran!

Me selman mon santi ozordi i en *clear* fason, ki sa *Standing Orders* pa pe ganny aplike dan sa ka ki pe deroule la bomaten.

MR SPEAKER

Mersi.

HON SYLVANNE LEMIEL

Mosyon i kapab ganny anmennen, wi me nou le ou vwar *wording* sa Mosyon. Mersi.

MR SPEAKER

Mersi. Mon le eksplik Onorab Lemiel ki Onorab Larue ti vin vwar mwan pour demann permisyon pour anmenn son *matter of privilege*. E mon ti akord li.

Rezon akoz mon ti akord li a lafen lazournen yer, se ki mon pa ti anvì deranz lezot biznes ki ti'n deza aranze, ki laranzman ti'n ganny fer pour bann Minis

la e bann delegasyon. Se pour sa ki mon ti prosede avek kestyon e avek prezantasyon e apre i ti ganny son *matter of privilege*.

Lo son *matter of privilege* – lo son Mosyon mon ensiste ki dapre *Standing Orders* i kapab *move* son Mosyon *Without Notice* imedyatman apre, apre ki in - ki Speaker in *rule* ki son *matter of privilege* i afekte privez Lasanble.

Mersi mon'n ekout ase. Onorab Larue mon apel ou pour prezant ou Mosyon e mon pour donn *due process*, mon pour donn *due process* Onorab Loze pour reponn lo Mosyon.

HON FLORY LARUE

Mr Speaker. Bonzour tou Manm. Bonzour tou dimoun a lekout. Mr Speaker apre ou *ruling* anba *Standing Order* 40(4) mon ti a kontan anba *Standing Order* 40(5) propoz sa Mosyon swivan:-

Sa Lasanble i demande ki Onorab Johan Loze i ganny sispann pour 2 *sittings*, ouswa en semenn pour son aksyon e i ganny demande pou *apologies* avek Lasanble avan rebran son plas. Mersi Mr Speaker.

MR SPEAKER

Mersi. Sa Mosyon a ganny segonde. Onorab Henrie.

HON GERVAIS HENRIE

Mersi Mr Speaker. Bonzour tou dimoun. Mon segonn Mosyon table par Onorab Larue. Mersi.

MR SPEAKER

Mersi. Mon pour demann Onorab Larue pour anmenn son Mosyon - pour koz lo son Mosyon e Onorab Loze i a ganny laparol zis apre. Onorab Larue?

HON FLORY LARUE

Mersi Mr Speaker. Mr Speaker lespri deryer sa Mosyon, i premyerman pou pa kontrol en Manm Lasanble Nasyonal. En Manm Lasanble i lib pou annan son lopinyon personnel e son lavi prive.

Me par kont Mr Speaker koman Manm Parlman, nou osi annan en *code conduct* ki ganny trouve dan nou *Standing Orders* anba *Schedule 1, Code of conduct of Members*, ki donn nou en gidans lo nou fason fer an zeneral.

Dan seksyon 3 i koz lo *Public Duty* e dan sou-seksyon 3 i dir nou, e mon lir:-

“In the discharge of their duties, Members shall comply with the provisions of the Public Officers Ethics Act”. Dan sa *Act* dan seksyon lenterpretasyon, i dir nou ki en *Public Officer* i osi en Manm Lasanble Nasyonal.

Sa i kler Mr Speaker. E i kontinyen dan seksyon 5, e tit sa seksyon i *Professionalism*. I dir nou dan sou-seksyon (a) ek (b) *“A public officer”, ki la i osi apply pour en Manm Parlman, dan “a” , “shall carry out his duties in a way that maintains public confidence in the integrity of his office;”* *“(b)treat the public and his fellow officers with courtesy and respect”*.

Sa bann definisyon ki mon'n site, i donn nou bann gidans lo nou konportman koman en Manm Lasanble Nasyonal. Avek sa bann sitasyon koman gidans nou vwar ki sa aksyon ki'n fer ki annan sa Mosyon devan nou bomaten, i sot sa bann limitasyon.

Sa i anmenn en gran konsern ki menas lentegrite nou Lasanble Nasyonal, espesyalman pandan sa moman ki nou pe traverse. Dan en moman kot nou pe travay pou anmenn linite dan nou pei, apre ki nou'n travers en peryod avek bokou bouwersman, e la mon pa le *preempt* deba lo sa 2 Mosyon ki pe vin apre. Me nou pa kapab niye ki nou pe pas dan en peryod kot nou pe demann nou popilasyon antye pou fer sa zefor, pour regard

nou konportman, pou pa ensit lezot, sirtou atraver nou langaz.

Nou tou konnen ki medya sosyal i enn bann zouti ki ganny servi pou pas lenformasyon, e se la kot sa konsern i vini. Lo *Facebook* kot en dimoun i annan en *profile* prive ki lo son non, e dan sa ka Johan Loze i annan enn sa tel *profile*, nou tou nou konnen ki i en Manm proporsyonnel pour Parti *US*, isi dan Lasanble.

E sa i fer koman en Manm i ganny sa tit 'Onorab' mete devan son non. Sa i dan koutim nou lenstitisyon e dan koutim bokou lezot Parlman otour lemond. Sa i lafason ki en Manm i ganny adrese. Sa form ladres i osi ganny enterprete ki i reprezant en dimoun ki dan en pozisyon ki merit respe, sirtou dan son rol koman en *Leader* dan kominote.

Alor eski aköz son *profile Facebook* i lo son non e non pa met Onorab o bor, ki ler i tip en mesaz lo *Facebook* ki i pa en Onorab?

Se sa konsern ki nou pe adrese atraver sa post ki sa Manm ki nou pe koz lo la in mete. Mr Speaker mon pa kapab lir sa post dan son totalite, me i kler ki sa Manm i napa zis en diferans politik avek Vis-Prezidan Sesel, me mon napa en lot swa ki enterpret son

fason ekri koman en dimoun ki annan en laenn pour Vis-Prezidan.

E i eksprim sa par met bann terminoloji lo en platform piblik, kot endirekteman i reflekte lo nou lenstitisyon.

Sa ki pli sagrinan i ki dan menm *post* i osi denigre pouvwar e lotorite Speaker, ou lofis, ki mon osi enterpret li koman en laenn anver Speaker e non pa zis en diferans politik.

Eski sa bann fason eksprim nou anver nou koleg menm si zot pa dan menm parti avek nou, eski i akseptab?

La mon le fer referans ankor lo *5(b)* dan *Public Officers Ethics Act*, ki dir nou ki nou koman *public officers* nou bezwen tret nou *fellow officers with courtesy and respect*. Savedir tret zot ek kourtwazi e respe.

Eski dan son post in tret Mr Speaker ek Vis-Prezidan avek kourtwazi ek respe? Menm si nou annan en diferans politik. Eski i otoriz li pour kontinyelman degrad Lofis Mr Speaker e sirtou Vis-Prezidan lo en platform piblik atraver bann langaz vilger?

Mr Speaker koman en Manm Parlman eski sa bann mesaz i pe anmenn divizyon e eski sa pa afekte sa linite ki nou pe rode pour nou Nasyon?

Koman en Manm Parlman napa distenksyon ant en Manm Elekte e en Manm proporsyonnel. I menm o kontrer Mr Speaker en gran privez pou vin en Manm proporsyonnel.

Se ou parti politik ki swazir ou pou vin reprezant li, menm si ou pa'n debout dan okenn eleksyon, zot donn ou sa loner pou vin reprezant zot isi dan Lasanble Nasyonal, pour reprezant sa pousantaz popilasyon ki'n vot pou sa parti. Nou parti i swazir nou pou vin gardyen e reprezantan dezir son siporter e son krwayans.

Eski dan sa ka ki la, Parti US i vwar li akseptab pou annan sa kalite reprezantasyon? Menm isi dan Lasanble nou vwar ki souvan i annan en mank respe pour zofisye Gouvernman ki osi tonm dan sa kategori koleg anba *Public Officers Ethics Act*.

La Mr Speaker mon bezwen profit lokazyon atraver ou Mr Speaker, pou felisit Onorab Lemiel koman *Chief Whip US*, ki a plizyer repriz in montre legzanp lo direksyon ki son *Caucus* i devret pran. Me anven. Menm si i fer son pwen politik, i touzour montre respe dan son pozisyon ki i annan atraver son pozisyon dan Parti US.

A plizyer repriz in bezwen sirmont serten sityasyon ki'n trouv li la lo *floor* e dan sa bann lenstans in donn en legzanp son bann Manm par *rising above* sa sityasyon e adres li dan en fason respektye.

Mr Speaker, ozordi la avan sa Mosyon in ganny prezante, deba in ganny fer. Mon ti a kontan Mr Speaker demann Parti US atraver son *Chief Whip* e son *Leader LOTO*, isi dan Lasanble pour dir nou si zot, zot in pran okenn aksyon kont sa Manm? Akoz Mr Speaker i pa premye fwa ki sa i arive. A plizyer repriz ou'n reprimann li lo sa size. Me eski son parti zot, zot in pran aksyon kont li?

Eski zot *Leader* Mr Herminie in pran en ka avek sa bann sityasyon? Koman en group kolektiv, koman bann Manm Parlman, ki gardyen lanvi nou pep antye, i nou devwar pou montre legzanp, menm si i zis dan langaz ki nou servi anver nou oponan, pour montre nou sitwayen ki nou kapab montre sa respe menm dan nou diferans. Parey nou moto i dir Mr Speaker "Linite dan Diversite".

Malerezman mon santi ki dan sa ka, e mon'n regard plizyer *post* ki in fer lo *Facebook*, dan mon lopinyon sa Manm pa'n zwenn sa bann

responsabilite ki lo nou zepol, e in konpromet konfyans piblik dan nou lenstitisyon.

Nou bezwen realize ki medya sosyal Mr Speaker, i en zouti vreman enportan ki kapab ganny servi pour konekte dimoun, partaz nide e anmenn bann sanzman pozitiv. Me i osi kapab ganny servi pour propaz laenn, ensit vyolans e elarzir sa lekar, parmi nou koman bann Manm Onorab e menm parmi popilasyon.

Eski nou ki trouv nou lo sa platform politik, nou bezwen egzers en restren lo nou parol e nou aksyon lo en platform politik ki reflekte direktman lo nou lenstitisyon?

Ler en Manm Lasanble i senm laenn lo medya sosyal, i pa zis en refleksyon zot karakter, me i osi kapab reflekte lo Lasanble antye, lo tou Manm, lo tou le de kote latab. I anvoy en mesaz kot piblik ki nou aksepte e siport sa kalite konportman, i afekte sa konfyans e respe ki piblik i annan pour nou e i kree en persepsyon ki nou lenstitisyon pa enterese pour promot sa larmoni, me plito nou pe vant plis diskord.

Sa i fer ki i enperatif ki nou konpran ki nou pa zis reprezantan nou parti politik, me pli enportan ankor, nou

reprezantan pep Seselwa. Nou sipoze en model pour piblik lo enteraksyon medya sosyal. E i nou responsabilite pour gard en nivo standar respe dan fason ki nou servi medya sosyal e nou parol.

Mr Speaker, lager eleksyon 2016 in pase, 2020 in pase, nou pe pas dan en lot staz, nou tou koman Manm nou bezwen evolye. E nou bezwen evolye par nou fason fer. Letan nou vin pli matir, nou bezwen annan matirite.

Mr Speaker, nou fek vwar en ansyen Prezidan ki sorti dan Parti US, ki dir e mon site. "Nou bann parol i bezwen al dan sa linite, dan sa rekonsilyasyon ki nou bezwen pe fer. Nou bezwen antre dan en fason ki nou pli sivilize an term fason ki nou fer politik, si i donn okenn konsej son parti, se konsej ki pou vin dan lentere Sesel e ki pei i reste touzour pli gran ki nou tou". Fen sitasyon.

Menm Mr Danny Faure in rekonnet en lot fason fer pour benefisye pei, e koman Manm Parlman, sa i osi enn nou prerogativ. Mon pran sa lokazyon pour demann tou Manm pour veye ki mannyer nou servi medya sosyal. Annou servi sa zouti vreman pwisan pour konstrir bann pon, promouvwar konprenezon,

favoriz e ankouraz linite e pa pou propaz laenn e senm divizyon.

Se nou ki pe donn sa gidans pour sa rekonsilyasyon ki nou le vwar. Annou nou menm vin sa sanzman ki nou le vwar dan nou sosyete, ki nou pe viv ladan ozordi, e kree bann lyen linite. E mon depoz mon Mosyon devan Lasanble pour konsiderasyon. Mersi.

MR SPEAKER

Mersi Onorab. Bon Onorab anba *due process*, Onorab Loze pour annan laparol nenport ler ki le pran laparol pandan sa deba e sifi pour li lev son lanmen e si i le pran laparol la i kapab. Eski i annan okenn lot Manm ki le entervenir? Onorab Henrie.

HON GERVAIS HENRIE

Mersi Mr Speaker.

MR SPEAKER

En enstan. Ou ti...

HON GERVAIS HENRIE

Mon annan laparol Mr Speaker. Mon ava prosede.

MR SPEAKER

Wi. Wi Onorab Pillay ou ti'n devret lev avan mon donn, avan mon donn laparol Onorab Henrie. Mon pour donn li

laparol mon a pran ou *point of order* apre.

HON GERVAIS HENRIE

Mersi Mr Speaker. Bonzour tou dimoun. Mr Speaker, ozordi bomaten mon le reasir mon bann frer ek ser dan Lopozisyon poudir pa krwar i en moman plezir, pour nou lo sa kote latap pour sa prosesis ki pe arive la.

Napa personn la anndan ki parfe koman dir pour vini nou pour pas zizman lo kanmarad. Non. Akoz nou tou nou kapab fer sa bann fot e mwan an premye lye mon pran laparol la bomaten. Le sel Manm ki ti ganny sispann dan sizyenm Lasanble sete mwan.

E mon'n aprann mon leson atraver sa prosesis, mon ti reste dan lakour e apre retournen, *apologies* devan Lasanble. Me sa ki mon ti apresye se ki tou mon bann koleg, ti siport mwan dan sa moman difisil pour pa konmsi pour toler sa ki ti arive, me pour ed mwan grandi e sirmont sa moman dan mon karyer koman en politisyen. E mon remerci zot ankor pour sa.

Mr Speaker sa deba la i vin lavey ki nou selebre 30tyenm laniverser letablisman sa lenstitisyon, enkli nou *Standing Orders*. E i permet nou oubliy Onorab Loze pour sa ki

in fer e moman, me nou tou annan en legzanmen konsyans koman en Manm Lasanble. E sa parey mon pe dir i enkli mwan parske semenn pase zot fek anmenn en *matter of privilege* konsernan en post, deza ki mon ti'n ekrir lo rezo sosyal.

So pour regard nou dabor koman en Manm Lasanble parey Onorab Larue in fer nou rapel. Sa responsabilite ki repoz lo nou zepol, e apre ki mannyer nou anvi nou lenstitisyon i ganny regarde, sirtou par an premye lye nou bann *stakeholders*, par egzantp nou met en kantite lanfaz lo konportman *public servant*.

Be solman mon vwar *public servant* dir zot bann egal letan zot vin la, nou travay an etrwat kolaborasyon avek zot. E alors si nou pe pas zizman lo zot fason fer be nou, nou letan nou pe pas lo zot nou get nou.

E apre ki mannyer nou le gran piblik i vot pour nou, ki swiv nou travay, i regard nou. Donk pour mwan sa ki nou pe fer la bomaten i en legzersis en pe difisil akoz nou pe get nou dan en laglas, en sel kou. E oubliy *who is involve* direkteman, me get nou koman bann endividi e apre nou lenstitisyon.

Koman bann endividi wi nou annan drwa eksprim nou.

Me ki mannyer nou fer? Mannyer nou eksprim nou lekor? Eski nou pa merit fer li avek respe? Eski nou pa merit fer li ek respe? Eski nou pa merit mentenir dinyite nou lofis ki ou en Manm Elekte, ou pa Manm Elekte ou en Manm Lasanble Nasyonal, pwen? Eski nou pa merit fer li pour mentenir dinyite nou lenstitisyon? Se ki dimoun pa ava dir be wi get mannyer sa bann Manm Lasanble i konport zot.

Eski nou pa merit pe fer li dan en fason ki kourtwa? Ki annan disiplin dan sa - dan nou aksyon e nou evite fer bann keksoz ki pour promouvwar laenn, rankin, mank respe pour lotorite? E osi enportan mank respe pour dimoun ki pli aze ki nou. Akoz nou pe donn legzanp non-selman piblik Seselwa, me trez enportan lazenes Seselwa.

Mr Speaker setyenm Lasanble i bezwen pran konsyans nou lenportans. Mwan mon ti ava kontan letan nou fini, ki nou ganny re-apele koman meyer *Caucus* ki'n vini, *the seventh*. Mon pa - mon pa krwar nou pour *achieve* sa.

Mon mentenir poudir probableman sizyenm pour reste dan limazinasyon piblik akoz zisteman nou pa pe sezi, nou pa pe sezi sa irzans sa

moman ki nou pe pas ladan, dan sa transformasyon e peryod tranzisyon koman en pei.

Premye in annan sanzman, Gouvernman atraver bwat vote. Premye fwa US in vwar li dan Lopozisyon, premye fwa nou vwar nou dan Gouvernman, e alor nou ti merit pe preokip nou avek ki manner nou ariv lo bann oter ankor pli o.

E zisteman enn bann oter pli o se ki *Standing Orders*, nou dwatet pe reviz nou *Standing Orders* sa lannen. Kwa ki manner nou kapab anbelir li? Dan lepok ki'n fer, i pa'n *cater* pour en kantite keksoz, ti napa *social media* sa letan - letan sa ti ganny drafte.

E alor nou merit sezi loportinite poudir ki manner nou kapab anbelir, pour nou vin ankor pli - fer ankor pli byen e prezerv sa repitasyon nou lenstitisyon. Ki manner nou evolye nou demokrasi, e pran kont rol Lasanble Nasyonal dan son milye.

E enn bann keksoz ki mon ava partaz avek Lopozisyon, e i pa nouvo pour zot, aköz mon konnen zot ti annan en *Ethics Committee*, en letan zot. Aköz i annan bann Manm ki mon konnen in pas atraver en *panel*

letan in annan bann aksyon disipliner.

E bomaten Onorab Larue in demande. Ki pozisyon zot in pran? Letan zot in vwar en post koumsa ki ti zot reaksyon? Ki zot in fer? Silvouple partaz ek nou dan latransparans, dan laverite, dir nou e nou ava konpran e nou kapab siport zot lo la.

Akoz nou lo sa kote latab i annan Manm, ki'n ganny kriye, pour keksoz ki zot in fer an deor Lasanble kot nou'n dir, nou'n koz avek zot koman bann koleg, koman bann dimoun ki pli vye ki zot, ouswa ki'n annan en pe plis leksperyans lavi pour konsey zot poudir be evite fer sa. Aköz i anmenn tel ou tel konsekans ki pa bon lo ou, ki pa bon lo ou parti, ki pa bon lo ou fanmir, bann keksoz koumsa. Nou'n fer sa nou.

Mon pa pe koz manti avek zot, avek piblik Seselwa ler mon pe dir zot sa. Alor Mr Speaker mon ava termin lo la an dizan ki... Sa ki nou pe fer la, i en pledwari lo nou kote latab, poudir avek Lopozisyon ki nou pa pe pas zizman lo zot pour pini zot, pour viktimiz zot koman en minorite.

Nou pe fer li pour prezerv repitasyon e dinyite sak bann endividi koman Manm e lenstitisyon Lasanble Nasyonal

koman en lenstitisyon o sant nou demokrasi dan Sesel.

E nou anvi anvoy sa koman en *warning* pour tou bann Manm pour nou menm letan nou annan nou drwa eksprim nou isi anndan, e an deor me ki nou fer li tout an rekonesan e an rapelan standar ki nou merit mentenir.

Wi nou pa parfe i komans avek mwan, i annan moman ki nou pour fer fot, nou pour demann leskiz pour sa, nou pour tonbe me selman Onorab Loze krwar mwan poudir nou pe anvoy en lanmen avek ou, poudir ou arete frer.

Akoz nou'n, nou'n koze lo la dan ABC. E koman *Chairman Standing Committees*, mon'n diskrit serten keksoz avek bann Manm. *Leader* Lopozisyon mon'n tann li in riy an foutan Mr Speaker ler mon'n dir sa. Akoz i annan en keksoz ki ti pe antre dan nou Lasanble. *Bullying* i annan en kantite Manm i ganny *bully* la anndan par bann komanter letan nou leve pour al *break*, ki zot dir lo keston *mental health*, lasante mantal bann Manm, serten komanter rasis! In annan dan sa Lasanble mwan mon'n tande. E i pa zoli.

E mon pe dir sa akoz mon pa kontan letan i ariv avek mwan akoz e mon pa anvi fer

avek person. Alor ankor enn fwa mon pe dir i en - nou pe anvoy lanmen avek bann Manm ki kapab deroute parfwa e pour zis dir zot poudir, be nou pe mars ansanm la, dan en semen koman en Manm Lasanble Nasyonal, kot nou tou nou egal, e mon oule, nou oule ki tou dimoun i ganny gete parey dan lizye piblik e nou lenstitisyon son dinyite, i ganny prezerve. Mersi Mr Speaker.

MR SPEAKER

Mersi. Mon a pran *point of order* Onorab Pillay.

HON SEBASTIEN PILLAY

Mon *point of order* i an relasyon avek "*naming and suspension of a Member*". I annan zis en lord Lasanble ki prevwar ki en Manm i ganny *name* e i ganny sispansyon. Zis en lord Lasanble ki prevwar.

Ozordi bomaten, ou'n *allow* en Mosyon ki pe propoz sispansyon en Manm e sa *Standing Orders* i dir ou ler en Mosyon i reprezant en labi sa *Standing Orders*, ou koman Speaker ou sipoze anpes sa Mosyon vin lo latab.

Onorab ti kapab *move* son Mosyon *regarding* son *matter of privilege* kot i santi, apre ki ou'n donn ou *ruling* la ki sa Manm i

ganny *named* e la ki sa Manm i ganny sispann.

Sa ki prosedir ki pe ganny swiv. Ou ou'n konpletman sanz prosedir e bomaten ou'n menm bliye pour les segonder Mosyon, fer son *reply* lo Mosyon, donn son lentervansyon lo Mosyon ou al direk pour donn Onorab Loze son lentervansyon. En lentervansyon lo en Mosyon *is not due process*.

E dan sa konteks sa *Standing Orders* i dir koumsa, “i kapab”, i “*may*” *move* en Mosyon. Ou ou'n fer li “*shall move*” en Mosyon. Me sa ki enportan *he needs to be afforded due process* avan sa Mosyon ki ou pa'n les li ganny *afforded!*

E prezan mon pour demann ou en kestyon. Ler pour ariv ler pour sispann Onorab Loze parey Mosyon pe demande aköz i pour pase. I pour ganny fer lo sa Mosyon ki'n ganny *move* par Onorab Larue, an kontravansyon nou *Standing Orders?*

Mon pa konnen – *I don't know what more* ki mon kapab sey enplor ou, pour sey vwar aköz bomaten la nou'n sey vini, nou'n sey met lefe devan ou. Ou *still* kapab sispann Onorab Loze si ou anvi, si sa i lentansyon Lasanble. Me ou fer li parey *Standing Orders* i demande. La

ki mannyer ou pe fer li, ou pe fer li koman en keksoz aranze, zis pour pini li.

E mon pe get *Standing Orders* devan mwan, i dir mwan ki an se ki konsern *naming and suspension of a Member*, i annan en prosedir pour swiv! Ou pa'n swiv sa prosedir. Ou pe *allow* mazorite, me demen Mr Speaker, demen nenport Manm dan mazorite i kapab *move* en Mosyon be annou sispann Onorab Gill, annou sispann Onorab Cosgrow, aköz ou'n fini kree presedans pour sispann Manm!

MR SPEAKER

Onorab.

HON SEBASTIEN PILLAY

You're not following the Standing Orders. I beseech you...

MR SPEAKER

Onorab.

HON SEBASTIEN PILLAY

Mon enplor ou...

MR SPEAKER

Terminen silvouple.

HON SEBASTIEN PILLAY

Mon enplor ou.

MR SPEAKER

Terminen silvouple.

HON SEBASTIEN PILLAY

Aret sa prosedir ki ou pe fer la. *Go back to the drawing board*, al reget ou prosedir ki ou pe servi akoz i reprezant en labi ou lofis ozordi bomaten Mr Speaker.

MR SPEAKER

Mersi.

HON SEBASTIEN PILLAY

I'm sorry to say it this way.

MR SPEAKER

Mersi Onorab Pillay. Mon ase konfidan ki mon pe swiv *Standing Orders* e mon pe swiv prosedir. Mon a rezerv serten zizman pour anonse ler lemoman in arive. Onorab Georges eski ou pe adres *Standing Order – point of order?*

HON BERNARD GEORGES

Wi Mr Speaker avek ou permisyon mon pa pou al dan kestyon sispansyon, sa i ava ganny *deal* dan deba. Me mon ti a kontan Mr Speaker ankor enn fwa bomaten koriz Onorab *Leader* lopoziyon ki pe *mislead* nou Lasanble, e pe *mislead* Lepep Seselwa.

“Naming of a Member” se pa sel lenstans kot en Manm i kapab ganny... – eskiz mwan ganny sispann dan Lasanble e

la nou pa dan *naming of a Member*. Si Onorab ti lir son *Standing Orders* parey mwan mon'n fer, i ti ava vwar ki *“Naming of a Member”* i vin anba *Order 52*, se ler en Manm i pe fer *gross disorderly conduct* dan Lasanble e si anba 51 Speaker i war ki i napa sifizaman pouvwar, la ki i *named the Member* e apre sa prosedir i swiv.

Nou pa pe fer sa ditou bomaten Mr Speaker. Bomaten i annan en Mosyon, Onorab ti'n kapab ler i pran laparol fer son lentervansyon olye *raise en matter – en point of order*. Mon anvi zis koman sa lot *Leader* dan sa Lasanble gard nou lo *Standing Orders*, parey zot pe koze e non parey nou ti ava swete ki zot pe koze. Mersi.

MR SPEAKER

Mersi.

HON JOHAN LOZE

(Off-Mic)

MR SPEAKER

Onorab Loze ou'n met retar sa deba ase. Ou'n met retar sa deba ase. Si ou annan en pwen klarifikasyon mon donn ou en minit pour fer li, akoz mon bezwen prosede lo sa deba.

HON SEBASTIEN PILLAY

Mr Speaker avek tou respe ki mon annan pour ou, ou ki bezwen *rule* si mon *point of order, is in order*. Pa Onorab Georges. E i bezwen arete fer sa premyerman.

Dezyenmman Mr Speaker, li i kapab *raise* son *point of order*. Dezyenmman Onorab Georges i bezwen dir ou tou laverite, sa *clause* ki mon pe dir ou dan nou *Standing Orders* i dir "*Naming and Suspension of a Member*".

So i le sel *clause*, i le sel *clause* dan nou *Standing Orders*, ou'n donn mwan en minit ou? I le sel *clause* dan nou *Standing Orders* ki *deal* avek *suspension of a member*. Sa ki pe arive ozordi bomaten, mon repete Mr Speaker *is an abuse of the Standing Orders*.

MR SPEAKER

Mersi. Mon pour prosede avek deba. Mon annan plizyer Manm ki'n lev lanmen, mon pour demann zot obzerv 10minit e mon repete, poudir mon lentansyon se pour termin sa deba dan sa peryod. Onorab Uranie ou annan laparol.

HON ROCKY URANIE

Mersi Mr Speaker. Bonzour Mr Speaker, bonzour tou koleg Onorab e tou zabitan Zil Pros e Seselwa ki a lekout bomaten.

Mr Speaker ler mon'n ekout lentervansyon Deputy Speaker Onorab Gervais Henrie, atraver ou, mon pa krwar ki i senser dan sa in-dir. Mon pa pe dir sa akoz mon negativ.

Me pandan sa pti moman letan ki mon la dan 2an edmi mon'n aprann konn zot e pa dan bokou letan *in the near future*, zot vre kouler pour reaparet ankor akoz labitid i segonn natir.

Mr Speaker napa personn ki parfe, parey Deputy Speaker in dir, mon dakor ek li mon menm mon parfwa fer bann serten desizyon ki apre ler mwan mon legzanmen konsyans, mon realize ki mon ti kapab fer swete keksoz dan en lot fason ki ti kapab anmenn pli meyer rezilta.

Me pli mon akimil leksperyans, mon vin pli matir sirtou dan politik e mon vwar mon pe fer progre baze lo kritik ki mon gannyen. An dizan sa Mr Speaker, Onorab Loze i enn bann Manm dan sa Lasanble, ki ler i koze i koz sa ki i vwar e ki sa ki i santi, e i tre fran e parfwa menm son fransiz i fer bokou ki debout devan li bes latet, oubyen frenm lizye.

Mon pa pe vin fer leskiz, oubyen rod leskiz pour li. Me koman enn son koleg ki'n fer plizyer konversasyon avek li,

mon'n aprann konn li e osi son fanmir. E mon vwar ki i en zonn ki serye; en papa ki serye e en politisyen ki serye. I sa enn politisyen ki fer zot laba dan *LDS* trakase, e zot pe rod tou sort fason pour zot kapab pini li e anpes li koze.

Mon konnen zot pa pour dakor ler zot tann mwan dir sa. Me taler zot a ganny sans koze. Annefe Mr Speaker i pa zis Onorab Loze zot anvi anpes koze, zot le fer fason ki nou tou isi lo sa kote latab, nou reste trankil, nou pa kestyonnen sirtou parey ler bann Minis i vini, nou ganny anpese pour kestyonnen, pour anmenn laklerte, pour sa pep, pour nou ganny laverite.

Zot anpes nou bann kestyon pase, kot ler nou, nou pe santi ki annan laverite ki zot pe fer lekonomi avek nou pe sey rode, zot fer tou fason pour zot, pour zot anpes nou bann kestyon pase. E ou Mr Speaker ou enn ki fer sa a plizyer reprimand, ki anpes nou demann nou kestyon.

Mr Speaker mon pa pe mank respe pour ou, me i sa ki mon santi. Ou latansyon i plis lo nou kote latab pour vey sak pli pli keksoz ki nou fer, oubyen ki nou dir, oubyen ki kapab anbaras Gouvernman, e pour tenny nou *micro*.

Zis yer menm Minis Fonseka ti fer en latak direk lo Onorab Wilbert Herminie, ou ti les li, me ou ti tenny *micro* Onorab Herminie ler i ti pe sey fer son devwar ki i sipoze.

Lot fwa *LOTO* ti ganny sanksyonnen, ti ganny *named* akoz i ti pe sey defann son drwa. Ankor yer menm ler mon ti ganny laparol Mr Speaker, mon ti pe felisit nou de gro tim futbol, La Passe ek Anse Reunion lo mon non-personnel e osi lo non Prezidan Parti *United Seychelles* Dr Patrick Herminie. Ou ti enteronp mwan, kan ti napa nanryen mal pour mwan fer sa, avan mon demann mon kestyon. Akoz plizyer Manm lot kote latab i fer sa bann keksoz.

Mr Speaker parey mon dir, mon pa pe atak, ou oubyen mank respe pour ou, i pa dan mon natir, i pa dan mon natir aneife i pa dan natir Digwa fer sa ditou, akoz nou, nou byen ganny elve.

E mwan mon'n toultan en dimoun, ki dimoun La Digue in annan bokou respe pour mwan akoz mon toultan montre respe pour dimoun. Me mannyer ou tret nou, ou tret nou dan en fason, pli enferyer ki ou tret *Caucus LDS*.

E sa i mon santiman e mon krwar sa i arive akoz ki ou

Prezidan Parti LDS e ou osi *attend* zot *Caucus meeting*, e alor ou pa pe kapab - ou a koriz mwan Mr Speaker - ou pa pe kapab vin enparsyel ler ou asiz dan sa sez koman, koman Speaker. Ou seye me i pli for ki ou. Yer mon'n ankor - yer menm ankor ou'n dir ek Onorab Loze, ou pa konnen ki ou pou fer avek li akoz en *statement* politik ki i ti dir lo Minis Ferrari akoz i ti form parti koudeta.

Vi ki yer ou ti dir ki ou pa konnen ki ou pour fer ek li, pour mwan i apartir la, ki en keksoz ki mon santi ou a krwar in ganny aranze. Ki la Onorab Larue li in lev en *matter of privilege*, e sete ou ki'n ofer li lo en plato dore pour dir li anmenn en Mosyon.

E mon pa krwar i ti lentansyon Onorab Larue anmenn en Mosyon si pa ti ou Mr Speaker ki ti ofer li sa *in the first place*. Mr Speaker Onorab Loze i santi e mwan osi mon santi, nou tou lo sa kote latab nou santi, ki, ki mannyer nou ep ganny anpes koze, i fors, i fors nou, mon pa pe dir i byen pour sa ki pli, ardyese koman en Seselwa.

Akoz Onorab Loze pa zis en Onorab, en Manm Lasanble, i osi en Seselwa, i annan son lopinyon pour li dir sa ki i santi atraver medya sosyal, atraver

Facebook. E i ti met son serten komanter, in servi bann langaz ki en pe kolore parey nou dir, me mon pa kapab antre dan lespri Onorab Loze pour mwan dir li ki langaz egzaktaman i pour servi.

MR SPEAKER

Terminen silvouple Onorab. 10 minit.

HON ROCKY URANIE

Me son komanter ti depi le 2, depi le 2 Zen. So pour mwan ler mon vwar, en keksoz ki'n pas depi le 2 Zen prezan ki ou al rode yer, pour ou vin avek pour dir ou *privilege* in ganny afekte. Pour mwan mon krwar sa ti en keksoz ki in ganny, in ganny *orchestrated* konmsi pour vin - rod en fason pour nou pini li, pour nou kapab tir li.

Mon konnen zot an mazorite, nou pa pour kapab anpes zot, zot an gran nonm pour vot kont nou. Me nou, nou pou rod fason pour nou toultan dir laverite. Zot anvi pini Onorab Loze pour li pa la dan sa Lasanble, e mon kapab dir ki zot anvi anpes li vin koz lo sa de lezot Mosyon ki pe vini, akoz son kontribisyon pour vreman enportan...

MR SPEAKER

Terminen silvouple Onorab.

HON ROCKY URANIE

Zot pa anvi tann li dir serten keksoz. So Mr Speaker avek tou respe ki mon annan pour ou, tou respe ki mon annan pour tou koleg Onorab, atraver Lasanble e Seselwa. Mon swete ki nou fer en desizyon ki *fair* anver Onorab Loze e osi pour vin pli *fair* anver *Caucus United Seychelles*, vi ki nou an minorite. Mersi.

MR SPEAKER

Mersi. Bon mon pour eksplik mon lentansyon kler. Parey mon'n dir mon annan lentansyon termin sa deba dan sa peryod, mon pour permet *Order, Standing Orders 24 bracket (1)* i dir, "*Closure of Debate*", Speaker i annan drwa *move* pour *close debate*. Me i dir, "*provided* ki Speaker i decide ki sa pa en *abuse of Standing Orders or an infringement of the rights of the minority*".

Alor mon sey fer otan posib pour rekonnet drwa minorite. Me mon pe note Onorab Uranie in fer en *speech* ki annan zis dernyen minit ki'n adres ka ki devan nou, donk mon santi poudir i annan en mannev pour zis fer letan pase.

So mon pour prosede avek lentansyon ki mon'n annan.

Mon pour donn laparol Onorab Vidot.

HON AUDREY VIDOT

Mersi Mr Speaker. Bonzour ankor enn fwa tou dimoun ki pe ekoute. Mr Speaker apard ki en Manm Lasanble, koman en madanm, koman en manman, i pa akseptab byensir pour ou promot e ankouraz okenn parol vilger ganny servi kont okenn personn.

E mon kapab asir pep Seselwa ki pe swiv nou e menm bann siporter *United Seychelles* nou pa aprouve, poudir nou pour siport Onorab Loze dir parol vilger lo medya sosyal, akoz nou tou nou bezwen portre en responsabilite, sa i kler.

Me nou konnen tou dimoun i imen, e tou imen i kapab fer serten fot. Onorab Loze in plizyer repriz parey mwan mon'n fer al lo medya sosyal, pour nou eksprim ki swa en lopinyon ki piblik i met a nou latansyon, ki swa nou lopinyon personnel, akoz i nou drwa pour annan nou laliberte lekspresyon pour nou eksprim nou lekor. E parey tou lezot dimoun, i annan dimoun ki menm al an ekse e zot servi serten komanter ki ofans en lot.

Mr Speaker sa size ki nou pe koz lo la ozordi, pour nou *named* en Manm, i bezwen aplik

pour tou dimoun pa zis pour serten. Ou konnen lafason parfwa nou *Standing Order* ki nou lo sa kote latab nou dir i annan en labi, espesyalman lo sa size ozordi la, se zisteman aköz nou lo sa kote latab ler a plizyer repriz nou swiv sa lord *Standing Orders*, nou pa ganny sans, e nou ganny oprese pour nou kapab koze dan sa Lasanble!

E mon pa pe rod leskiz pour Onorab Loze mwan. Me selman ler en dimoun i ganny oprese pour li koze la, kote i pour koze? Ler i al an piblik i santi li pli lib ankor pour li kapab koze aköz napa personn ki vin opres li pour li koze.

Mr Speaker, sa *Standing Orders* ki la devan nou, mwan mon le met lo rikord, ki mwan Audrey Onorab Audrey Vidot ne Saunders, mon pa pour vin pran okenn leson avek en dimoun ki li dan sa Lasanble Nasyonal, ki li menm li i pour vin dir ek nou, nou deza annan en pli grander lespri pour mazin pozitiv, pa anv i pini personn, prezerv repitasyon Lasanble Nasyonal, lenstitisyon Nasyonal se li menm li ki pe promot vol keksoz son kanmarad e apre aplik li pour li dan sa Lasanble. E in *get away with it, in get away with it*.

HON FLORY LARUE

Point of order Mr Speaker. *Point of order* Mr Speaker.

(Off-Mic)

HON AUDREY VIDOT

Mr Speaker. Mwan mon pa pe sed laparol, i ava - Onorab Larue si i annan, i annan son *Right of Reply* i ava reponn. Mr Speaker mwan mon'n enn bann viktim "*Wavel 2025*" kot mon osi, mon'n ganny zoure, zoure.

MR SPEAKER

Onorab. Onorab...

HON AUDREY VIDOT

Kot mon manman pa'n ganny respekte.

MR SPEAKER

...silvouple.

HON AUDREY VIDOT

Mon pa'n vini pour mwan vin fer okenn, okenn vin latak personnel ek personn mwan! Mon pa'n vin fer latak personnel kont personn mwan! Mr Speaker nou pe koz *Standing Orders* i aplik pour tou dimoun, pour nou Manm ganny sipor lo la. Les mwan met an rikord, aköz ki mwan Audrey Vidot mon fer sir, toultan Mr Speaker ou dir ki nou bezwen

annan levidans, annan nou *facts right*.

28 Mars 2023, Speaker Mancienne i refize pour donn laparol Onorab Pillay, Onorab Wallace Cosgrow e mwan menm pour en *point of order, ok, ki relate to en matter of privilege*.

Nou note ki Onorab Gervais Henrie, atraver ou Mr Speaker, ki ti fer en komanter *off-mic*, Merkrede le 23 Mars - le 22 Mars, dan sesyon Lasanble Nasyonal, ler nou, nou lev - mwan mon lev en *point of order* pour lev sa size, ou ti dir ou pa'n tann nanryen.

I regretab ki a sak fwa ler nou lo sa kote latab nou met en keksoz devan ou Mr Speaker, i paret mwan sa kote la, pa tann, napa son ki ganny tande. Pa - toultan nou ki annan problem, nou, nou'n fer fot nou. Laba lot kote ler zot koze *off-mic* zot fer zot alegasyon, oubyen zot latak pa tann nanryen, sa i enn.

Mr Speaker le 11 Avril, 2023, Onorab Larue, Flory Larue atraver ou avek Onorab Wavel Woodcock, ti fer tapaz dan sesyon Lasanble *nonstop* tou dimoun in tande. Zis anler kote kot ou ki pa'n tande.

Mon dir sa aköz, ler ti ariv la lo kote Onorab Gabriel, pour li demann - i ti lev son lanmen pour demann kestyon lo en *PNQ*

LOTO. Ler i ti lev son lanmen pour demande, pour li ganny laparol, la ou ti tann li! Zis kote la ki ou ti tann li e ou ti met li deor. Ankor i montre ki i annan en pwa de mezir dan sa Lasanble Nasyonal.

Mon not ankor, le 12 Avril 2023, nou ti pe koz lo *Public Service (Amendment)-Bill*, ankor ou ti enteronp Onorab Loze ler i ti pe koze, ou dir li i pe *mislead*. Selman ler lot kote latab ti pe *mislead* Lasanble, pa ti tann nanryen.

Ankor i montre toultan lo sa kote latab la! Espesyalman i annan serten nou Manm i *ok* pour nou ganny met deor nou, i *ok!* Si pa Onorab Pillay, si pa Onorab Loze, si pa Onorab Vidot, i a bezwen Onorab Gabriel.

E mon'n vwar osi byento Onorab Cosgrow tou i dan sa bann tim aköz nou pe obzerv zot tre byen nou. Lafason ki mannyer nou lo Manm lo minorite lo sa kote latab, nou ganny trete dan sa Lasanble! E i pa pour sirprann nou, sa Mosyon ki'n ganny anmennen lo Onorab Loze ozordi, demen pour ganny anmennen ankor kot nou, lo sa kote latab. Espesyalman sa bann Manm ki'n ganny nonmen.

Aköz? Nou, nou pa pour les okenn pase, nou drwa e

responsabilite koman Manm Lasanble pour nou koze dan sa Lasanble, kot nou'n ganny elekte, ki swa par Lepep direk dan nou distrik, ki swa par Lepep Seselwa ki nou parti in met nou la lo baz proporsyonnel pour nou travay, pour nou *voice out*, lavwa pep Seselwa la deor.

E nou pa pour kontinyen reste trankil pour nou ganny oprese, pour nou pa kapab koze dan sa Lasanble.

Mr Speaker sa kalite lapros ki nou pe al ladan, i pa enn ki zoli ditou. A plizyer repriz nou met presyon nou bann Manm lo nou de *Leaders*, akoz limit ki nou bann Manm nou pas ladan atraver lafason ki mannyer nou Manm nou ganny oprese pour nou koze dan sa Lasanble, e i pa akseptab!

MR SPEAKER

Terminen Onorab. 10minit.

HON AUDREY VIDOT

E mwan mon pe demann avek ou Mr Speaker, si nou pour kontiny lo sa kalite laliny, i pa sa ki apel en *modern democracy* ki nou pe glorifye la deor nou Lasanble, i pa akseptab.

Sa ti kapab ganny fer byen, Onorab Pillay avek Onorab Lemiel ti kapab ganny apros-e, ti kapab rod en fason ki mannyer nou apros Onorab

Loze pour adres li, pour ki sa sityasyon pa ganny repet ankor. Me non Lalwa i aplik zis pour serten dan sa Lasanble.

Mon a kit sa pour Lepep Seselwa ziz-e zot menm. Prezidan i a kontinyen zoure, i a en les pase nou, nou Manm nou, nou a pran legzanp lo nou. Mersi.

MR SPEAKER

Mersi. Tou lede Manm ki'n koze in fer plizyer lakizasyon kont mwan direksyon sa Lasanble ki mon rezete. Mon krwar poudir zot in mal enterpret bann sityasyon ki zot in met devan.

Bon Onorab Loze in lev lanmen mon pour donn li laparol e apre mon pour donn laparol le de *Leaders* Lasanble ki'n lev lanmen pour zot *sum up* sityasyon zot largiman lo zot kote.

Onorab Loze, ou annan laparol. Mon'n donn laparol Onorab Loze. Pour fer en pledwari.

HON SEBASTIEN PILLAY

(Off-Mic)

MR SPEAKER

Nou a donn ou loportinite koze apre Onorab. Onorab Loze ou annan laparol.

HON JOHAN LOZE

Mersi Mr Speaker. Mr Speaker sa post ki an kestyon ozordi ti ganny poste lo *Facebook*, le 2 Zen, le 2. Ozordi mon krwar i le 11 sepa le 12, le 14! Manman le 14 Mr Speaker! Mr Speaker ozordi le 14, pour en *post* ki'n ganny poste le 2 Zen. Depi ler sa in ganny poste, ni en fwik! Ni en fwank! Ni en mo person pa'n dir.

Lavey debat *TRNUC* Manm i-lev *matter of privilege* e Speaker ou menm ou bomaten ou'n dir, "mon'n donn sa Mosyon Onorab Larue." Ou kapab al vizit ou *verbatim* Mr Speaker, ou'n prononse *live*, mon'n donn sa Mosyon Onorab Larue. Mon pe prezimen ki ou'n fer sa dan ou kapasite koman Prezidan *LDS*, ou'n konpromiz ou lekor koman Speaker Lasanble Nasyonal ki sipoze azir koman en arbitrer.

Me non! Ou donn Mosyon Onorab Larue lavey ki nou sipoze diskrit Mosyon *TRNUC*, pour degres kote *United Seychelles* e fer nou vin 9, dan pals 10.

Mr Speaker bomaten mon'n tann pozisyon Prezidan Danny Faure in ganny evoke. Be les mwan dir en keksoz, Prezidan Faure in toultan koumsa li. Ler zot ti pe anmenn en kanpanny "Pil lo li" Prezidan Faure ti parey li, napa nanryen

ki'n sanze ozordi avek letan i ti Prezidan. Prezidan in toultan koz dan sa fason li.

Zot ki'n anmenn en kanpanny pile! Pil lo Prezidan Faure! Ozordi, zot le servi li koman zot seval batay? Nou bezwen kler dan sa bann keksoz.

Mr Speaker mon lot pwen ki mon le leve, *bullying* osi in leve bomaten. Mwan pour met en keksoz devan ou Mr Speaker selman mon pour eskiz ou akoz ou pa ti la.

Premye zour, premye zour ki mwan mon ti met mon lipye dan sa Lasanble, sizyenm Lasanble. Zour mon pe fer mon *swearing-in*, ti annan *bullying*, ti annan *bullying* dan sa Lasanble pa vre Onorab Woodcock. Zot ti sey *bully* mwan premye zour ki mon ti vin fer mon *swearing-in* akoz zot ti krwar ki zot kapab mwan!

Zot ti krwar zot ki zot kapab mwan! Me malerezman zot o in konpran poudir zot pa kapab. Zot in konpran. La aprezan! Zot vire, zot zve viktim, zot dir *bullying*. Be si mon tretans, mon tretman depi *day one*, ti'n en lot fason, *day one! Day one!* Mon ti pe fer mon *swearing-in*, *bullying* ti komanse. So annou pa koz lo sa bann keksoz koumsa.

Mr Speaker i annan en *Leader* dan sa Lasanble ki'n deza pronons son lekor e dir avek *Caucus United Seychelles*, konmkwa i rod nou pour li maltret nou. I rod nou pour li maltret nou. Sa se Onorab Bernard Georges *Leader* Biznes Gouvernman, i rod nou, pour li maltret nou!

Zoure, zoure dan Lasanble! Mr Speaker Onorab William in zoure ou ti les li, i ti dir ou i en Kreol! I en Kreol, i koz Kreol! In zoure dan Lasanble.

Onorab Adelaide ti zoure dan Lasanble i ti vire i ti dir avek ou - non mon krwar pa ou ki ti dan Chair e mon demann ou leskiz Mr Speaker, Onorab Henrie ki ti dan Chair ler i ti zoure, "mon zoure aköz i pe *challenge* mwan", mwan mon pe *challenge* li, alors li i zoure dan Lasanble.

Prezidan in zour mon gran ser, ki enn son aktivis dan *meeting* Grand Anse.

MR SPEAKER

Onorab! Onorab lo kondwit, Prezidan si ou pour fer komanter ou bezwen anmenn en Mosyon. Silvouple *pass*.

HON JOHAN LOZE

La nou komans *get to the crux of the matter* prezan Mr Speaker. Ou vwar mwan, mon pa kapab

koze isi anndan mwan, mon pa kapab koze isi anndan mwan.

MR SPEAKER

Ou kapab koze. Me koz dapre mannyer ou sipoze koze dan Lasanble.

HON JOHAN LOZE

Mon a donn ou legzanp Mr Speaker. Mon'n deza ganny demande pour *apologize* aköz en Minis ti koz lalang lo son kalifikasyon. E mwan mon ti pas en komanter sarkastik, mwan mon ti ganny forse *apologize* Minis in koz mansonz devan Lasanble, Minis pa'n ganny nanryen li.

Mr Speaker mon'n deza ganny met deor dan Lasanble aköz mon ti repet ki zot *CEO* ti dir, poudir i annan zis 110 dimoun lo *welfare* Sesel. E ou Mr Speaker ou ti ensiste avek mwan poudir, non in dir 4000 i pa'n dir 110, 110! E mwan ki ganny penalize. Mwan ki ganny penalize pour sa. Pa *CEO*, pa person - Loze.

Loze koman i koze i bezwen vin ek serten pinisyon, serten penitans. Be mon pour eksplik ou Mr Speaker ler en dimoun pa ganny sans koze kot i sipoze annan en privez pour koze, ki i fer? Annou get en lot fason. Ki arive ek sa dimoun li ki konstaman i pe ganny

defann, i ganny anpese? Akoz li menm si i annan privez koze, i annan lezot dimoun ki annan plis privez ankor.

Dimoun i vini i konstaman koz mansonz devan Lasanble Nasyonal. E mwan mon sa Manm ki toultan pour lev sa size mansonz ler i leve devan Lasanble Nasyonal. Ozordi Sesel, nou annan nou en L'Egzekitiv ki *mislead* e koz mansonz avek sa pep!

Be zot pe get komanter ki mon'n mete lo *Facebook*, person pa dir sa komanter i atas avek en *video*, i atas avek en *video*, ki prouve poudir Vis-Prezidan in koz mansonz devan Lasanble Nasyonal.

E i annan plizyer sa bann video lo mon *Facebook* prive e personnel. I annan plizyer sa bann video. Mon toultan sa dimoun ki pour al serse, ki pour rode, ki pour kree sa nwizans politik pour zot, ler zot, zot pe kree en nwizans pour sa pep.

Sa zafer konmkwa ki pei i en kales kase, ti napa larzan pour pey saler, Minis, pov Minis Hassan pa ti konnen, i pa dormi aswar, i pa konnen kot pour ganny saler pour pey travayer, ti en konplet mansonz sa!

Sa Bidze 2020, si ou al get *Revised Budget* ki nou ti pase an Avril 2020, zis pran - ou pa bezwen al fouy dan *budget book*

zis pran *speech* Minis Lalanne mon krwar 10(1) paragaf 10(1) dan son *speech*. Minis Lalanne ti dir kler, kot *budget financing* poudir en laranzman in fini ganny fer avek Labank Santral, kot pour donn en *loan a zero* poursan anba en *force majeure condition*. Ti la! Fason pour pey saler.

E sa mansonz ti ganny koze la dan Lasanble. Be si mon dir ki zot pour dir mwan. *Ah!* Ou pa kapab kestyonnen, ou pa kapab dir. Be prezan ki mwan mon fer mwan? Mon al lo *Facebook*. Mon al lo *Facebook* mon dir. Mon *vent* parey tou Seselwa, tou Kreol i *vent* lo *Facebook!* Mon *vent*. E mon *Facebook* la i pour mwan sa, i prive, i personnel, i lo mon non. I pour mwan, i prive, i pa en radyo anrezistre.

Mwan la mon napa en *Facebook* ofisyel mwan, mon napa en paz *Facebook* Johan Loze *politician*, mon napa en *page* ofisyel, mon napa okenn sa bann mannigans mwan. Lo mon paz *Facebook* sa madanm ki'n fouy lo mon paz *Facebook* in dir in al get plizyer post lo la. Ou'n vwar mon bann pwason griye madanm? Ou'n vwar mon bann zanfan kot mon pe montre zot fer lasoup? Ou'n vwar mon bann zanfan kot pe danse?

Be sa paz *Facebook* la, i pa en zouti kominikasyon ofisyel sa! I en zouti kominikasyon personnel e si mon vini mon *rant, it's a personal rant* Mr Speaker. Mon annan 51an, 51 lannen lo sa later Sesel koman en Seselwa. Mon en Seselwa dabor avan ki mon en Manm Lasanble be ki mannyer mon ganny klasifye akote avek tou larestan Seselwa ki kapab *vent*?

Zot dir nou *public officer* i bezwen *behave* koumsa, be *public officer* pa i asize i zour mon ser dan *meeting* Grand Anse? Mon prop ser in ganny zoure ek *public officer* dan *meeting* piblik Grand Anse. So *public officer* i bezwen annan, be pran legzanp lo zot! Pran legzanp lo zot *public officer in chief*!

Mr Speaker mon'n lev sa kestyon mon *Facebook page* e mon'n al ladan, pour en senp rezon. Mon le al dan *Schedule* akoz Onorab Larue dan son *speech* in koz lo *Schedule Standing Orders* Lasanble Nasyonal. 2) "*Scope of the code*". "*This Code applies to Members in all aspects of their public life. It does not seek to regulate what Members do in their purely private and personal lives*".

Be mwan mon napa en *public Facebook* mwan. Mon napa en *official Facebook*

mwan. Mon paz *Facebook* i mon landrwa kot mon met mon pwason griye! Kot mon met mon bann zanfan! I pa en paz politik li! Si mon koz politik lo mon paz *Facebook* mon fer li koman en sitwayen Sesel, en zanfan sa zil!

E si mon'n al laba pour mwan *vent* mon fristrasyon, e mon'n dir serten keksoz, *then* mon a demann en leskiz. Mon ti'n devret ganny *accorded* sa, depi yer pour mwan demann sa leskiz, si ti fodre demann en leskiz mon ti a fer li depi yer e mon ti'n eksplik zot.

Mon ti a eksplik mon sityasyon, poudir mon tro ganny siprimen isi anndan kot mon sipoze annan laliberte koze! Mon ganny siprimen, mon pa kapab dir a sak fwa ki sa bann dimoun i asiz la devan mwan, i koz mansonz e zot pas zot letan zis koz mansonz.

Zot asiz la devan regilyerman lo en baz kontinyel zot vini zot asize zot koz mansonz, be prezan mwan sak fwa mon sey dir mon ganny siprimen, mon ganny met deor!

Mr Speaker mon kontan ki Onorab Henrie in segonn Mosyon *ce matin*. Mon pour met en keksoz devan ou, ou realize poudir ou pa'n zanmen donn mwan en *ruling* lo *plagiarism*? Ou ti'n *rule* lo *apology* Onorab Henrie. Be mwan koman sa

dimoun ki ti dekouver son ka *plagiarism*, mon ti lev mon lanmen, dan tou sa bann keksoz ki Onorab Larue in dir bomaten, pour prezerv dinyite Lasanble, pour anvoy en lanmen ek Onorab Henrie.

Mon ti lev mon lanmen mon ti demann ou Mr Speaker ki pozisyon Lasanble Nasyonal lo *plagiarism*? Mon ti demann ou sa kestyon mwan. Ou ti dir mwan ou napa sa lenformasyon an se moman ou pa kapab *rule* lo la.

Be mwan koman Johan Loze letan ou'n dir mwan sa, ou'n siprim mwan, mon'n fer sa ki Johan Loze in fer. Mon'n monte mon'n fer en video tou dimoun in konnen. Wi mwan ki ti fer.

MR SPEAKER

Ou kapab terminen Onorab.

HON JOHAN LOZE

Prezan Mr Speaker.

MR SPEAKER

15minit mon'n donn ou.

HON JOHAN LOZE

Mr Speaker mon annan, *I'm to be afforded* en drwa pour reponn.

MR SPEAKER

Wi.

HON JOHAN LOZE

Sa Manm ki'n prezant son Mosyon.

MR SPEAKER

Me mon annan drwa.

HON JOHAN LOZE

Ou pa'n enpoz okenn...

MR SPEAKER

Mon annan drwa *set* letan.

HON JOHAN LOZE

Ou pa'n *set* letan pour Manm ler in, ler in mont lo mon latet li.

MR SPEAKER

Onorab. Ale terminen silvouple.

HON JOHAN LOZE

Mr Speaker mon ti poz ou sa kestyon ou. Ki pozisyon Lasanble Nasyonal lo *plagiarism*? Be vi ki Loze ki ti lev sa, e Loze li son tretman i diferan ek tou lezot Manm dan sa Lasanble. Loze li i bezwen ganny siprimen, i bezwen ganny inyore parey toultan ou inyore mwan, si mon annan en *point of order*, zanmen ou donn mwan laparol, ou *bodyguard* i fatigue son likou a fermal pov pti bet i get mon pe lev lanmen i vire i get ou. Ou get mwan, ou vwar mwan ou inyore mwan. Toultan i

koumsa sa isi anndan, ou'n ignore pour donn mwan en *ruling* lo *plagiarism*.

E Lasanble Nasyonal Sesel ozordi i stil pa ankor kler ki nou pozisyon lo *plagiarism* apre ki *plagiarism* in ganny komet. Ou *ruling* sete pour eskiz lenfraksyon Onorab Henrie akoz sa wi, sa toultan nou bezwen fer sa. Nou bann pti *golden boy* nou bezwen proteze.

Loze li i bezwen ganny pini li. Si ou ti'n kapab met mwan deor e pous mwan pour akoz mon ti'n dekouver sa *act* *plagiarism*, ou ti pou'n fer li be ou *still* dwa mwan en *ruling* lo *plagiarism*.

Akoz koumsa ki sa Lasanble i marse. Koumsa ki i ganny deroule, letan Loze i bezwen ganny pini, i bezwen ganny ignore, i bezwen ganny met deor, menm pour bann mansonz ki bann Minis ek Prezidan i koze devan Lasanble. E se sa ki pe arive ankor ozordi.

Bon *I will be the bigger man*, mon pour demann en leskiz Lasanble Nasyonal e Lepep Seselwa pour sa ki mon'n dir lo mon paz *Facebook*. Akoz mon servi en term vilger, enn mon prezant sa leskiz. Mon pa'n annan okenn gran mank respe pour Speaker Lasanble Nasyonal, akoz mon krwar *basically* sa ki mon'n dir

amounts to Speaker pa mon papa.

E Speaker mon krwar ou konn mon papa tre byen, e ou konn son lafors karakter, e letan ou get mwan e ou ekout mwan koze mon krwar ou konnen kot i sorti sa. So, mon pour demann en leskiz pour sa ki mon'n met lo mon paz *Facebook*. Mon pa pour demann okenn leskiz pour sa video ki atase avek ki montre Vis-Prezidan pe koz mansonz devan Lasanble Nasyonal.

Ofet mon pour al rode e mon pour re-pibliy ankor en bon pe video san okenn parol vilger, kot zot bann zofisye, bann *officers* parey nou'n ganny dir bomaten, i vin koz mansonz devan Lasanble Nasyonal, zot koz mansonz dan *meeting* piblik, e zot koz mansonz avek sa pep!

Sa size L'Egzekitiv koz lalang avek Lepep Seselwa pour vin *à la une* aprezan. Akoz si mon'n met en mo vilger, en mo vilger lo en paz *Facebook*, e mon pour ganny kondannen, Lepep Seselwa pour bezwen sitan pe port atansyon lo kwa ki'n fer Loze sitan fristre. E parey Onorab William ti dir "araze"! E i dir ou i en Kreol ler i ti dir sa mo dan Lasanble.

Kwa ki'n fer Loze sitan araze? Ki i pa kapab dir dan

Lasanble i bezwen al dir lo *Facebook*. Kwa ki'n fer mon fristrasyon sitan *pent-up* ki'n devid lo *Facebook*. Se zot bann mansonz Mr Speaker. Seselwa pe ganny *led* par en L'Egzekitiv, en Gouvernman ki pas son letan koz lalang avek sa pep! *This is the crux of the matter.*

E Loze i enn bann sel dimoun ki pour investir son lekor poudir pep Seselwa be gete sa boug pe koz lalang ek ou, lala sa enn pe koz lalang ek ou. Ou annan ou 24 sez vid laba Mr Speaker, 24 sez vid ou annan, napa enn.

MR SPEAKER

Onorab terminen.

HON JOHAN LOZE

Ki posed kouraz pour koz lo sa - lo drwa sa pep. Napa enn ki posed kouraz, pour defann pansyon sa pep, zot ti reste silans lo goute, Trezyenm Mwan Saler Mr Speaker. Mon krwar mon pour bezwen fer en legzersis dan Bidze, ki'n fek pase pour mwan konte konbyen fwa ou'n koup nou mikro, ou'n anpes nou koze e demann kestyon lo trezyenm mwan saler. Be la ki'n arive aprezan?

Gouvernman pa i bezwen fer *volte face*.

MR SPEAKER

Onorab mersi.

HON JOHAN LOZE

Pa zot bezwen retournen.

MR SPEAKER

Mersi pour ou entervansyon.

HON JOHAN LOZE

Mon ava remersi ou Mr Speaker pour ou pasyans e...

MR SPEAKER

Mersi.

HON JOHAN LOZE

... *indulgence* e mon ava remersi mon bann koleg Manm lo lot kote latab osi ki'n koze. Onorab Henrie *no hard feelings*. E tou bann Manm lot kote latab, mon konnen, mon koz en pe for de fwa.

Mon konnen mon grat zot ler mon koze, be sa Loze sa mazanbik epe! Koumsa i ete li! Loze i koz koumsa, Onorab Georges ou mon konnen ou enn pti pe fay, fay kote alors mon les pase.

MR SPEAKER

Mersi Onorab. Mon pour donn laparol le de *Leader* Lasanble pour soz zot pozisyon.

HON WALLACE COSGROW

(Off-Mic)

MR SPEAKER

Point? Non mon pa pour kapab, mon pa pour kapab prolonz sa deba plis ki sa peryod, akoz nou bezwen, nou bezwen pran biznes, lo Lasanble e mon konnen ou bann *point of order* i lo sa.

Mon annan de *Leaders*; mon pour donn laparol Onorab Georges premye akoz Onorab Larue pour ganny sans *sum up* son Mosyon apre mon a pas lo Onorab Pillay e mon pour *move* anba *Order 24* pour *closure of debate*. Onorab Georges.

HON BERNARD GEORGES

Mersi.

HON WALLACE COSGROW

(Off-Mic)

Ah. Be mon osi mon privelez pour koze....

(Off-Mic)

MR SPEAKER

Onorab! Privelez en Manm koze, privelez en Manm koze i kapab ganny limite par Speaker anba *Standing Orders*. Onorab Georges silvouple.

HON WALLACE COSGROW

Be sanmenm sa problemm ki nou pe gannye ozordi ki ou vwar nou'n ariv koumsa Mr Speaker.

MR SPEAKER

Onorab!

HON WALLACE COSGROW

Akoz nou privelez koze...

MR SPEAKER

Onorab! Onorab Georges ou annan laparol.

HON BERNARD GEORGES

Mersi Mr. Mersi Mr Speaker. Bonzour Mr Speaker. Bonzour tou bann Manm Onorab e tou dimoun ki pe swiv nou dan lakour.

Mr Speaker mon'n demann laparol, ozordi pour koz prensipalman lo zis de pti pwen. Me avan ki mon al lo sa de pwen, mon ti a kontan fer dimoun ki pe ekout nou, dan Lasanble e an deor, rapel ki sa ki nou fek vwar ozordi la, se egzakteman sa ki pe arive Lanmerik ozordi.

Yer Prezidan *Trump* in ganny sarze devan en Lakour *Miami* e olye adres, olye adres lofans avek lekel ki'n ganny sarze, in prefere atak lezot dimoun e esey rod en lekivalans dapre li ant sa ki li in fer ek sa ki lezot in sipoze fer.

Bomaten nou'n vwar egzakteman, menm senaryo dan sa Lasanble. Olye adres sa *post* ki a la baz sa Mosyon

ozordi, tou bann Manm ki'n koze, in kit sa ater e zot al rod tou sord lekivalans dapre zot ki'n anmenn Onorab Loze pour fer sa *post*. E menm Onorab Loze ler in pran laparol in ariv lo sa *post* zis a lafen en lentervansyon ki'n al pour plis ki 15-20 minit.

Mr Speaker mon dir sa pour ki dimoun i konpran tre byen, ki ant sa ki'n arive e sa ki devan nou ozordi, e sa ki bann Manm Lopoziyon atraver zot fristrasyon in met devan nou ozordi, na..pa o..kenn lekivalans!

Sa ki arive dan Lasanble, i ariv dan Lasanble. Sa ki ganny poste avek en langaz ki anmenn sa dimoun ki'n servi sa langaz pour retire, pour *apologize* ozordi, i en lot keksoz e nou devret vwar li dan son konteks.

E mon dir sa Mr Speaker pour adres premye pwen ki mon anvi adrese bomaten. E sa se sa *leadership* ki nou devret donner dan sa Lasanble. E mon vin lo la Mr Speaker, aköz mon krwar i nou responsabilite koman *Leaders*, dan sa Lasanble, toultan pour evite ki sa bann keksoz ki nou pe vwar ozordi i arive.

E pour *square* li regard sa bann defayans lo nou kote e pour adres zot. E avek ou permisyon mon ti a kontan

remind sa Lasanble lo lafason ki de *Leaders* dan sa Lasanble, in azir lo menm sityasyon ler ti arive.

Premye, premye sityasyon se ler Onorab Loze li menm dan sa Lasanble in akiz mwan koman en voler. Tou dimoun i rapel, nou tou nou ti la. Olye entervenir pour demann li *retract* sa parol, son *Leader* in defann li an dizan sa ki i ti pe dir, i ti pe dir *off-mic!*

Se pa koumsa en *Leader* i devret azir. Nou devret *get ahead of the curve*, e anpes sa bann keksoz arive e non-pa sey rod leskiz pour aköz sa bann keksoz arive. Mwan mon'n deside, pran en desizyon vizavi Onorab Loze, ki mon'n pran. Me olye koriz li, son *Leader* in prefere al rod en leskiz pour li.

Ler Onorab Larue in fer menm lakizasyon anver Lopoziyon, mon ti premye pour entervenir pour *retract* sa ki Onorab Larue e pour *apologize* avek Lopoziyon. Se koumsa ki en *Leader* responsab i azir Mr Speaker!

(APPLAUSE)

HON BERNARD GEORGES

Se koumsa ki anpes sa bann kalite *post* ki Onorab Loze in mete ozordi, ki anmenn nou dan sa Mosyon ozordi. E mon

fer en siplikasyon avek Onorab Pillay, pour pa pran sa ki mon pe dir koman en latak personnel anver li, me pour pran li koman parol en dimoun ki'n pli lontan dan sa Lasanble.

En dimoun ki pli vye ki li; en dimoun ki konnen e ki'n pas dan sa bann sirkonstans poudir li i annan en fason azir byen, e i annan en fason azir mal. Inyor sa ki'n arive, e sey rod en lekivalans, oubyen sey al rod en leskiz *is not the way* Mr Speaker.

Annou regard sa lofans ki devan nou ozordi e annou regard li dan tou son sirkonstans. E avek sa bann parol, mon ti a kontan retourn lo sa *post* ki Onorab Loze in mete. Mon pa pour lir li, aköz i en langaz ki mon pa anvi partaze avek person. Me parey li menm li in aksepte bomaten, in fer en referans avek ou Mr Speaker dan sa *post*.

E son referans se pa pour dir ki son papa pa la, alor ou ava vin koriz li dan plas son papa. Se pa sa ki i pe dir. Sa ki i pe dir i annefe i pe *target* ou koman Speaker, poudir ki ou pa pour kapab fer sa ki, sa ki i pe demande.

Se sa, sa ki Onorab Loze pe fer, nou, nou konpran li tre byen Mr Speaker, nou'n abitye avek ler Loze i koze, nou'n

abitye e nou konnen sa ki i pe sey rode. E donk sa i anmenn mwan Mr Speaker lo sa dezyenm pwen ki mon anvi fer ozordi e mon pour fer li dan en fason tre bref. E sa se sa prosedir ki devan nou ozordi.

Onorab *Leader* Lopoziyon in trouve ki i annan en sel fason, pour sispann en Manm dan sa Lasanble e sa se *by naming the Member*. I bliye Mr Speaker ki tanzantan san *name* okenn dimoun, ou sispann en Manm, ou tir li dan Lasanble aköz lafason ki i pe azir oubyen en keksoz ki in fer, oubyen en *apology* ki i pa'n donner.

E sa se toutafe dan ou pouvwar e pouvwar tou bann Speaker. E mon konn sa tre byen Mr Speaker, aköz premye dimoun ki Speaker Herminie in pouse dan Lasanble ler in vin Speaker, sete mwan!~

In sermante 9er bomaten, 2er apre midi in pous Bernard Georges dan Lasanble Nasyonal. E i ti kler aköz i ti pe fer li, i ti pe fer li pour montre ki se li ki ansarz, alor i pour *decapitate* bann Manm *LDS*, *SNP* sa lepok pour fer sir ki nou respekte li. Se sa, se sa *modus operandi* sa Speaker.

Alor mon konn tre byen ler mon dir ki se pa zis atraver en *naming* ki Speaker i annan

pouvwar pour sispann en Manm dan Lasanble. Me les mwan-les mwan donn en lot legzanp a *Leader* Lopozisyon. Akoz parey mon ti dir taler e mon repete, mwan Mr Speaker avan ki mon koze, mon fer sir sa mon pe al dir. Mon pa ouver mon labous koze, apre rode ki pwen ki mon pe al fer.

Mon fer sa ki mon pe al dir e la mon ava kontan ozordi bomaten eksplik avek sa Lasanble Nasyonal akoz sa Mosyon i devan nou, e akoz sa Mosyon *will stand the test of the Assembly*.

Mr Speaker mon'n al dan *National Assembly Privileges Immunities and Powers Act*. E anba seksyon 19 sa *Bill*, sa Lalwa, ki afekte nou, ki afekte nou privez e ki donn nou, nou privez i dir anba 19, "*A person who shows disrespect in speech or manner towards the Speaker*".

Set egzakteman sa ki Onorab Loze in fer dan son *post*. Me menm si, menm si –

(Interruption off-mic)

HON BERNARD GEORGES

E ase grense, arete, ekoute zot a konpran. Menm si, menm si sa i pa rezon pour sa Mosyon, menm si i pa'n fer sa ki mwan mon'n lir in fer anver ou dan

son *post*, seksyon 28 *National Assembly Privileges Immunities and Powers Act* i dir, "*When a member commits any contempt of the Assembly, whether specified under 19 or not*" e menm si nou ekart sa ki'n koz lo ou, e nou dir sa pa en *contempt*, sa ki in fer vizavi Vis-Prezidan antan ki en Manm Lasanble Nasyonal i definitivman en *contempt* sa Lasanble.

E seksyon 28 i dir, ler en Manm i fer sa, "*the Assembly may, by resolution, either direct the Speaker to reprimand such member or suspend the member from the service of the Assembly for such period as it may determine*".

Leader Lopozisyon Onorab Pillay, ekoute e aprann. Mr Speaker se sa. *This is the basis for the Motion and this is the basis akoz ki sa Mosyon i demann ou, i demann ou, direct the Speaker, reprimand the member or suspend the member from the service of the Assembly*.

E nou ti kapab al pli lwen akoz son *proviso*, son *proviso to section 28* i dir, sa sispannyon i kapab ale ziskan lafen sa term. Me non-Mr Speaker, nou bezwen met delo dan nou diven e nou bezwen *tempered justice with mercy*. E se pour sa rezon

ki sa Mosyon i demann en sispansyon zis de zour.

Alor Mr Speaker, pour sa bann rezon mon ti a kontan ki Lasanble i fer en legzanmen konsyans – annou pa- Nou pa la ozordi pour nou dir avek Onorab Loze, malgre sa ki in fer dan lepase i telman mal ki i bezwen ganny pouse dan Lasanble. Non! Mr Speaker.

Parey Onorab Gervais Henrie in dir nou tou nou en Manm en sel fraternite isi dan sa Lasanble. Nou tou nou Manm sa Lasanble. Nou annan nou diferans, me nou tou nou Manm en Lasanble e se nou fran avek nou lekor e si nou *lead by example*, meyer keksoz nou kapab fer, se dir avek Onorab Loze ou'n fer ou fot, ou'n *apologize* bomaten, nou *welcome* sa *apology*, me silvouple aprann pour ki sa keksoz pa ariv ankor. Mersi Mr Speaker.

(APPLAUSE)

MR SPEAKER

Mersi Onorab Georges. Mon a donn laparol Onorab Pillay.

HON SEBASTIEN PILLAY

Mersi Mr Speaker. E mon remerci enterven an avan mwan pour ledikasyon ki'n - leson ki'n ofer mwan, ki'n donn mwan.

Mon toultan apresye aprann dan tou sirkonstans mon karyer e mon lavi akoz sa i ed mwan vin en meyer dimoun. E si oule en meyer imen, en meyer kontribiter dan lavi sosyal, politik e gouvrenans mon pei, e byensir dan lavi mon fanmir.

Mon pour fer en lentervansyon ase bref e mon pour met serten fe, devan Lepep Seselwa, pour ki nou kapab konpran egzaktman kwa ki pe pase ozordi bomaten, e rezondet pour sa ki pe pase dan konteks ki sa ki pe pase.

Tou Mosyon ki ganny met devan Lasanble i ganny mete avek lentansyon demann Lasanble en kestyon, pour ki Lasanble i pran en desizyon lo la. E ou'n evok seksyon 24 Mr Speaker me avek tou respe apre ou menm ou par lefe ki ou'n *curtail* sa deba, ou'n vyol seksyon 24.

Akoz ou pe demann en kestyon lo en Mosyon ki pa'n ganny mete lo en *Order Paper*. En kestyon lo en Mosyon ki pa'n ganny mete lo en *Order Paper*. Menm si i pa'n donn *notice* person pa'n vwar sa Mosyon.

Dezyenman Mr Speaker, an koreksyon enterven an avan mwan ki, parey son labitid i son natir pour sey *lead* Lasanble, akoz mon le krwar finalman se li ki Speaker, e se li ki donn nou

leson lo Lalwa, apre ki'n ganny defet lo son largiman lo *Standing Order* e i vwar poudir ki *clause* ki sispann en Manm i apel "*Naming and Suspension of a Member*", i de keksoz an menm tan i *Naming and Suspension of a Member*, i pa kapab servi i al rod *National Assembly Privileges Immunities Act*.

Sa ki i pa konnen avan i al rode mon ti annan li lo mon *computer* e mon pe lir li depi bomaten. E an lekspektasyon ki pour vin fer son largiman lo seksyon 19, mon'n lir seksyon 19. Seksyon 19 in lir, in ganny ekrir avek en lentansyon pour en dimoun, en dimoun ki mank respe pour Speaker.

Sa Mosyon in sorti *from* privez Onorab Flory Larue in ariv son lentansyon mank respe. Mon le ki Lepep Seselwa, e Seselwa ki pe ekout nou i sezi ki arive ozordi bomaten, e ki manner en dimoun, en *Leader* ki pe dir mwan *act* koman en *Leader* pe vyol konfyans sa Lasanble. Sa i reprezant en vyolasyon konfyans sa Lasanble. Nou'n sorti *from* privez Onorab Larue, e nou'n ariv lo mank respe pour Speaker.

E ki manner mank respe pour Speaker in ganny enterprete, in ganny enterprete

par lentansyon parol. Pa par sa parol ki'n ganny ekrir, me par lentansyon parol. Si Lasanble ti anv *deal* avek Onorab Loze pour son parol ki in ekrir, i ti'n ava vin kler e dir ou'n servi langaz ki Lasanble i konsider vilger, lala pinisyon.

Me *Leader* zafer Gouvernman in montre nou ki pe arive. Zot pe *make it up as you go along*, zot pe fer pinisyon *as you go along*. E i kler sa, annou regard prosedir anba *National Assembly Privileges Immunities Act*. I dir ou seksyon 19. "En dimoun ki *shows disrespect in speech or manner towards the Speaker*". Prezan annou al pli ba '*contempt of the assembly*'. Eski ou'n determinen si Onorab Loze in fer *contempt of the Assembly*? Eski Onorab Loze in ganny demande pour *apologize* e in refize *apologize therefore showing contempt of the Assembly*? Eski Onorab Loze in ganny demande pour sorti dan lasal e pa sorti *therefore showing contempt of the assembly*? Non!

I konn tre byen li ki Onorab Loze pa ankor *show okenn contempt*. Me ankor enn fwa, i pour vin sey anbet nou, e krwar poudir i pour donn mwan en ledikasyon ki fransman Mr Speaker mon pa bezwen *from* li

ozordi bomaten. Akoz ozordi bomaten *I am in the right and his in the wrong*, e parey son koleg *Donald Trump* Lanmerik, li i devret aksepte ki se li ki pe anmenn absirdite legal, pour eksplik en keksoz ki pa korek ki zot pe fer bomaten.

Mwan mon realize ler mon get sa *Standing Order*, ou pa ni ti bezwen *resort to* en Mosyon pour met Onorab Loze lo kosyon, pour sa ki i dir an deor Lasanble. Ou ti annan zis pour ou donn en determinasyon ki en Manm Lasanble ki servi son *public profile* poudir en keksoz lo son *Facebook profile* e i servi langaz obsenn, ou pe konsider sa koman en *ruling* Lasanble as *contempt of the Assembly*.

Ou pa ni ti pour bezwen fer sa Mosyon. Akfer ou'n fer li? Pouwar ti dan ou lanmen. Ou konnen akoz? Akoz *Facebook* pa ganny *regulated* par Lasanble Nasyonal. I pa ganny *regulated* par nou *Standing Order*, alor ou ti annan tou pouwar anba *Standing Order* ki dir ou ler *Standing Order* pa permet adres en keksoz, ou koman Speaker ou an determinasyon, me ou pa'n fer li!

Ou pa'n fer li, e sa ki'n donn ou *advice*, in mal donn nou *advice* e mon plis ki krwar mon pa le *impute improper*

motive se Onorab Georges ki vin donn nou sa *advice*.

MR SPEAKER

Avan mon perdi sa pwen.

HON SEBASTIEN PILLAY

Non les mwan fini koze.

MR SPEAKER

Mon'n deza.

HON SEBASTIEN PILLAY

Be les mwan. Non, non be les mwan fini koze.

MR SPEAKER

Mon'n deza. Mon'n deza fer li...

HON SEBASTIEN PILLAY

Be akoz ou pe enteronp mwan?

(Interruption off-mic)

MR SPEAKER

Mersi-mersi. Kontinyen Onorab.

HON SEBASTIEN PILLAY

Se sa problenm ki nou pe gannyen. Problenm ki nou pe gannyen se ki ou annan drwa ler mwan mon'n fini koze, akoz *this is your right* adres sa ki mon'n dir. Me ou enteronp mwan a tou moman, ou enteronp mwan ler mon pe demann Minis kestyon. Annou pran en legzanp tipik, ou ti

enteronp mwan ler mon ti demann Minis Patricia Francourt kestyon *regarding state of affairs* lo zot deal avek bann ka labi.

Nou tande yer swar lo televizyon. Mon pa bezwen al ladan i en ka *subjudice* prezan. Ou ti enteronp mwan ler mon ti koz lo size trezyenm mwan saler E Mon ti demann Minis Hassan kestyon. Ankor enn fwa Gouvernman i sanz zot, zot *tune*.

Ou ti enteronp mwan ler mon pe fors *VP* pour montre mwan sa *waiver* ki'n fer vini bann loto *left-hand drive* ki bann enportater pa ganny drwa fer vini, ki nou pa ankor vwar sa *waiver* – ou ti enteronp mwan.

Be so aret enteronp nou! E ler ou enteronp nou, mwan mon pa – mon, mon petet mon leksperyans mon *rely* lo mon *micro* Lasanble pour eksplike.

Onorab al lo *Facebook* akoz i ti ganny enteronpe sa zour. Vis-Prezidan *blatantly mislead the Assembly!* Be nou les li *get away* avek e Lopozisyon pa kapab fer son louvraz.

So mon pran konsyans sa ki'n ganny dir se ki nou, nou bezwen fer nou louvraz e pour nou regard sizyenm Lasanble. Dan sizyenm Lasanble Lopozisyon ti annan *free rein*

pour demann nenport ki kestyon. Dan sizyenm Lasanble Dirizan Lopozisyon ti menm zour Speaker Prea sa letan, dan *meeting* lo *Civil Code*, mon ti la Onorab Georges ti la, i konnen i rapel byen. I ti annan drwa li.

Dan sizyenm Lasanble, Onorab Ramkalawan ti annan drwa demann kestyon, e koz lo en kestyon depi bomaten ziska apre midi. Mon pa demann sa mwan! Dan mon ka - (vwala!) Ou tande *off-mic* i ganny dir, “zot mazorite e nou, nou minorite”. So admet ki sa ki ou pe fer bomaten i akoz ou en mazorite e ou en minorite.

E la aprezan permet mwan adres en size pertinan ki'n ganny leve bomaten. *Leadership* ki nou devret pe donner. Mr Speaker mwan mon'n fer li, en latas personnel pour pa reponn serten komanter ki ganny fer dan Lasanble *off-mic*. Ki ou tande ou. Si i annan en Manm ki *cause interruption* pour tou Manm lo sa kote latab, on a *frequent basis*, se Onorab Larue li menm ki'n anmenn sa Mosyon. E ou tande ou. La i dir ankor la. I fer ankor la.

I've got the mic, mon annan privelez pour koze ozordi bomaten, ou'n donn mwan laparol, ou enteronp mwan, li i enteronp mwan, Onorab

Georges i enteronp mwan, i ok. Prezan zot le nou vin, zot dir nou ki kalite Lopozisyon nou vin, nou devret en Lopozisyon ki ekout zot.

Mr Speaker ki mannyer mon kapab ekout Onorab Georges, ler i vin *mislead* Lasanble lo #maths, lo *National Assembly Powers and Privileges of Immunity Act*, i vin servi en Lalwa.

Annou regard bann privilez Lasanble Mr Speaker. E sa i *at the heart of this problem* - i pa dir sa -annou get bann privilez Lasanble ou a eksplik mwan ki privilez Lasanble ki Onorab Loze in vyole.

'The privileges of the Assembly include:-

'Freedom of speech and debate',

'Immunity from legal proceedings',

'Freedom from arrest',

'Exemption from certain services',

'Freedom of speech', garanti anba Konstitisyon, ki en Manm Lasanble i annan drwa koze dan Lasanble e sel keksoz ki aplike se *Standing Order*.

"Immunity from legal proceedings". Ou pa kapab antre dan Lasanble, servi en Manm Lasanble en somonn akoz sa ti deza arive avek

Onorab Andre, dan sizyenm Lasanble e Onorab Georges *and Co* Onorab Andre ti *raise* Mosyon kont sa.

"Freedom from arrest". Ou pa kapab aret en Manm Lasanble lo *precinct* Lasanble *unless* ou Speaker ou donn permisyon.

"Exemption from jury service, which is exemption from duty services".

"Power to exclude stranger". Si Lasanble pa anvi en dimoun vin dan Lasanble i pa donn li permisyon pour li antre.

MR SPEAKER

Ou a kapab konklir Onorab?

HON SEBASTIEN PILLAY

Be mon pe konklir...

MR SPEAKER

Mersi.

HON SEBASTIEN PILLAY

...mon bezwen prouve ek ou, ou'n dir mwan prouv privilez Lasanble ki ganny afekte.

MR SPEAKER

Ok si ou pe konklir, byen.

HON SEBASTIEN PILLAY

"Evidence of proceedings in Assembly",

“Civil process not to be served nor members”.

Mon pa vwar okenn par kote ki koz lo privez ki Onorab Larue in met devan Lasanble. Napa ladan! Ou'n fer en determinasyon lo ki kalite privez ki'n ganny afekte, ou'n servi *the wrong clause of the Standing Order* pour deal ek en problemn.

Ou pa oule admet poudir ou'n servi *the wrong clause* e ou'n servi li, ou'n fer li avek tou respe Mr Speaker, ou'n fer li *with ill intent*, aköz ou'n anvi pini Onorab Loze e montre li en lesen.

But what's even worse, e la mon'n note kot i pli grav ankor, Onorab Georges i bliye, ki dan Mosyon ki Onorab Larue anmennen, zot pe demann 2 sanksyon. Sispann li pour de *sitting*, ouswa en semenn.

You know what that's entail pour sispann li pour 2 *sitting*? Sispann li pour en semenn, i vo pour koup saler Onorab Loze par R7000, R7000. Onorab Henrie ti *gladly and happily* segonn Mosyon pour sispann mwan. Li i *plagiarize*, i ekrir lo mwan, mwan zanmen mon ekrir lo Manm lo *Facebook* mwan. I ok sa!

E ozordi bomaten, nou maliganse e nou krwar nou pe

zis pini en dimoun aköz nou pe met li deor. Si mon pran R7000 saler en dimoun *because that's the Motion*, *that's the question* devan nou. *The Motion should have read*, “ki Lasanble i agree ki in fer, in vyol privez” aköz napa en privez ki egziste dan Lasanble koumsa, dan Lalwa. E la ou fer en determinasyon. Me pa sa ki ou'n fer.

Ou'n fini ziz li, ou'n fini kondann li, e la i reste zis pour ou *fine* li. Sa ki ou pe fer. E mon pe *put* ou on *notice* Mr Speaker, *this is not a threat, but it is my right to do sa*. Ki sa rikord sa *sitting*, nou pour *record* li, nou pour *translate* li, e nou pour *share* li avek *SADC PF*.

Nou pour *share* li avek bann lezot lotorite. E nou pour anmenn ou desizyon devan Lakour e safwasi nou pour *challenge* ou desizyon lo en *judicial review*.

(APPLAUSE)

HON SEBASTIEN PILLAY

Nou pour *challenge*. Aköz se pour sa rezon ki nou pe met en bout sa sesyon, nou pe fer sir nou pe koz an Angle pour ki dimoun i konpran kwa egzaktaman, *what exactly you are doing*. *You are violating the sanctity of the office which hold, sadly Mr Speaker*.

MR SPEAKER

Mersi.

HON SEBASTIEN PILLAY

And in conclusion - an konklizyon, an konklizyon sa ki zot ti pe entansyonnen i arive, kot ler zot pour sanksyonn Onorab Loze nou pour *walkout*, pa pour arive sa! Pa pour arive sa! Pa pour arive sa, *ok?*

(APPLAUSE)

HON SEBASTIEN PILLAY

Sa ki ou ti anv i arive!

(Interruption off-mic)

MR SPEAKER

Order!

HON SEBASTIEN PILLAY

Ki mon pa la pour ekspoz sa demagozi, sa manboulouk ki pe arive otour sa Mosyon *TRNUC*, kot laranzman pe ganny fer antre *Leader* Zafer Gouvernman e *TRNUC*. Pa pour arive sa!

Nou pour la, nou pour koze lo la. E nou pour eksplike akoz ki bomaten, apre ki yer mon'n konplent mon pa ankor ganny sa bann *case*, bomaten ki mon resevwar en *pen drive*, ki donn mwan sa bann *case* kan *Leader* Zafer Gouvernman i

annan sa bann *case* depi de semenn.

Pa Lasanble ki'n donn li, *TRNUC* ki'n donn li...

(APPLAUSE)

HON SEBASTIEN PILLAY

Lala...

MR SPEAKER

Ale.

HON SEBASTIEN PILLAY

I pa kapab *denied!*

MR SPEAKER

Konklir Onorab silvouple.

HON SEBASTIEN PILLAY

Se sa Lepep Seselwa. Se sa ki pe arive. Sa ki pe arive devan nou Lasanble ozordi se en *travesty!* Se en *miscarriage of justice* e sa pe arive dan enn bann lenstans gouvrenans pli o dan nou pei.

E mwan mon kondann sa bann kalite keksoz Mr Speaker e mon enplor ou. Mon anvoy en lanmen avek ou, mwan mon'n deza ganny sispann dan sa Lasanble *for no other reason* ki ou pa ti le mon la pour debat Lalwa lo saler.

(APPLAUSE)

HON SEBASTIEN PILLAY

That is the case. E mon ti ganny dir mon pe willfully obstruct travay Lasanble. How? Mon pa konnen ki manner mon ti pe fer li. Ozordi bomaten mon pres pour mwan al menm ver menm semen.

Mon demann ou sa Mosyon pa pe *carry* en sanksyon ki *proportionate to the offence* ki Onorab in kree, akoz *Standing Order* pa prevwar pour son fonksyon prive, son komanter prive.

Ou pour bezwen donn en *ruling* lo la ki ava mars pour tou Manm Lasanble *from now on*. Napa en *ruling* lo la. Ou pa pour kapab demann nou en kestyon pour vot lo sispann en Manm pour 2 *sitting* oubyen en semenn. So mon enplor ou, *go back to the drawing board* e re-al rode ki manner ou *deal* ek sa sityasyon.

E mon garanti ou, *once* sa i ganny fer personn pa pour lo *Facebook* pour servi okenn langaz ki pa apropiye si ou en Manm Lasanble. Mersi Mr Speaker.

(APPLAUSE)

MR SPEAKER

Mersi. Mon a demann Onorab Larue pour fer repons lo son Mosyon e konklizyon.

HON FLORY LARUE

Mersi Mr Speaker. Mr Speaker mon ti a kontan remerci tou dimoun ki'n anmenn zot kontribisyon anver sa Mosyon. Mr Speaker Onorab ti dir nou, i pour kourt in koz plis ki 20minit, e sa i enn bann pwen ki'n ganny monte dan sa deba menm si sa pa topik sa Mosyon.

Nou'n ganny dir ki bann Manm lo kote *US* i ganny oprese Mr Speaker. Zot ganny oprese, zot pa kapab eksprim zot lekor. Dan sa ka i savedir zot pe, zot pe konteste ou lotorite, akoz letan zot *microphone* i ganny koupe, letan ou demann zot pour konklir zot deba, zot kontinyen fer bann - zot kontinyen avek. Menm si ou tenny *microphone* zot kontinyen koze.

Mr Speaker se ou lotorite ki ganny kestyonnen dan - letan mon pe ekout zot bann deba. Zot dir nou zot ganny oprese letan zot fer tou sa bann aksyon. E nou koman en Lasanble sa ki mwan, mon pe enterprete zot pe dir nou i ki nou bezwen aksepte tou zot kapris, tou zot bann aksyon, pe enport Mr Speaker si i al kont lareg nou *Standing Orders*.

Tou Manm Lasanble Nasyonal i konn son *Standing Orders*. I sipoze konn son *Standing Orders*. E ladan i dir

nou ki ou bann pouvwar e i dir nou ki ou ki kontrol deba e i donn ou bann limitasyon, e i donn nou, nou limitasyon. E se sa osi a labaz sa Mosyon. Sa mank respe pour ou lofis e ou bann direktiv ki ou donner dan sa Lasanble.

Mr Speaker nou ganny dir ki sa lopresyon dan Lasanble i fer ki zot bezwen sorti dan Lasanble Nasyon al ekrir nenport ki kalite *post* lo *Facebook*. Mr Speaker, nou isi dan Parlman, nou annan nou de zour travay ofisyel ki ganny televize.

Me lasemenn travay i Lendi ziskan Vandredi an zeneral 8er ziska 4er. Me nou koman en Manm Parlman, nou travay 7 zour lo 7. Mr Speaker dan Lendi nou koman en *Caucus* nou prepar nou travay, pour Mardi avek Merkrede. Dapre mon konpran *Caucus US* i fer sa dan Zedi. Tou *meeting* ki Lasanble i met devan zot servi, zot dir nou koumsa *sorry* nou pa pour kapab Zedi nou annan travay.

Nou respekte sa! Zis parey nou, nou annan pour nou dan Lendi, i parti zot travay. Sa ki annan en distrik, i vwar piblik, sa ki napa, i trouv en lot lokipasyon, swa lo *Facebook*, swa *Maison Du Peuple*, swa en lot landrwa *whatever* zot, zot

deside fer. Me nou lo nou kote nou annan nou travay ki nou fer. Pandan *weekend* osi nou annan nou travay ki nou fer.

Mr Speaker sa i lezot travay ki nou fer an deor- an deor sa ki ganny televize. Si ou ganny oprese, ou, ou rod en lot fason pour eksprim ou lekor, sel fason pour fer li se servi *Facebook* e denigre Vis-Prezidan e denigre ou Lofis. Mon kapab konpran si sa lopresyon ti fer ki sa ti premye *post* ki ou mete, avek sa kalite tonasyon.

Me nou tou nou konnen ki a plizyer repriz Mr Speaker, nou'n ganny sipliye par *LOTO*; nou'n ganny sipliye par lezot Manm ki ou ekoute, ki ou ti devret met sa devan li, ki ti devret annan loportinite pour li fer lezot keksoz pour adres sa ki in fer. Mr Speaker konbyen fwa! Konbyen fwa, ou'n seye fer sa, ou'n sipliye pour demann lord, pour demande ki i annan serten standar? Pa enterese! Parey nou vwar dan sa *post* e parey Onorab Georges in eksplike.

I menm demann dimoun pour *screenshot* sa post, anvoy pour ou e ou a vin koriz li dan kwa ki i sipoze dir koman en zonm. Mr Speaker nou tou nou konnen ki ou pa papa Onorab Loze kantmenm ou ti konn son papa. Nou tou nou konn sa. Me

ou Speaker Lasanble Nasyonal e li i en Manm Lasanble Nasyonal. E nou pa bliye Mr Speaker, nou ti pran en *oath*, nou ti pran en *oath* koman en Manm.

Nou pa parey en sitwayen normal ki li i annan son *profile Facebook* alor deside ekrir nenport kwa. Nou annan en pozisyon, nou annan en serten *cadre* ki nou anmennen dan lasosyete. Se pour sa ki i annan en *Act* zis pour nou. Nou bann *powers*, nou bann privez ki nou annan. Akoz i en ka diferan. Se sa ki fer ki sa *post* in ariv sa pwen ki nou pe demande, ki sa Mosyon i ganny anmennen.

E la mon bezwen koz lo bann lakizasyon ki'n ganny fer, ki direk lo ou Mr Speaker. Mwan mon ti notifiye ou depi yer bomaten avan sesyon ti komanse, ki mon anvi anmenn en *matter of privilege* Mr Speaker.

Aktyelman mon t i vin dan ou biro 3er edmi Lendi, letan mon ti vin demann ou sekreter e zot kapab al lo - *LOTO* i kapab demande si sa i korek - pour mwan vin vwar ou, me ou ti'n kit lofis ou pa ti *available*, e mon ti kontakte ou Mardi bomaten.

Mr Speaker mon pran lofans ki dir ki mon'n - ou'n

donn mwan sa Mosyon koman *Leader* parti *LDS*. Me mon Mosyon mon ti vin anmenn devan ou Lendi 3er apre midi dan ou biro 3er edmi. Sa i konpletman fo e parey labitid se sa ki ganny eritre dan zot bann parol ki zot dir. I bann lofans, bann lakizasyon, ki pa baze, ki pa fonde, pour zis donn en move lenterpretasyon piblik.

Mr Speaker nou'n ganny dir ki sa dat ki *post* ti ganny mete avek zour ki mwan mon'n anmenn, ki mwan mon'n anmenn Mosyon i montre en gran dekalaz ki fer ki i pa valid e mon annan lezot lentansyon.

Ozordi i le 14, Lendi ti le 12, *weekend* ti komans depi Vandredi pase. Mr Speaker mon pa asize lo *Facebook* get zis post Mr Loze kot i kwi manze ek son zanfan, kot i fer zot danse, kot i ekrir bann *post* akoz i fristre.

Me solman in vin dan mon latansyon, mon'n vwar sa *post* e letan mon'n vwar sa post mon'n anmenn li devan, mon'n eksprimen ki mon annan sa lentansyon pour anmenn sa *matter of privilege*.

Ki bor ki si ti ekrir le 2, e mwan mon'n anmenn li ozordi. Lo kote travay ofisyel mon'n anmenn li ozordi ki i en problem. *Post* pa sanze li! *Post* i reste parey i kapab date le 2, i

kapab date lannen pase, i reste parey. Alor sa dele letan 12 zour i pa donn validite, sa kalite largiman.

Mr Speaker mwan mon'n anmenn mon Mosyon, akoz mon santi ki i tro bokou prezan. Letan en Manm i kontinyelman denigre nou Lasanble Nasyonal. Letan nou kontinyen denigre nou Lasanble Nasyonal e lezot Manm i defann sa, mwan mon krwar ki i ofansif, e i afekte nou privelez.

Mr Speaker *Facebook*, menm si i napa en paz ofisyel ki i mete "*Official page of Honorable Johan Loze lo la*", i en platform piblik ki fer ki si ou bann post i piblik, tou dimoun i kapab vwar ou *post*, e si ou, ou'n met ou post i annan ou bann *friends* e ou *friends* in deside *screenshot* fer li piblik, i reste lo *Facebook*, i reste lo medya sosyal, i ganny sirkile lezot dimoun i vwar.

Si ou pa oule dimoun vwar, ou koz *about it* se ou dan ou salon, ou pa met partou kot en dimoun i kapab vwar. Alor i reste piblik, menm si i pa en paz ofisyel.

Mr Speaker letan, letan nou vwar ki sa Mosyon pe ganny dir ki nou pe anmenn en lopinyon. I pa en lopinyon, en *matter of privilege* i pa en lopinyon, i pa ki nou pe toler,

nou pe les en *personal rant*, prezan nou, nou pe ganny agrese par sa *personal rant*. i pa en *personal rant*, i pe agres Vis-Prezidan, e i pe agres ou direkteman.

Mr Speaker an plis ki sa nou vwar lo *Facebook* la ki piblik, ki sa madanm ki Onorab Loze in fer referans avek koman son ser, in met en portre la konmela la, letan in fer referans avek li, ki montre li avek Vis-Prezidan, Prezidan e li dan milye dan son *t-shirt* Wavel Ramkalawan.

Alor Mr Speaker in mete avek sa *post*, ki li, li osi Lydia i koumsa mon pour lir parey in ekrire e in donn mwan permisyon, i dir "mwan Lydia osi i konn koze, e mon pa'n demann personn pour vin pran mon traka".

Mr Speaker, sa madanm i konn Prezidan, mon pa konnen depi ki lannen i a kote Wavel Ramkalawan avan i ti vin Prezidan, zot annan zot kominikasyon zot de. Alor la sa madanm i dir li pa vin koz pour li silvouple, koz pour son lekor.

Mr Speaker nou bezwen, nou bezwen osi dir *LOTO*, ki parey li i kapab *translate*, nou pour osi *translate* son bann *verbatim* e nou osi nou ava anvoy kot *SADC PF*, nou a gete ki *SADC PF* i dir. Parey pe

anvoy-e pour ou, nou osi nou kapab servi menm privez, akoz sa i en *threat*, i en *threat* pour bann lezot lofis ki ou annan letan ou pe reprezant nou Lasanble e ou pe reprezant pei. Alor nou osi nou bezwen fer parey Mr Speaker.

Se sa bann rigol ki zot anmenn nou ladan Mr Speaker, *ok*? E letan zot dir nou koumsa ki nou pe met en parti - nou pe anpes zot koze, nou pe opres zot e la nou pe anpes Onorab vin delibere lo sa Mosyon.

Mosyon pa sipoze vini parey de Mosyon, i sipoze vin en Mosyon tousel. Deza in annan kankan in vin de Mosyon. Prezan i pe dir nou pe *preempt* ki mannyer deba pour ale, nou pa oule i koze. Mr Speaker pa sa ki le ka! Le ka i ki letan ou'n asize ou'n fer bann mannev ki prezan ou annan ou en konsekans, ou sot lo tou pwen ki ou kapab, poudir sa i en lopresyon!

Ou *post* ti le 2, ozordi Mosyon i *happened* pour vini, i *happened* ki i annan sa 2 lezot Mosyon pe vini apre, e i annan en konsekans ki i pe pas avan.

Nou pa kapab regarde be akoz i annan en Mosyon ki pe vini, alor nou pa pou met sa enn premye. Sa mon rezete konpletman Mr Speaker. E letan nou'n ganny dir ki labitid

i segonn natir! Mr Speaker labitid i segonn natir zot dir pour nou. Get byen ki savedir labitid i segonn natir. *Ok*. Akoz sa i annan en kantite reperkisyon letan nou pe dir sa.

E Mr Speaker mon bezwen fini an dizan ki en Manm in *share* avek mwan, letan mon'n anmenn sa Mosyon yer, i dir ek mwan ki Onorab i deza dir ek li ki li i telman *evil*, ki i kapab *plan anything* kont okenn Manm e i pour napa okenn regre!

Mr Speaker sa mon krwar i vreman, i vreman...

(Interruption off-mic)

MR SPEAKER

Onorab! Eskiz mwan...

(Interruption off-mic)

HON FLORY LARUE

I vreman...

(Interruption off-mic)

MR SPEAKER

En moman, en moman silvouple.

(Interruption off-mic)

MR SPEAKER

Order! Order! Onorab. Onorab mon pa krwar ou devret

anmenn. Mersi pour lord. Onorab mon pa krwar ou devret anmenn parol ki en Manm in dir ou lo en lot Manm, koman en largiman dan en deba. Alor mon pe demann ou pour retir sa, *retract* sa, e silvouple ou ti pe al dir ou pe konklir, konklir. Onorab.

HON FLORY LARUE

Mersi Mr Speaker. Me solman mon ti demann sa Manm si mon kapab *share* sa i ti dir mwan...

MR SPEAKER

Non be i pe koz lo en trwazyenm.

HON FLORY LARUE

Mon ava *retract*. Mon ava *retract* Mr Speaker.

MR SPEAKER

Order!

HON FLORY LARUE

Mon ava *retract*.

MR SPEAKER

Mersi. Mon pour *deal* avek sa. I pe koz lo en lot Manm, ou pa'n demann sa lot Manm, ou'n demann li, silvouple *retract* sa. Onorab kontinyen.

HON FLORY LARUE

Mr Speaker mon *retract* sa ki mon'n dir....

MR SPEAKER

Mersi. Kontinyen.

HON FLORY LARUE

...mersi pour ou gidans Mr Speaker . Mr Speaker avek tou sa bann keksoz ki mon'n dir mon ti a kontan met sa Mosyon devan Lasanble. Mersi.

(APPLAUSE)

MR SPEAKER

Point of order Onorab Pillay wi? Yes?

HON SEBASTIEN PILLAY

Mon pa pe rod dernyen parol mwan Mr Speaker. I annan trwa repriz. Premye repriz *Standing Order* i dir "*the policy of the Opposition shall not be made a pretext for debate*".

Si Lopoziyon dan sa Lasanble i fer son *meeting Caucus* dan Zedi, *it should not be a pretext for a debate* pour Onorab Larue, *if you knew the Standing Order* ou pa ti ava met sa.

Dezyenmman, "*imputation of an improper motive*". *Imputation of an improper motive*. Onorab Larue in *impute an improper motive* lo Onorab Loze. Atraver son *matter of*

privilege e ou pa dir li nanryen! Zis i *retract*. I bezwen fer en *apology* avek Onorab Loze e avek sa Lasanble la bomaten pour sa.

MR SPEAKER

Ok.

HON SEBASTIEN PILLAY

Trwazyenmman, trwazyenmman *members and family of* en Manm Lasanble pa devret ganny refer dan *debate*. Sa Manm i kapab refer lo son fanmir. En lot Manm pa kapab refer lo son fanmir, sa osi i dan *Standing Order*.

Dir mwan ankor mon mal? Sa osi i dan *Standing Orders*. So mon ti a kontan - ou vwar depi bomaten nou pe sey fer *attempt* pour prouve. So *I leave it there* Mr Speaker!

MR SPEAKER

Mersi. Lo sa dernyen pwen se Onorab Loze ki'n anmenn sa pwen, dan deba e Onorab Larue pe fer repons lo deba, se tou. Onorab Loze?

(APPLAUSE)

HON JOHAN LOZE

Mersi Mr Speaker. Mr Speaker mon ti le zis pran laparol pour mwan dir, mon le kategorikman *refute* sa lakizasyon '*evil*' sepa kwa, avek tou respe pour

fragilité mantal tou dimoun dan Lasanble Nasyonal.

Mon pa'n zanmen dir okenn tel parol avek okenn personn. Mr Speaker mon osi note ki dan lavi zanmen ou ganny sali par delo prop. Mersi Mr Speaker.

MR SPEAKER

Bon. Lo sa pwen mon'n fer Onorab Larue *retract* e in *retract* sa komanter, in ganny tire lo rikord Lasanble. Onorab Larue ou pe konklir? Ou'n fini konklir. Mersi.

Bon be mon a demann Manm pour vot lo Mosyon ki devan nou e mon a apel bann ki an faver lev lanmen silvouple? Nou a vote.

Bon *ok* bon, pour satisfer, pour satisfer Lopoziyon, mon a demann Onorab Larue pour lir son Mosyon. Ale! Onorab Larue.

HON FLORY LARUE

Mr Speaker mon Mosyon i lir koumsa.

(Interruption off-mic)

MR SPEAKER

Order!

HON FLORY LARUE

Sa Lasanble i demande ki Onorab Johan Loze i ganny sispann pour 2 *sittings*, ouswa

en semenn pour son aksyon e i ganny demande pou *apologize* avek Lasanble avan rebran son plas. Mersi.

MR SPEAKER

Mersi. Kestyon i ganny mete devan Lasanble, Manm ki an faver lev lanmen? Mersi. Manm ki kont. Lo Mosyon ki'n ganny anmennen par Onorab Larue anba *Standing Orders* 40, 23 Manm in vot pour, 10 Manm in vot kont e 0 in *abstain*. So Mosyon in aprouve par Lasanble.

Bon ki pour arive prezan i pa mon lentansyon pour mwan donn en *final ruling* lo sa vot, lo sa desizyon Lasanble. E i pa zanmen mon lentansyon pour mwan priv Onorab Loze son posibilite, pour li koz lo bann Mosyon ki devan nou Lasanble e i deza dan Lasanble pour ozordi.

I annan serten konsiderasyon ki mon le fer, sirtou mon le reponn serten komanter ki'n ganny fer e mon le adres sa e mon le prepar mon remark lo sa.

So mon pour rezerv mon desizyon final lo sa vot, lo sa desizyon ki Lasanble in pran. E nou pour kontinyen avek lezot Biznes Lasanble pour larestan lazournen e mon a donn mon desizyon a en moman

apropriye. Nou pour *adjourn* la e nou a rebran travay 11 er 45.

(BREAK)

MR SPEAKER

Nou pour kontinyen travay lo *Order Paper*. E nou annan Mosyon parey mon'n fer remarke nou pour kontinyen avek sa de Mosyon *TRNUC*. Mon le eksplik nou manm piblik ki mon'n pa'n gannyen okenn lot Mosyon bipartisan, lo sa size ki mannyer nou pour pran Rapor *TRNUC*. Alor avek lefe ki mon napa lot Mosyon, mon pour konsider sa de Mosyon ki lo *Order Paper* deza.

Zot a remarke ki sa de Mosyon i apepre, i konplemant kanmarad, enn i dir en fason, lot i dir lot fason. So i posib ki deba i kapab al en pe, lo tou le de merit sa bann propozisyon.

Me selman nou pour pran li, nou pour pran premye Mosyon Onorab *Leader* Lopoziyon premye, e apre nou pour kontinyen depan lo rezilta, nou a regarde si nou bezwen kontinyen avek lot Mosyon. Onorab Pillay ou ava anmenn ou Mosyon silvouple.

HON SEBASTIEN PILLAY

Mersi Mr Speaker. Mr Speaker avan mon al lo mon Mosyon. Mon pour alert Lasanble lo nou

Standing Order, e sa se *Standing Order* 43(6) e mon pour demann ou Mr Speaker, pour mwan donn en leksplikasyon pour klarifye akoz mon pe *evoke Standing Order* 43(6).

Mr Speaker ler mon ti met mon Mosyon lo *Order Paper*, mon ti anba lenpresyon e lendikasyon ki rapor ki Prezidan Larepublik ti fer referans avek dan plizyer *meeting* piblik, e rapor ki *TRNUC* ti sipoze met devan Prezidan Larepublik, i menm rapor ki ti'n ganny anvoy-e kot Lasanble.

Me apre sa mon'n aprann atraver *Leader Zafer* Gouvernman ki i annan lezot *case* ki manke. E ki ler mon pe regard sa *pen drive* avek sa lanyard ble ki la, ki mon'n gannyen bomaten. I annan ankor *over 300 case*, *300 case* ki fer mwan konpran poudir i napa en rapor ki'n ganny *table* devan Lasanble ler mon ti pe *move* mon Mosyon.

E si napa en rapor ki'n ganny *tabled* devan Lasanble, en rapor konplet. Mon pe demann mon lekor si mon pour pe fer zistis par *move* en Mosyon dan labsans annan tou lenformasyon posib?

Prezan Mr Speaker i enportan pour mwan eksplik

serten fe, ki ava permet mwan, akoz vi ki Mosyon i dan mon non, i mon privez koman en Manm Lasanble pour eksplike lefe ki Mosyon i dan mon non, ki mon'n vwar en lot Mosyon ganny mete lo *Order Paper* ki parey pour mwan.

Mon ti ava krwar poudir Lasanble i annan en Mosyon ki pe al debat en rapor, i ti ava *stick to* sa enn. Me kote mazoriter in ganny loportinite pour zot anmenn en lot Mosyon ki parey. E baze lo bann lenformasyon ki mon'n gannyen ki'n pase dan *ABC* se ki ou'n *advice* Onorab Georges pour amann son Mosyon orizinal pour enkli, sa morso dan son Mosyon ki lir pour *set aside later* pour redebate rapor.

Ki fer mwan prezan demann serten kestyon lo proses ki pe ganny servi pour nou kapab debat sa ki nou pe koz lo la. Apre ki mon'n regard sa determinasyon e ki mon'n ekout Prezidan Larepublik, mon'n pran en desizyon prezan pour *move* en lot Mosyon, ki mon'n sey prezant devan *Leader Zafer* Gouvernman koman en Mosyon bipartisan zisteman, pou fer zistis sa size. E dan lentere piblik mon pour lir sa lot Mosyon ki mon'n donn *notice*, ki ou'n fini gannyen.

MR SPEAKER

Onorab mon pa sir si sa i annord.

HON SEBASTIEN PILLAY

I annord Mr Speaker akoz ...

MR SPEAKER

Akoz?

HON SEBASTIEN PILLAY

...pour eksplike akoz mon pe fer referans avek *Order 6*. Sa Mosyon

MR SPEAKER

Ou pe fer referans avek kwa? Eskiz mwan. Ou pe entrodwir en lot Mosyon la....

HON SEBASTIEN PILLAY

Non, non, non, non, non Mr Speaker.

MR SPEAKER

Ou pe entrodwir en lot Mosyon.

HON SEBASTIEN PILLAY

Non. Les mwan eksplike ou ava dir mwan si mon mal.

MR SPEAKER

Wi be ou pe al lir en lot Mosyon.

HON SEBASTIEN PILLAY

Mon bezwen lir sa Mosyon Mr Speaker, pour eksplike akoz, dan mon lentere la ozordi

bomaten mon annan en *issue* avek mon Mosyon *as it worded*.

Sa Mosyon ki mon pe anmenn devan Lasanble i demann koumsa:-

Lasanble Nasyonal i demann Gouvernman pour fer le neseseur pour pey dimoun zot reparasyon e enplimant bann rekomandasyon ki Komite *TRNUC* in met dan son rapor o pli vit posibil.

Akoz mon'n met sa Mosyon dan sa fason? Kot mon'n dir Gouvernman fer le neseseur pour pey dimoun zot reparasyon e enplimant bann rekomandasyon ki Komite *TRNUC* in met dan son rapor o pli vit posibil.

Se akoz apre ki mon'n konsidere i annan tou sa bann eleman dan sa de rapor, e ki *TRNUC* in fini fer son determinasyon, *then* mon pe *wonder* prezan ki litilite ki Lasanble pour al refer en lot deba *TRNUC*, lo sa rapor, kan sa rapor in fini donn son determinasyon e sa travay in sipoze fini ganny fer.

E se pour sa rezon bomaten...

MR SPEAKER

Onorab silvouple, silvouple ou bezwen termin la e mon pour adres pwen ki ou'n leve. Mon pour adres pwen ki ou'n leve,

mon pa krwar poudir i annord pour ou anmenn en lot Mosyon avan ou pran sa Mosyon ki la lo *Order Paper*.

HON SEBASTIEN PILLAY

Mon pa pe...

MR SPEAKER

So mon pe, mon pe aret, mon pe aret sa entervansyon la. Nou bezwen al lo sa Mosyon ki lo *Order Paper*. Si ou annan en lot Mosyon pli tar, i ava antre, i a met lo *Order Paper* e Lasanble i a pran li in *due course*.

HON SEBASTIEN PILLAY

Be zisteman Mr Speaker.

MR SPEAKER

Silvouple Onorab adres ou Mosyon.

HON SEBASTIEN PILLAY

Mon pe met devan ou Mr Speaker.

MR SPEAKER

Adres ou Mosyon.

HON SEBASTIEN PILLAY

Mon annan en problemn pour adres mon Mosyon akoz i napa en rapor ki'n ganny table devan Lasanble.

MR SPEAKER

I annan en rapor ki'n ganny table devan Lasanble.

HON SEBASTIEN PILLAY

Non-Mr Speaker letan...

MR SPEAKER

I annan. En mo- en moman Onorab. Mon pa aksepte, mon pa aksepte sa ki ou'n dir i annan en rapor ki'n ganny table dan Lasanble - devan Lasanble e Manm ti'n gannyen.

I annan serten *files* ki ti manke, ki nou'n fer le neser pour rekipere letan nou'n vwar. E mwan mon'n fer sa personnelman e mon'n bezwen pas atraver *State House* pour mwan eklersi sa sityasyon. Prezan mon pe demann ou adres ou Mosyon silvouple.

HON SEBASTIEN PILLAY

Mersi Mr Speaker. Mr Speaker mon pe sey eksplik ou problemn e difikilte ki mon annan pour mwan adres mon Mosyon.

MR SPEAKER

Me dan sa ka ou. Dan sa ka ou retir ou Mosyon.

HON SEBASTIEN PILLAY

Mr Speaker *please* les mwan eksplike ou ava donn ou *ruling*. Mon pa kapab an menm tan mon pe sey eksplike...

MR SPEAKER

Mon'n donn mon *ruling*, ou pe repet ou lekor.

HON SEBASTIEN PILLAY

Non-Mr Speaker mon pa pe repet mon lekor.

MR SPEAKER

Ou pe repet ou lekor. Adres ou Mosyon silvouple.

HON SEBASTIEN PILLAY

Mr Speaker sanmenm sa ki mon'n dir ou se pour sa rezon ki mon'n koz lo sa Mosyon ki Gouvernman i ader, i pran bann rekomandasyon *TRNUC* e met devan.

Rezon akoz? Si ou dir mwan poudir mon bezwen retir mwan Mosyon *ok*, mon pa kapab retir mon Mosyon akoz napa en rapor ki'n ganny table. Sa rapor Mr Speaker avek tou respe Mr Speaker eski ou kapab dir nou ki mannyer ou'n ganny sa rapor? Dir nou ki mannyer ou koman Speaker ou'n ganny sa rapor an tou lonnekte ozordi bomaten?

Ou ava dir mwan letan ou donn ou *ruling* lo mon, lo sa ki mon pe dir premyerman. Dezyenmman depi ler ki nou'n ganny sa rapor *TRNUC* in prefere fer *meeting* avek *Leader Zafer* Gouvernman.

MR SPEAKER

Ou pe repet ou lekor Onorab.

HON SEBASTIEN PILLAY

Be Mr Speaker i *relevant to the facts*. *The facts of the matter is*, eski Lasanble pour alors prezan al refer en dezyenm deba *TRNUC* kan tou Manm pa ankore fini ganny dan bann rapor pour gete? Eski nou'n ganny *sufficient notice* pour nou lir sa rapor?

Akoz menm si mon pe fer en deba, merit mon Mosyon, merit mon Mosyon i al anlany avek bann eleman ki trouve dan sa rapor. E prezan pour mwan kapab fer en deba, mon bezwen konnen lo kwa ki mon pe al koze. E se pour sa rezon ki mon pe met devan Lepep Seselwa ki mon'n retable en lot Mosyon ki dir Lasanble Nasyonal i demann Gouvernman pour fer le neser....

MR SPEAKER

Ou pe repet ou lekor.

HON SEBASTIEN PILLAY

...pour pey dimoun zot reparasyon e enplimant bann rekomandasyon ki *TRNUC* in met dan son rapor o pli vit posibil.

MR SPEAKER

Onorab-Onorab...

HON SEBASTIEN PILLAY

... Prezan Mr Speaker les mwan vin lo...

MR SPEAKER

...*stop! Stop! Stop!* Mon vwar ou pe zis met retar travay Lasanble. Ou pe zis met retar travay Lasanble. Bann pwen ki ou'n mete, pa valid akoz Mosyon ki devan nou ozordi se pa pour nou debat lo Rapor *TRNUC* li menm. I tou senpleman pour nou deside ki manner prosedir ki Lasanble pour pran pour debat lo sa rapor? Se sa! E ou Mosyon i lo sa - dan sa laliny, se tou.

HON SEBASTIEN PILLAY

Mersi Mr Speaker. Mr Speaker mon Mosyon son merit i annan pou fer avek si Lasanble pour dakor, pour al dan en Komite pour debat sa rapor. Sa son merit.

MR SPEAKER

Wi.

HON SEBASTIEN PILLAY

Dakor ek mwan. *Ok.* Me nou'n resevwar sa rapor ozordi.

MR SPEAKER

Non.

HON SEBASTIEN PILLAY

O konplet, o konplet ozordi. O konplet ozordi. Ou pe dir ek mwan koumsa poudir mon bann pwen pa valab. Ki manner mon pwen pa valab, kan en kote latab in fini ganny akse! In fini ganny akse avek larestan rapor...

(Interruption off-mic)

MR SPEAKER

Non.

HON SEBASTIEN PILLAY

Mr Speaker be se *Leader Zafer* Gouvernman ki'n met sa devan ou ek mwan.

MR SPEAKER

Onorab! Onorab sil- Onorab silvouple, silvouple, silvouple adres ou Mosyon, sa bann pwen ki ou pe mete i zis *diversion*, tir latansyon. Annou al –

Piblik i le nou adres sa size *TRNUC* e nou bezwen komans par determinen ki prosedir nou pour swiv? Ki kalite letan nou pour donn li? Ki manner bann Manm pour adrese? Se sa ki sa bann Mosyon i lo la ozordi. Annou fer sa premye silvouple ...

HON SEBASTIEN PILLAY

Mr Speaker ...

MR SPEAKER

Onorab Pillay.

HON SEBASTIEN PILLAY

Mon pour fini lo la. Mon fini lo la.

MR SPEAKER

Terminen e komans ou Mosyon.

HON SEBASTIEN PILLAY

Si ou dir mwan piblik i anvi nou adres sa rapor, ki pli bon Mosyon ki piblik i a kapab gannnen, ki en Mosyon ki dir: -
Lasanble i demann Gouvernman pour fer le neserer pour pey dimoun zot reparasyon e enplimant bann rekomandasyon ki Komite TRNUC in met dan son rapor o pli vit posibil.

Mr Speaker se sa ki pli en meyer Mosyon.

MR SPEAKER

Onorab.

HON SEBASTIEN PILLAY

Mon pa kapab *move* en Mosyon pour diskite en rapor ki mon napa.

MR SPEAKER

Ou a – ou pe zis profite pour ou lir sa, ou'n fer li trwa fwa, mon pa konnen konbyen fwa ou anvi fer li me nou'n -mon'n deside...

HON SEBASTIEN PILLAY

Mon pa konnen...

MR SPEAKER

Nou pour kontinyen avek Mosyon ki lo *Order Paper*.

HON SEBASTIEN PILLAY

Mr Speaker.

MR SPEAKER

Sa Mosyon ki ou pe lir, i pa lo *Order Paper*.

HON SEBASTIEN PILLAY

Long story short, long story short Mr Speaker mon pa pe *move* mon Mosyon aköz mon krwar poudir prosedir ki'n ganny swiv i en labi of the *Standing Order*, i en labi of the *Standing Order* e ki, e ki i pa fer zistis travay ki sa Komite in swadizan fer e sa bann determinasyon ki'n fini ganny fer.

E ki si ou pe propoze ki nou al fer ankor en mwan, sa ki mon vwar pe arive se ki Lasanble Nasyonal i le inevitableman *delay* en rezolisyon pour sa bann dimoun. Mersi Mr Speaker.

MR SPEAKER

Mersi. Onorab si ou pa pour *move* ou Mosyon, savedir mon enterpret sa koman ou pe retir ou Mosyon? I kler sa. Bon be

dan sa ka nou pour prosed lo lot Mosyon. *Sorry?*

HON SEBASTIEN PILLAY

Mr Speaker ou'n enterpret koman mon pe retir mon Mosyon. Se sa ki ou pe dir mwan?

MR SPEAKER

Wi.

HON SEBASTIEN PILLAY

Ok. Mersi.

MR SPEAKER

Ou pe tir ou Mosyon? Onorab Pillay? Mon pe dir ou mon pe konpran sa ki ou'n dir mwan koman ou pe retir ou Mosyon. Si sa pa kler pour ou, i la lemoman pour ou dir li, si non-mon pour enterpret li koumsa.

HON SEBASTIEN PILLAY

Mr Speaker lefe ki mon pa pe *move* sa Mosyon. Lasanble pour bezwen enterpret li parey ou pe dir.

MR SPEAKER

Mersi.

HON SEBASTIEN PILLAY

Be mon konsern ki mwan mon annan Mr Speaker. Mon konsern ki mwan mon annan, ki depi bomaten, depi bomaten sa kote latab nou pe prouve

poudir i annan en laplikasyon prosedir dan sa Lasanble ki montre klerman i annan en *bias* dan lafason keksoz pe ganny fer.

I kler sa Mr Speaker, i kler Mr Speaker. E sa ki enteresan Mr Speaker, e la mon le fer sa i enportan akoz i mon, mon ganny drwa fer en *personal explanation*. Mon'n seye anmenn en Mosyon ki anmenn tou dimoun ansanm, en Mosyon ki pran sa ki'n fini ganny fer e dir ek Gouvernman pran son responsabilite. Mon'n anmennen sa Mr Speaker.

MR SPEAKER

Wi.

HON SEBASTIEN PILLAY

Lot kote pa enterese avek, lot kote i anvi retourn dan sa rapor en rapor ki zis zot ki'n vwar, en rapor ki diskisyon in ganny fer ek zot kote. Mersi Mr Speaker.

MR SPEAKER

Mersi. Onorab ou bann alegasyon i ranpli avek bann mal enterpretasyon lefe ki ou pa'n ganny sa rapor. Ou'n gannyen sa rapor, menm si ti annan, si ti annan serten *files* ki ti manke ladan. E, ou, ou pe dir mwan, ou pe dir mwan depi bomaten, depi bomaten zot pe

kestyonn prosedir Lasanble e si i pe mars byen.

Mwan mon pe dir ou sa ki mon pe war depi bomaten se en mannyer pour retard travay Lasanble e se tou. Nou ava prosede. Nou ava prosede lo *next Motion* ki lo *Order Paper*, e sa i dan non Onorab Georges *Leader Biznes Gouvernman*. Onorab Georges? Ou pare pour pran ou Mosyon?

HON BERNARD GEORGES

Yes, Mr Speaker mon'n pare pou pran mon Mosyon. Mersi Mr Speaker. Mr Speaker avan ki mon al lo mon Mosyon, permet mwan pou plito an konmansan mon Mosyon permet mwan pou donn mon leksplikasyon avek Lepep Seselwa lo sa ki Onorab *Leader* Lopozisyon in dir a mon regar.

Leader Lopozisyon i annan en probleman. Akoz dapre li mwan mon'n fer *meeting* avek *TRNUC*. Mr Speaker mon anvi fer kler isi dan sa Lasanble. E pou tou dimoun deor ki pe ekout nou, lo mon laport, lo laport mon biro dan sa Lasanble Nasyonal i ekrir *Leader of Government Business*. I pa'n ekrir *Assistant to Leader of the Opposition*.

(APPLAUSE)

HON BERNARD GEORGES

E i pa'n ekrir *follower of Government Business*. In ekrir *Leader of Government Business*. E pou bann dimoun ki pa konpran sa ki mwan mon ete dan sa Lasanble, tel parey tou sa bann ki'n vin avan mwan ki sorti dan zot parti ti ete. Se Dirizan Zafer Gouvernman dan Lasanble Nasyonal.

Donk Mr Speaker i annan serten keksoz ki mon pou bezwen fer kantmenm Lopozisyon pa kontan. Ki mon pou bezwen antre an kominikasyon avek Gouvernman. Mon pou bezwen antre an kominikasyon avek bann lenstans Gouvernman. E lenstans Gouvernman pou antre an kominikasyon avek mwan, ler zot anvi en keksoz i ganny fer dan Lasanble Nasyonal.

Mon pa konpran akoz *Leader* Lopozisyon pa konpran sa. Mwan mon pa enterfer mwan ditou avek son travay. E mon pa devret enterfer mwan avek son travay. Son travay se son travay, se li ki *lead* Lopozisyon dan sa Lasanble Nasyonal. E i fer li lafason ki i anvi, plito mal ki byen depi bomaten me sa se en keksoz ki zot, zot bezwen deal avek. Mwan mon *deal* avek travay Gouvernman.

E i pa vre, i pa vre ditou ki mwan mon'n antre an kontak avek *TRNUC* pou sa Mosyon. Mon pa bezwen antre an kontak avek okenn dimoun pou sa Mosyon. Mr Speaker mwan mon konn lir, mon konn lir en rapor. Mon'n al lekol, e mon konnen ki mannyer pou devlop en Mosyon.

Me pou dimoun konnen akoz nou, nou pa isi pou kasyet naryen pou dimoun konnen.

E la Mr Speaker mon bezwen dir sa akoz i enportan. Tou sa ki'n ganny dir la ozordi par *Leader* Lopoziyon i konn sa akoz dan en *meeting* ant ou, li ek mwan mon ti eksplik tou sa keksoz. Akoz mon pa ti anvi kasyet naryen e ozordi i servi sa menm keksoz pou li vin fer politik bon marse avek dan Lasanble Nasyonal.

MR SPEAKER

Onorab Georges pa fer li tro long, nou a prosede lo Mosyon...

HON BERNARD GEORGES

Non Mr Speaker. Sa i al avek mon Mosyon sa mon pe komans mon Mosyon mwan, mon'n komans mon Mosyon. Alor Mr Speaker mon pa pe demann leskiz person, me mon pe zis dir ki i annan serten keksoz dan sa Lasanble kot ler 2 *Leader* i

koz ansanm, se en parol ki zot, zot annan.

E ki ou pa devret vin fer politik avek e la *Leader* Lopoziyon bomaten pe dir ki i anvi anmenn en Mosyon ki pa sa Mosyon ki pa lo *Order Paper*. Be *fine* si i anvi anmenn sa Mosyon Mr Speaker anmenn sa Mosyon en zour nou ava debat lo sa Mosyon.

I pa kapab vini e dir ki i le anmenn en Mosyon ki diferan avek sa Mosyon ki'n anmenn devan Lasanble. E mon bezwen fer sa kler, akoz sa i sorti apre ki ou Mr Speaker semenn pase, ou semenn avan ou ti demann *Leader* Lopoziyon avek mwan pou *get together* pou sey drafte en Mosyon bipartizan. Seta sa lentansyon.

E si Onorab *Leader* Lopoziyon ozordi i anvi koz laverite tout laverite e ryen ki laverite, i ava aksepte ki sete sa lentansyon. Sepa ki li i kapab anmenn en Mosyon pou li regroup Lepep Seselwa sete en Mosyon bi partizan. E bipartizan savedir tou lede kote ti bezwen tonm dakor avek.

Prezan les mwan eksplike akoz ki mon ti rankontre avek Mr Green, Mrs Purvis ki 2 Komisyoner e Mr Jacques Harter ki en manm *Staff TRNUC*. Mr Speaker mon annan mwan 5 biro - 5. Mon pa pe vin

fer okenn *teat* la ozordi mon annan 5 biro.

Mon annan 1 dan sa Lasanble Nasyonal ki lo son laport i mete *Leader of Government Business*. Mon annan en biro *Eden Plaza* ki mon biro avoka. Mon annan en biro Les Mamelles ki mon *Constituency Office*.

Mon annan en biro kot mwan anler La Louise ki mon *office - home office*. E mon annan en biro dan lakour COMESA dan lavil *Khartoum* an *Sudan* avek mon non lo laport ankor - 5 biro.

Apart sa enn ki *Khartoum*, mon ti'n kapab rankontre sa 3 dimoun dan okenn sa bann biro. E si mon ti'n swazir pou fer li personn pa ti pou konnen si mon'n rankontre sa bann dimoun. Me akoz ki zot ti anvi rankontre mwan dan mon kapasite koman *LGB*, mon'n rankontre zot isi dan sa biro dan Lasanble Nasyonal.

E rankontre zot pa ti annan naryen pou fer avek sa Mosyon. Sel keksoz ki sa 3 dimoun ti enterese diskrit avek mwan, sete pou sey demann avek Gouvernman, servi mon lenfliyans avek Gouvernman pou rod en Bidze pou zot kapab fini sa travay ki zot pa ankor fini. Sete sa ki ...

MR SPEAKER

Onorab silvouple annou ariv lo Mosyon. Non. Onorab i annan laparol. Onorab i annan laparol.

HON BERNARD GEORGES

Onorab *Leader* Lopozisyon in koze mon pa'n enteronp li ditou.

MR SPEAKER

Non. Mwan ki pe enteronp ou, pou dir ou annou avans lo Mosyon. Mersi.

HON BERNARD GEORGES

Alor Mr Speaker vwala Lepep Seselwa deor e tou Manm Lasanble, i bezwen konnen ki mon'n rankontre avek sa bann dimoun pou en rezon spesifik; ki napa naryen pou fer avek sa Mosyon.

Me menm si mon ti'n anvi rankontre zot pou ed mwan lo sa Mosyon, mon pa bezwen pran permisyon avek personn i mon drwa pou fer li!

(APPLAUSE)

HON BERNARD GEORGES

E i mon drwa pou fer li Mr Speaker akoz, akoz bann zabitan Les Mamelles in vot pou mwan 4 fwa, pou reprezant zot dan sa Lasanble Nasyonal.

(APPLAUSE)

MR SPEAKER

Onorab silvouple.

HON BERNARD GEORGES

E Mr Speaker ler mon pran laparol isi dan sa Lasanble, mon pran laparol koman en Manm Elekte pou reprezant en distrik elektoral. E en Manm ki'n isi dan sa Lasanble pandan plis ki 20 an, mon konnen ki si sa ki mon pe dir e ki sa ki mon pe fer.

(APPLAUSE)

HON BERNARD GEORGES

Le 2 Novanm Mr Speaker 2017, dan enn bann rar e sa bann zour mon bezwen dir tre rar legzanp travay bi partizan nou Lasanble parey nou moto Linite dan Diversite i proklanmen ti pas en Mosyon anmennen sa letan par *Leader* Lopozisyon – (sa ti en *Leader* Lopozisyon)!

Par *Leader* Lopozisyon Onorab Wavel Ramkalawan pou etabli en komite Lasanble pou anmas konplent avek bann viktim koudeta 1977. E sa ki'n swiv. E propoz en mekaniz avek Gouvernman pou ekout sa bann konplent, rod laverite lo sa ki'n arive e trouv solisyon pou ki nou pep ti pou kapab rekonsilye e avanse dan linite

ver en lavenir an pe e an larmoni.

Mon Mosyon donk ozordi devan sa Lasanble se, “Prenan kont rapor Komisyon Laverite, Rekonsilyasyon e Linite Nasyonal (*TRNUC*) ki'n ganny depoze devan Lasanble an konformite avek lalwa *TRNUC*. An vi lenportans e lanpler sa rapor e dan lentere:

- Trouv en mwayen pou konklir travay ki reste pou Komisyon fer.
- Etabli en fason pou protez arshiv sa Komisyon.
- Sizer en fason pou komemor bann viktim Dezyenm Repiblik.
- Propoz en mekanizm pou konsider konpansasyon e reparasyon pou sa ki'n soufer.
- Promouvwar rekonsilyasyon ek linite nasyonal;

Lasanble i demande ki letan apropiye i ganny akorde pou deba ganny fer lo rapor *TRNUC* par Lasanble Nasyonal. Vwala Mr Speaker Mosyon ki devan nou.

MR SPEAKER

Mersi. Mon a ganny segonnman lo sa Mosyon? Onorab Esparon.

HON REGINA ESPARON

Mersi Mr Speaker. Eskiz mwan pou sa pti fot teknik, mon annan plezir pou segonn sa Mosyon tre enportan anmennen par Onorab *Leader* Zafer Gouvernman.

MR SPEAKER

Mersi. Byen avan mon donn laparol Onorab, *yes ou point of order* Onorab Pillay.

HON SEBASTIEN PILLAY

Mersi Mr Speaker pou permet mwan pou fer en *personal explanation*. Akoz mon non e mon pozisyon ki mon okipe dan Lasanble Nasyonal in ganny fer referans avek, dan propo en deba ki'n ganny avanse lo Mosyon ki Onorab Georges in *move*. E mon ti a kontan ki piblik i ganny met byen lo rikord.

Mr Speaker Onorab Georges in dir pou dir ki *TRNUC* in vin kot li koman li *Leader* Zafer Gouvernman, sete sa mon pwen ki mon'n en kontansyon avek. *TRNUC* i pa en zafer *Leader* Gouvernman ni en zafer Gouvernman. i sipoze en zafer Lasanble Nasyonal - dan sa konteks. Si *TRNUC* ti bezwen pou ganny lot Bidze i ti a zwenn avek tou Manm Lasanble.

Si *TRNUC* ti anvi rod en larsiv i ti a zwenn avek tou Manm Lasanble. Mr Speaker

Onorab Georges i lo rikord pe dir, i lo rikord pe dir "ki zot in servi *TRNUC* koman en seval batay". So, ou ekspekte mwan, mwan prezan krwar ki poudir bann *meeting* i pa zis enn bann *meeting* ki li i pe gannyen ek *TRNUC*, i dan lentere nou tou ki la anndan? Non Mr Speaker.

Se pou sa rezon ki mon pe met devan ou, e mon pa konnen ki mon pou fer plis ki sa. Mon pe rod en arbitrer ki fer ki i ava regard dan sa ki'n arive, pou nou regarde akoz keksoz i ganny fer dan en serten fason.

Prezan pou mwan adres sa pwen Mosyon bipartizan, dan bann *meeting* ki nou ti gannyen avan ki nou ti ganny sa Mosyon retire lo *Order Paper* tou konsern sete lo size reparasyon.

Size reparasyon, size reparasyon. Mon dir be *ok*, kwa ki pli senp? Nou *cut out the middlemen* konpletman e nou vin ek en Mosyon ki koz lo reparasyon; ki ava permet bann Manm pou al dan tou eleman ki zot anvi al ladan. Me, anfen kont nou a ganny en desizyon Lasanble lo sa size reparasyon e bann rekomandasyon *TRNUC*.

Sirtou apre ki mwan pa ti konnen rapor pa konplet, me mon koleg ti konnen ki rapor i konplet. Be se pou sa rezon ki ou bezwen - ki ou ekspekte mon

pa ganny en konpran. Mon pe sey demann ou pou donn en *ruling*, oubyen pou fer en desizyon koman sa dimoun ki ansarz Lasanble pou war ki en kote in ganny marzinalize dan en deba!

E ler nou koz lentansyon sa premye Mosyon anmennen par sa enn ki ti en vre *Leader* Lopozisyon. I byen aköz li ozordi tou sa ki i ti fer koman *Leader* Lopozisyon i pa oule personn fer. I pa oule fer. I pa oule personn fer.

E ler i ti anmenn sa Mosyon, sa ki i pa ti dir ek bann ki ti pe siport li lo sa Mosyon, sete ki ti son vre lentansyon se pou servi *TRNUC* koman zot seval batay.

MR SPEAKER

Ok-ok.

(Interruption)

HON SEBASTIEN PILLAY

So, mon oule met sa lo rikord ki mwan mon en dimoun ki gard tou lenformasyon.

(Interruption)

MR SPEAKER

Terminen silvouple.

HON SEBASTIEN PILLAY

Dan en fason konfidansyel e ki ou ti dan sa bann *meeting*, i annan keksoz ki'n ganny dir la mon pa pou al pli lwen ki ou konn tre byen poudir napa zis en *meeting*. Mon'n war ou ou'n riye, ou'n souriye ou'n realize ki sa ki Onorab in dir pa korek. Me selman mon pa pou al pli lwen ki sa. Mersi Mr Speaker.

MR SPEAKER

Mersi. Mon a zis - ou'n fer plizyer *ruling* lo sa bann pwen ki'n leve e mon pa bezwen re-al lo la. Mon a zis koriz en pwen se ki dan *meeting* ki mwan mon ti annan avek *Leader* Lopozisyon, avek *Leader* Biznes Gouvernman, nou ti diskite nesosite pou Lasanble anmenn en Mosyon pou gete ki mannyer nou pou pran sa rapor.

Mon pa ti zanmen annan okenn parol ki dir i pou zis lo reparasyon. Mwan pwen ki mon ti fer se ki reparasyon i bezwen ganny enkli dan konsiderasyon ki Lasanble i fer, lo ki mannyer nou pou *deal* avek. Onorab Georges silvouple adres ou Mosyon.

HON BERNARD GEORGES

Mersi Mr Speaker. Mr Speaker efektifman 1, 2,3,4enm pwen dan mon Mosyon i dir propoz en mekaniz pou konsider konpansasyon ek reparasyon

pou sa ki'n soufer, nou ki pe demande Mr Speaker pa *Leader* Lopoziyon, les dimoun konpran sa tre byen.

Alor Mr Speaker mon ti pe dir ki an 2016 ti annan en komite ki ti ganny etabli isi dan Lasanble pou komans sa proses. Mwan mon ti annan loner servi lo sa komite, e sel lot Manm ki ti lo sa komite ki reste ozordi koman en Manm Lasanble, se Onorab Adelaide.

Ozordi nou 2 Onorab Adelaide e nou tou lo sa kote latab nou la pou ed Lasanble rod en fason pou konklir sa proses ki nou ti komanse 7an pase. Pandan sa peryod Mr Speaker depi 2016 en Lalwa in pase. E set en Lalwa ki gid tou sa ki sa travay *TRNUC* i fer, pa Lasanble.

Lasanble in fini son devwar in apwent en komite in pas en Lalwa, apre sa fodre nou regard sa Lalwa pa Lasanble Nasyonal pa *Leader* Lopoziyon, pa mwan. Nou bezwen regard sa Lalwa e swiv sa ki sa Lalwa in dir.

Pandan sa peryod en Lalwa in pase, en Lalwa ki ti ganny *assent* par Prezidan Faure dan sa menm lespri bipartizan ki ti'n anmenn sa Mosyon. Viktim ti vin devan avek zot konplent. Komisyon Laverite, Rekonsilyasyon e

Linite Nasyonal in ganny etabli; Seselwa in swiv travay sa Komisyon viktim ek *perpetrator* tou lede in vin devan e laverite in ganny devwale.

Serten viktim in pardon bann *perpetrators*. Serten *perpetrators* in menm ganny *amnesty* anba sa Lalwa. Me serten i ankor dan proses e se sa enn bann problem. Komisyon in konplet son manda, me i pa'n konplet son travay. Lasanble i bezwen ozordi retourn lo sa dosye e rod solisyon pou sa ki reste pou fer e parey mon'n dir Mr Speaker i ankor annan travay pou fer.

Se pou sa rezon ki premye pwen dan mon Mosyon, i dir annou trouv en mwayen pou konklir travay ki reste pou sa Komisyon fer, nou pa anvi al zis lo reparasyon parey en bann nou bezwen swiv tou proses pou ariv la kot nou anvi ale.

Travay Komisyon parey nou tou nou konnen in ganny fer ouvertman lo televizyon, e in permet laverite lo en moman tris nou listwar ganny met o kler. Seselwa prezan i konnen lekel ki'n touy Hassan Ally, lekel ki'n touy Ricky Hermite, lekel ki'n touy Damandra ek Son Chang Him. E mon poz la en moman Mr Speaker pou regarde get lafason keksoz i

arrive, pou pran konsyans pandil Bondye ki pa nou pandil.

Nou pe debat lo sa size zis apre lanniverser koudeta, e zis detrwa zour apre ki'n nou'n anter *Bishop* French Chang Him, ki'n perdi son frer sa zour, ki son frer in perdi son lavi dan en fason mon kapab dir kot son lavi in ganny zete pou naryen.

Nou konnen akoz serten later in ganny pran malapropo; akoz de milye dimoun ti bezwen kit pei e al rod en lavi deor koman refizye. Nou konnen ki rol Mr Rene ti zwe dan plizyer sa bann atosite. Tousala e bokou ankor nou konnen Mr Speaker. Laverite in ganny met o kler.

Me rekonsilyasyon e linite nasyonal, i ankor reste pou nou al rode, pou nou anmenn lo nou pei, pou nou fer desann sa 2 konsep e apoz lo nou pep. Akoz Mr Speaker *TRNUC* pa ti zis “*T*” Laverite, me ti osi “*R*” Rekonsilyasyon ek “*N, U*” Linite Nasyonal. Menm Komisyon in rekonnet sa, akoz dan son *forward* ki in ekrir dan sa rapor ki devan nou Lasanble *Chairman* sa komisyon Mrs Mcintyre ti dir ki i espere ki rapor komisyon ava en fondasyon pou inifye Lepep Seselwa, otour en azanda komen e permet nou avanse avek konfidans kot lepase pa pou kontinyen menas lefitir.

Pou son par Mr Michael Green, *Vis-Chairman* ti dir “ki nou'n obzerv detrwa legzanp kot viktim in pardon *perpetrators*”. E son swe se ki pou annan plis ankor sa kalite keksoz pou ki nou a kapab ganny rekonsilyasyon ek linite nasyonal. E vin en pep inifye dan lape fraternel ver prosperite. Se sa alor travay ki devan Lepep Seselwa ozordi. Nou bezwen konklir sa travay ki nou'n komanse.

Parey Mosyon i demande nou bezwen fer sa 4 keksoz ki mon'n mansyonnen. I reste nou alor Mr Speaker sa bann lobzektif ki devan nou pou akonplir travay e met en finisyon avek sa divizyon, sa lanmertim, sa vyolans, sa labi drwa imen, sa peryod nwar dan listwar Sesel, ki Mr Rene in zet lo nou dan lannwit le 4 a le 5 Zen 46an pase.

E konklizyon sa travay se nou Lasanble koman reprezantan Lepep Seselwa, ki bezwen donn direksyon tel parey nou ti donn an direksyon pou li komanse 7an pase. Se pa koumsa Mr Speaker ki mon ti'n anvi sa letap i deroule, kot Lasanble ti bezwen swazir ant 2 Mosyon.

Senbol pli for ki nou Lasanble ti pou kapab donner ti ava parey Prezidan Faure in

fer nou rapel semenn pase ler in aparet lo *Tête à Tête*, en Mosyon bi bipartizan kot nou ti a kapab zwenn ansanm koman en sel Lasanble pou fini sa travay ki ansanm nou ti komanse.

En senbol pli for sete ki *Leader* Lopozisyon ozordi i anmenn sa Mosyon e mwan mon segonde tel parey ti arive an 2016, me malerezman pou bann rezon ki nou fek war sa pa'n kapab arive.

Alor Mr Speaker kestyon i kapab ganny demande, akoz ki mwan mon'n anmenn en lot Mosyon? Larepons Mr Speaker i senp, nou pa bezwen debat lo rapor *TRNUC* parey Mosyon *Leader* Lopozisyon ki lo *Order Paper* e ki pa'n anmennen bomaten ti pe demande.

Sa Komisyon in fini fer son rapor. Sa rapor i annan plis ki mil paz e i dan domenn piblik e nenport ki i kapab lir li, i en rapor tre, tre detaye dan plizyer volim. Volim 1 premye volim i en lentrodiksyon 288 paz ki rakont travay komisyon depi Mosyon Onorab Ramkalawan ziska Lalwa *TRNUC* ti pase devan Lasanble.

E plizyer paz sa ki mwan mon ti dir isi dan deba lo sa Lalwa, in ganny rikorde dan sa premye volim. Sa premye volim, alor se en volim pirman

konteks. 2enm volim ki annan 133 paz i dekrir listwar Sesel, politik Sesel lendepandans, koudeta e tou sa ki'n swiv. Sa i en volim pirman istorik.

3enm volim ki annan 128 paz, i defini kategori lofans ki'n kapab ganny komet e ki *TRNUC* ti pou bezwen enn par enn egzaminen, e regard bann eleman sak lofans pou aksepte si sa lofans in ganny komet oubyen non. Sa i en volim pirman legal.

4enm volim 98 paz, i koz lo *amnesty*, ki si sa, sa? Ki fodre fer pou en dimoun ganny *amnesty*? E lekel ki'n ganny *amnesty*?

Volim 5, 53 paz i lo reparasyon, Lalwa enternasyonal lo reparasyon bann kategori reparasyon, bann domaz ki Lakour Siprenm Sesel in deza donner pou plizyer kategori dimal travay e rekomandasyon sa sou komite lo reparasyon. Propozisyon pou rekonpans viktim e en *draft* en Lalwa lo reparasyon. Sa volim napa konklizyon. Sa se en travay ki *still* bezwen ganny elabore.

Aprè i annan en lalis ki annan 504 ka, ki'n ganny determinen ouswa ki *still* ankor bezwen ganny determinen, e ladan nou konnen ki i annan apepre 350 a 375 ka ki'n fini

ganny raporte lo la. Sakenn sa bann ka i pran 25 paz omwen ou plis e i rakont sirkonstans lanmor, sirkonstans blesir, prizonman, legzil, perdi lanplwa, perdi propriyete eksetera e i rann en zizman lo sak ka.

Ki'n arive? Lekel ki ti *perpetrator*? Si sa konplent in reisi eksetera. E sa set en travay ki'n ganny parsyelman konklir e ki *still* bezwen ganny fini i pa ankor fini sa travay, akoz manda *TRNUC* in ariv a son lafen.

E finalman, *TRNUC* in fer en seri rekomandasyon lo plizyer topik enkli ki manner pou evit sa ki'n arive, ariv ankor. Ki manner pou donn lazistis viktim, led sikolojik pou bann kategori dimoun ki'n ganny afekte. Ki pou fer avek rapor Komisyon? Ki pou fer avek son bann dosye? Ki manner reparasyon pou ganny fer?

E osi ki si sa ki'n al mal dan travay Komisyon-li menm e ki lasistans par egzanp ki zot pa'n gannyen pou zot fer zot travay tre byen. Sa i annan plizyer paz e en seri rekomandasyon ki i devan nou pou etidye.

Mon retourn alor Mr Speaker lo sa keston, akoz ki nou pa anvi al lo en

lenspeksyon sa rapor paz par paz, parey sa Mosyon *Leader* Lopoziyon ki i pa'n anmennen bomaten ti pe demande? Parey mon dir Mr Speaker larepons i senp, mon aksepte mon bezwen aksepte ki Onorab Pillay i anvi en serten deba lo sa rapor.

Me mon pa krwar ki meyer fason pou ariv a en solisyon ki Lepep Seselwa sirtou bann ki'n ganny afekte i anvi vwar, se pou annan en deba detaye lo tou sa rapor ki mon fek elabore. Akoz sa ti pou en legzersis pirman akademik.

E mon dir sa pou bann rezon swivan; Premyerman, bokou keksoz dan sa rapor i zis konteks e largiman legal e enternasyonal. Si, nou ti'n al dan sa direksyon Lasanble ti pou'n ganny anmare dan plizyer fason. Premyerman nou ti pou bezwen abord sa rapor la imedyatman swivan sa Mosyon. Akoz se sa ki *Standing Order* i demann nou pou fer.

Lo sa kote latab Mr Speaker, nou pa krwar e nou pa ti krwar ki moman pli apropiye pou fer sa se la dan sa mwan Zen. Sa se mwan koudeta, se mon lanniverser Konstitisyon, se mon lanniverser Lendependans.

E mwan avek bokou size politik ki'n anrasinen dan sa mwan Zen, i pa selon mwan ou

selon nou, meyer moman pou retourn lo en size e pou reouver bokou boubou, menm anmezir ki nou pe rod rekonsilyasyon. Menm si nou ti kapab ranvoy sa Staz Komite pou pli tar, Staz Komite Lasanble i fer ki tou Manm i kapab koz otan fwa ki zot oule lo sak parti sa rapor. E sa ki ti pou fer repas an detay lo sa rapor an antye enkli sa bann bout ki pirman filozofi, konbyen ki pirman legal.

E menm si nou ti'n kapab redwir lakantite fwa ki sak Manm i koze, ouswa debat lo sa rapor dan bann pli gro morso, nou ti pou *still* bezwen pas an revi tou son konteni avek sak Manm annan loportinite pou koz lo sak bout plizyer fwa.

E finalman tou sa ki nou ti pou kapab fer a lafen sa legzersis se adopte rapor, se tou. Se tou ki *Standing Order 30* i demann nou pou fer. Tou sa bann lezot lobzektif tel parey konplet travay Komisyon met sa travay pou piblik ganny akse avek, ki fason pou komemor bann viktim, rod linite nasyonal rekonsilyasyon, tousala nou pa ti pou kapab adrese apard sa bann rekomandasyon ki Komisyon in fer.

E lo nou kote nou pa satisfè ki tou sa bann rekomandasyon nou bezwen aksepte zot parey zot in ganny

met devan. Se pou sa rezon alor Mr Speaker ki mon krwar ki i annan en meyer fason pou nou *attend* nou lobzektif. E fer li dan en fason ki pli enteresan pou piblik e ki pou pli dinamik.

Mon plito krwar ki se ki servi sa konteni sa rapor ki devan nou dan tou son bann volim pou *attend* bann lobzektif Lalwa *TRNUC*, fason pli apropiye pou debat lo sa rapor avek sa bann lobzektif antet. E non pa zis senpleman debat lo sa rapor, san ki nou annan fikse devan nou en seri lobzektif.

Se pou sa rezon ki mon Mosyon i demande ki nou *set aside* en letan apropiye ki nou a determinen otour sa deba. Akoz mon mazine pou annan plizyer propozisyon ki pou ganny fer, pou nou kapab fer zistis sa rapor, fer zistis Komisyon ki'n travay lo li, fer zistis bann viktim *perpetrator*. E Lepep Seselwa ki'n bezwen sibir 15an parti inik, e ankor plizyer lannen pou reviv sa bann levennman atraver travay sa Komisyon.

Nou krwar ki meyer fason pou debat sa rapor se pou sak Manm ganny en letan e en lespas apropiye pou adres Lasanble lo lentegralite sa rapor. Me parey mon'n dir taler avek en bann lobzektif presi.

Nou pa pou kapab zis debat sa rapor.

Si nou fer sa nou pou senpleman repet sa ki annan ladan. Epi parey mon'n dir aksepte li. Nou bezwen debat rapor avek sa bann lobzektif devan nou, pou nou kapab fer sans avek sa travay ki sa Komisyon in fer pou soulaz douler bann viktim pou rekonsilye nou pep. E pou anmenn linite Nasyonal.

Se sa Mr Speaker lobzektif lo sa kote latab e mon swete ki se lobzektif sa Lasanble an antye. Alor pou ariv pou kapab *attend* sa lobzektif, mon Mosyon pe demande ki Lasanble parey mon'n dir i pran sa letan ki nou bezwen. E mon sizere ki nou fer sa an zilyet me sa nou ava war dan sa deba, pou deba konteni sa rapor me avek bann lobzektif antet.

La ki Komisyon in ekler lalimyer lo bann levennman Dezyenm Repiblik e montre nou laverite lo sa ki'n arive sa letan, nou bezwen servi sa travay pou anmenn sa 2 lezot faktor enportan ki Mosyon Onorab Ramkalawan ti pe rode an 2016. E ki travay *TRNUC* in deza komans akonplir. Pou fer sa Mr Speaker nou Lasanble i bezwen fer sa 4 keksoz swivan selon mwan;

Premyerman, trouv en mwayen pou konklir travay ki reste pou sa komisyon fer.

Dezyenmman, etabli en fason pou protez arshiv sa Komisyon.

Trwazyenmman, sizer fason pou komemor bann viktim Dezyenm Repiblik.

E katriyenmman, propoz en mekaniz pou konsider konpansasyon ek reparasyon pou sa ki'n soufer.

I pa mon lentansyon ozordi pou fer deba lo sa 4 *target*, sa 4 lobzektif. Sa nou pou fer en lot zour, me ozordi mon'n demann Lasanble an antye *including* mon bann zanmi lo lot kote latab, parey nou ti fer an 2016 pou angaz nou koman en sel Lasanble, en sel pep, en sel Sesel pou reponn a sa 4 legzizans.

Nou napa en swa Mr Speaker. Nou bezwen premyerman trouv mwayen pou sa Komisyon akonplir son travay dan lentere konklir sa langazman ki nou Lasanble in donn Lepep Seselwa. Nou bezwen trouv larzan, nou bezwen trouv kapasite, nou bezwen trouv mwayen pou donn sa Komisyon pou li kapab fini sa travay.

Nou bezwen dezyenmman rekonnet ki sa ki'n ganny fer, i bezwen ganny garde pou

larestan letan ki pou annan Seselwa lo later Sesel, pou ki nou pa retourn lo sa ki'n deza viv ladan depi 1977.

Nou bezwen Mr Speaker annan en memoryal pou bann viktim. Sa i pou annan kapasite pou reouver boubou, mon konpran sa. Me nou pa kapab evit sa tel parey nou pa ti kapab evit *TRNUC*, annou debat sa propozisyon dan en fason kot nou a rod linite nasyonal; kot nou a rod rekonsilye nou pep, pa rod diviz li e pa rod regrese.

E katriyenmman reparasyon, lekel ki pou peye? Konbyen sak viktim pou gannyen? Ki pou arive avek konpansasyon ki'n deza ganny peye? Sa Mr Speaker i pou anmenn en kantite divizyon e deba, me ankor enn fwa nou pa kapab evit li.

Koman bann reprezantan nou pep, nou bezwen fer fas avek sa bann keksoz. Annou - mwan osi mon pe pled avek bann Manm Lasanble, annou debat li sa bann keksoz dan en fason kot pou promouvwar rekonsilyasyon.

Les sa ki responsab parey Prezidan Faure ti demande, les sa ki responsab demann pardon, les zot ofer sa konpansasyon e les viktim aksepte en zes, si en tel zes i arive demen. Mon demann alor

Mr Speaker avek Lasanble, pou aprouv sa Mosyon.

Annou pa diviz nou lo en baz partizan, lo en size osi enportan. Si Mosyon i ganny aprouve, sa i ava permet *Assembly Business Committee* ki en komite bipartizan pou fikse 1 ou 2 semenn a en dat apropiye kot Lasanble, swivan gidans lo lakantite letan ki sak Manm pou kapab adres sa rapor. Ankor enn fwa ki *ABC* pou deside pou akonplir sa prosesis ki 6enm Lasanble in komanse an 2016.

E pou anmenn sa *closure* ki nou pei e nou pep i bezwen enn fwa pou tou. Annou sezi sa lokazyon ki 30enm laniverser nou Konstitisyon ek nou Lasanble i donn nou, pou nou montre Lepep Seselwa ki malgre tou sa ki'n pase, malgre ki nou asiz lo 2 kote latab, malgre tou sa ki'n ganny dir, bomaten ki nou kapab ler nou ganny apele pou fer li travay koman en sel Lasanble dan lentere nou pei Sesel. Mersi Mr Speaker.

(APPLAUSE)

MR SPEAKER

Mersi Onorab Georges. Mon krwar dan lentere *manage* nou letan, nou a bezwen pran poz la, mon pa pou anvi ki en lot Manm

i pran laparol pou depas 1er. Nou a pran *break* la e nou a retourn dan Lasanble 2.15, e mon a envit *Assembly Business Committee* pou zwenn 1er edmi plito ki 1er15 pou permet zot ganny letan dezennen avan si zot oule. Mersi Lasanble i a pran poz.

(BREAK)

MR SPEAKER

Bonn apre midi tou dimoun e byenveni pou kontinyasyon nou travay ki lo Mosyon. Onorab Loze, Onorab Woodcock. Wi Onorab Pillay? En moman. En *point of order* Onorab Loze, wi?

HON JOHAN LOZE

Mersi Mr Speaker. Mr Speaker mon ti a kontan *raise en matter of privileged* lo fason ki *SBC* in rapor lo travay Lasanble bomaten. In ganny raporte lo *SBC* ki Lasanble in vote pou aprouv en Mosyon ki sispann Onorab Loze pou 2 sesyon Lasanble Nasyonal.

Premyerman zot in dir 2 sesyon e non pa 2 *sittings* ouswa en semenn parey ti'n ganny sipoze ganny dir lo Mosyon, 2 sesyon.

Further sa reportaz in sit ki Onorab Loze in ganny sispann pou 2 sesyon. Zot in sit Mosyon ki'n ganny *move* par

Onorab. Largiman ki Onorab in anmennen e zot in koup li la sek. *No mention* ki Speaker pa ankor donn en *ruling* lo Mosyon ki'n pase *ce matin* e napa okenn mansyon *again due process* ki Onorab Loze in ganny akorde.

En rapor konpleman pa balanse kot pwennvi *the Member that was subject to the Motion* pa'n ganny *carried* par medya nasyonal. Ankor Mr Speaker en fot ki'n arive dan nou travay isi dan Lasanble prezan in ariv dan Medya Nasyonal, mon krwar finalman mon pou bezwen aksepte zis dormi lo sa lakrwa ki zot pe sey klout mwan lo la zot tou, *including* Medya Nasyonal. Mersi Mr Speaker.

MR SPEAKER

Mersi Onorab. Mon en pti pe an dout lo ki mannyer mon pou *rule en matter of privilege* lo en aksyon ki en medya an deor Lasanble in raport en biznes Lasanble. Ou a permet mwan etidye sa e mon a regarde si mon kapab ganny en klarifikasyon lo ...

Onorab Pillay ou annan en *point of order* ou osi? *Ok*.

HON SEBASTIEN PILLAY

Mersi Mr Speaker. Lo menm pwen Mr Speaker mon'n remarke gradyelman ki i annan

en *misrepresentation* dan lafason ki travay Lasanble i deroule, sirtou an sa ki konsern keston e bann size ki konsern nou lo sa kote latab.

E sa apre midi letan nou'n reget sa rapor, e nou'n reget li sa raportaz in fini donn en lendikasyon ki Onorab Loze in fini ganny sispann.

E dimoun pe demann mwan be eski Onorab Loze in ganny sispann oubyen non? E sa ki kler i se ki napa en zefor ki'n ganny fer pou regard *the whole content* e desizyon ki ou, ou ti pran a lafen sa deba an relasyon avek sa Mosyon.

So, mon ava demann ou e mon ava enplor ou pou i annan en determinasyon lo medya, me osi anba nou *National Assembly Privileges And Immunities Act* i dir ki "en travay Lasanble i bezwen ganny raporte dan lafason ki in pase, par dan en lot fason."

La i pe kre en lenpretasyon en keksoz ki pa ankor arive, akoz nou ankor pe esper e desizyon sorti kot ou e mon ti ava apresye ki ou pran sa konsern ki nou, nou annan o serye. Akoz ankor enn fwa nou santi poudir sa i en *attempt* pou *marginalized* nou lavwa ki nou annan. Mersi Mr Speaker.

MR SPEAKER

Mersi Onorab. I pou ase fasil pou mwan repas lo nouvel *SBC* dan apre midi la. E si i annan mon sipoze pwen ki mon bezwen fer se fer en pwen avek *CEO SBC* si i nesese, parey mon'n deza fer pou serten lezot size avan. *Thank you.*

Nou a kontinyen lo Mosyon. So, sa 2 lanmen ki'n leve i pa ti pou entervenir lo Mosyon? Ou pou entervenir? Bon, permet mwan pran en pe non avan.

Ok. Mon annan Onorab Woodcock, Onorab Philip Adelaide, Onorab Arissol, korek? Onorab Arissol byen, Onorab Adelaide, Onorab Bastienne, Onorab Henrie e Onorab Romain, Onorab Hoareau e prezan Onorab Bistoquet e Onorab Esparon ou'n segonn Mosyon wi. Onorab Pillay, byen *ok*, mersi.

Bon, mon krwar pou dan lentere letan mon a limit bann Manm pou 15 minit pou zot entervansyon. Onorab Pillay, en lot size? Akoz mon'n mete ou non la.

HON SEBASTIEN PILLAY

Mersi Mr Speaker. Non mon pe zis demann ou lendilzans pou permet mwan, vi ki mon le sel Manm ki'n lev lanmen lo mon kote latab, pou fer mon lentervansyon avek lefe ki

lamazorite Manm lo lot kote in lev lanmen, e mon le sel Manm ki'n lev lanmen lo mon kote latab.

E lefe ki dan prezantasyon *mover* Mosyon i annan serten *statement* ki'n ganny fer, ki mon ti a kontan ganny en loportinite pou mwan fer mon lentervansyon...

(Interruption)

MR SPEAKER

Deswit?

HON SEBASTIEN PILLAY

Deswit. Mersi.

MR SPEAKER

Well, ou'n leve ou lanmen ase boner. Mon a les segonder Mosyon adres Mosyon. Mon komanse akoz mon ti'n fini vin avek lide pou apel li. Mon napa okenn obzeksyon ki ou adres ou Mosyon, adres Mosyon premye mon pa war okenn obzeksyon ladan. Onorab Esparon.

HON REGINA ESPARON

Mersi Mr Speaker, finalman! Mersi Mr Speaker pou donn mwan laparol pou dir 2 mo pou donn mon sipor mwan osi pou sa Mosyon, ki'n ganny anmennen par Onorab Georges *Leader Zafer* Gouvernman dan

nou Lasanble e ki mon'n segonde.

Mr Speaker ler mon get sa Mosyon e mon'n ekout son prezantater, i pe senpleman demann nou pou adres bann defi ki annan otour sa rapor *TRNUC* menm avan ki nou Lasanble i analiz li o profon, ki mon dakor e sa ki Mosyon pe propoze e mon pou donn mon sipor.

Mr Speaker mon'n osi konstate ki sa rapor *TRNUC* i enn ki konpleks. E pou nou depouy li an antye, nou bezwen etabli bann paramet ki pou ed nou pli byen analiz tou son konteni. E adres tou bann eleman ki annan otour li tel parey konpansasyon, size pardon, rekonsilyasyon e lezot rekonpans.

Ozordi Mr Speaker sa ki mon'n konpran byen ki loter Mosyon in fer resorti se ki sa Mosyon pa pe demann nou pou debat lo sa rapor 12 sapit. Se pa 50 ekek rekomandasyon. Me plito parey Mosyon i listre ki anvi lenportans, e lanpler sa rapor ki loter Mosyon in klerman fer resorti dan son prezantasyon ki i annan bann pwen kardinal, e ki ti pou pli bon ganny adrese menm avan nou komans depouy sa rapor.

Ki nou kapab dir bann pwen delika pou ki ler nou

Lasanble i finalman adopte e aprouv sa rapor ek son bann rekomandasyon, nou tou la anndan nou leker pa devret pe repros nou, ki nou pa'n adres tou bann pwen nesaser.

Me ki an dot mo nou'n santi ki bann pozisyon ki nou, ki nou pou kapab anmennen pou ede anmenn sa linite e rekonsilyasyon parey Lalwa *TRNUC* i demande.

Pou tou bann viktim e fanmir kot zot a santi ki zot in annan sa louvertir pou ganny zot lazistis ki zot ti pe rode. E personn pa ava santi ki zot in ganny kit deryer. E i ava vremen anmenn sa *closure* dan zot ka.

Mr Speaker premye pwen kardinal dan sa Mosyon, se trouv en mwayen pou konklir travay ki reste pou komisyon fer. Savedir i kler ki sa letan ki Lalwa ti ganny etabli pou ekout bann ka, pa ti ase e travay lo serten bann *file* pa ti'n konplete.

Zot ava rapel ki Lasanble ti bezwen amann sa Lalwa *TRNUC* pou permet en ekstansyon ek letan ki ti'n ganny propoze, pou permet zot kontinyen depouy bann ka ki ti devan zot ki dimoun ti'n anrezistre.

E malgre sa nou konstate ki menm si rapor ti ganny

prezante dan sa letan ekstansyon i pa ti konplete, parski ti annan ankor *staff* ki ti pe ganny demande pou reste pou travay pou fini travay ki pa ti ankor fini. E pou met keksoz annord.

E Mr Speaker mon swe ki avek sa 2em volim *file* ki'n antre, sa rapor a plizoumwon konplete. Mr Speaker premyerman i ti pou osi enportan ki ler nou depouy sa rapor, nou analize kwa ki'n vremen, ki vremen *TRNUC* in kapab fer e kwa ki zot pa'n kapab fer pandan sa peryod letan.

Dezyenmman, akoz malgre ki bann ekstansyon in ganny donner a 2 repriz pou kapab fini sa travay, me menm si zot pa'n kapab fini konplet tou ka pou en rezon ou lot ki pou arive aprezan.

Trwazyenmman Mr Speaker, mon panse ki *TRNUC* i devret vin devan e dir nou ki kantite ki reste pou fer pou konplet tou dosye.

Si sa i leka dan konbyen letan, koumsa nou ava dan en pli bon pozisyon pou kapab etabli bann mezir pou ed zot konklir sa travay, pou met tou dosye e lenformasyon annord, pou bann prosedir konpansasyon e pou konservasyon.

E sa i anmenn mwan lo 2enm pwen ki pe demande 2enm pwen sa Mosyon ki pe demande, pou etabli en fason pou protez arshiv sa komisyon.

Mr Speaker ozordi nou realize ki in bezwen annan en volim *file* kot *TRNUC* ki'n ganny enkli dan demars pou ekout bann ka bann dimoun ki ti'n vin devan. E mon mazine i bann *file* ki kontyen bann lenformasyon byen sansib e delika, ki bezwen ganny proteze.

E la dan sa ka Gouvernman i bezwen rod en mekanizm pou rode kote ki sa bann *file* i ganny garde, parski Mr Speaker dan sa proses rod konpansasyon pou bezwen annan referans oubyen annan sa nesesite re-konsilte ek sa bann dosye e i pou enportan etabli ki mannyer nou protez sa bann levidans, ki pou osi form parti listwar, malgre nou pou ferm sa sapit nwar. Me ki pou enportan pou nou garde pou zenerasyon ki pe vini.

E la mon mazine ki i ti a kapab swa i ganny garde dan en mize ki ganny etabli. E an dizan sa Mr Speaker i fer mwan mazin *Memorial Center Kigali Rwanda* ki nou'n ganny sans vizite a 2 repriz, kot ou kapab ale pou war listwar sa fame zenosid ki ti pase laba letan

Tutsie avek *Hutu* ti pe lager an 1994, en landrwa ki ler ou vizite ou konpran en pe kwa ki ti pase.

Mon ti pe panse, pans en keksoz koumsa, ki petet i ganny etabli pou protez sa bout listwar, ki pou tre enportan pou nou fitir zenerasyon konnen e osi ganny akse ek bann dosye. Akoz proverb i dir, "Parol i anvole me lekritir i reste".

En lot propozisyon Mr Speaker nou kapab osi regarde si sa bann arshiv i kapab ganny met dan Lakour petet ki *deal* avek bann ka ki sansib. E an menm tan Mr Speaker an dizan sa, mon osi realize ki ler en landrwa ou repozitwar fizik i kapab ganny andomaze bokou lenformasyon i perdi.

Nou kapab osi mazine dan kit en rikord nimerik *digital* osi koman en *back up*, pou ki si demen en malsans i arive ou pa konnen - omwen ou kapab ganny bann dosye e lenformasyon.

Trwazyenmman Mr Speaker Mosyon pe demande ki nou sezi en fason pou komemor bann viktim Dezyenm Repiblik. I annan en kantite sizesyon ki ti ganny met devan pandan bann sesyon *TRNUC*. I enportan ki nou mazin nou listwar e ki demen sa bann atosite pa zanmen ganny repete.

Me Mr Speaker, nou zanfan, pti zanfan i bezwen konnen konn nou vre listwar e bann dimoun ki'n ganny afekte par sa bann lensidan, bann viktim ki'n perdi zot lavi par bann atosite politik, parmi i annan ki'n defen ki'n defann nou pei e nou devret salye zot.

Mr Speaker, mon an faver ki en zour i devret ganny komemore pou zot, e mon panse ki zour sa Lalwa ti ganny etabli i petet i vin en zour pou mark sa lokazyon.

E nou koman en Lasanble nou devret pouse ki i annan en *Memorial Day* pou tou sa bann viktim.

Pwen 4 dan sa Mosyon se propoz en mekanizm pou konsider konpansasyon e reparasyon pou sa ki'n soufer. Letan nou koz lo konpansasyon pou bann viktim, nou bezwen get tou kote. Premyerman i annan viktim ki'n ganny touye, bann ki'n ganny abize, met dan kaso, bate, torture e menase e i annan ki'n kit pei pou al egzile.

Perdi zot fanmir ou zanmi, perdi zot propriyete, perdi zot louvraz, zot biznes e tousala pa ti byen. E popilasyon an antye i rekonnèt ki sa bann lensidan in kit bann sikatris deryer, i annan menm lanmertim e douler lo leker bokou, kot

bokou larm in ganny verse e bokou leker i ankor pe plere.

Mr Speaker nou'n osi realize ki i annan bokou leker ki pa pou zanmen ganny repare e viv anpe. E i pou annan dimoun ki pou reste tromatize pou lavi. Sa nou bezwen kit antet akoz i annan ki napa konpansasyon okenn sonm larzan ki pou geri sa boubou.

Tousala i bann keksoz ki'n sanz lavi e afekte zot fitir, e pou sa nou bezwen war en fason pou nou kapab rekonpans zot, pou sa ki zot in perdi menm si nou pa kapab retourn bann ki'n ganny touye.

Legzanp tipik Mr Speaker ki reste dan mon lespri ler on mazin Rocky Hermite ek lezot ki'n perdi lavi, napa son larzan ki pou kapab retourn zot prezans. E mon konnen poudir Mrs Livette Hermite, donn li nenport ki sonm larzan, i pa pou retourn son garson ki in perdi, i ankor pe plere ziska ozordi.

Nou bezwen osi mazin Bidze pei, sa larzan ki pou rekonpans sa group dimoun, ki Bidze i pou sorti ladan? Eski i pou sorti dan pos sa parti ki ti responsab pou sa bann atosite? Oubyen eski nou bann frer ek ser e zanfan ki pe grandi ki pou peye?

Bann ki pa'n form parti sa atosite ozordi bokou pe kestyon sa sityasyon si li osi i pou bezwen kontribye.

Mr Speaker san ki nou vwar en fason pou kapab balans sa largiman, nou pa pou zanmen ini. I pou touzour annan lanmertim. Enn bann propozisyon se pou rod konpansasyon avek bann pei ki premyerman zot kapab kontribye finansman, avek zot kapasite.

Bann pei ki ti form parti sa bann group ki'n fer atosite, akoz nou konnen ki ti annan bann pei ki ti siport sa ideoloji spesyalis, ki ti pe ganny enpoze par fors dan nou pei sa lepok.

Sa bann pei petet i kapab ed nou pou fer konpansasyon, pou pey konpansasyon bann dimoun, pou fer konpansasyon ban dimoun vin re-el. Me nou osi krwar ki pou annan bokou *challenge* ek bann lof ki pe ganny propoze.

I pou bezwen annan en *middle ground* ki rezonnab. Alors nou kapab sey komans travay lo en mekanizm, lo ki manner pou pey konpansasyon par morso afen ki a lafen dizour tou dimoun ava'n ganny en pti keksoz pou ede asoupi zot leker, e osi soulaz sa difikilte ki zot in pas ladan pandan sa letan fernwar.

Senkyenmman

promouvwar rekonsilyasyon e linite nasyonal; pou nou promot linite nasyonal parey en msye ti dir dan *meeting* piblik, fodre nou osi isi dan sa Lasanble nou demontre ki si sa linite nasyonal. Nou bezwen donn sa bon legzanp e demontre kote nou ti ava kontan sa pei i ale.

Mr Speaker linite nasyonal osi i pa vin ek en leker anmer nou bezwen konnen ki pou arive ek sa bann kriminel ki'n form parti sa bann atosite, e ki pa'n zanmen vin devan pou demann pardon.

Eski zot pou les koumsanmenm? Ki pou arive? Bokou dimoun ki'n soufer i dir ki zot zis anvi ki sa dimoun i vin devan. E dan bokou ka zot konnen leker sa bann dimoun. Wi, konpansasyon pou ede me vre laverite i vo bokou plis. Eklersi leker sa bann viktim i nou bi pou linite nasyonal.

E sa bann lanmertim pa pou disparet si aksyon neserer pa ganny pran parey Lalwa *TRNUC* i demande pou fer lazistis.

E finalman Mr Speaker parey Mosyon pe demande, pli tar Lasanble a deside ki letan apropiye i ganny akorde pou deba ganny fer lo rapor ek tou sa bann pwen ki pe ganny propoze a ganny pran an kont,

oubyen a ganny adrese. E propozisyon apropiye a ganny met devan Gouvernman pou li konsidere.

Avek sa 2 mo Mr Speaker mon oule aport mon sipor pou sa Mosyon tre enportan anmennen par *Leader* Zafer Gouvernman. Mersi.

(APPLAUSE)

MR SPEAKER

Mersi Onorab Esparon. Onorab Pillay mon pou akord ou dezir pou ou koze an se moman. Mon pa pou met an kestyon ou lentansyon. E mon'n realize ki ou ti'n enn bann ki'n lev lanmen premye, ou annan laparol.

HON SEBASTIEN PILLAY

Mersi Mr Speaker. E bonn apre midi tou koleg Onorab e bonn apre midi tou dimoun ki pe ekout sa deba tre enportan ozordi. E mon ti a kontan zot ekout sa deba tre atantivman.

Zot ekout sa deba tre atantivman pou ekout byen bann keksoz ki pe ganny dir ozordi apre midi. E i a donn zot en lendikasyon ki vre leta keksoz otour sa size *TRNUC*. Mr Speaker depi ler *mover* Mosyon in *move* son Mosyon, in fini donn mwan en lendikasyon ki ti pou al arive avek mon Mosyon ki ti lo *Order Paper*. An premye

lye Mr Speaker, eski Onorab Larue i kapab reste trankil silvouple?

MR SPEAKER

Silvouple kontinyen.

HON SEBASTIEN PILLAY

Mersi Mr Speaker. Rezon mon dir sa Mr Speaker, se akoz dan son prop mo Onorab Georges in konfirm ek mwan poudir i ti pe al vot kont mon Mosyon. Me selman dan son prop mo Onorab *Leader* Zafer Gouvernman, i fer en lapel avek mwan pou linite. Linite oule zet anba mon Mosyon, fer mwan fer legzersis dan gaspiy letan Lasanble zis pou ou vot kont?

Pou ou vot kont en lide ki ti baze lo en rapor ki Lasanble ti'n resevwar. Be annou adres sa rapor ki lasanble ti'n resevwar Mr Speaker. Sa rapor ki Lasanble ti' resevwar ti en rapor ki pa konplet. Ti mank bann dokiman, sirtou bann lezot determinasyon dan bann ka. E nou'n reganny en *pen drive* ki la, mon swete Mr Speaker ki Medya Nasyonal ler i kouver. I kouver sa deba dan tou son tou son bann largiman si i kapab.

E dan sa dokiman ki nou'n gannyen, nou'n ganny la aprezan i enkli son rekomandasyon, son *Volume 1 -*

Lentrodiksyon *background*, son *Volume II - Konteks istorik*, son *Volume III - Framework legal*, son *Volume IV - Amnesty* e son *Volume V - Reparasyon*.

Me mon pa vwar ladan oli lalis bann *perpetrators*? Akoz sa osi pa'n ganny donnen avek Lasanble? Kestyon. I paretman *all along* nou pe ganny demande par L'Egzekitiv, par Prezidan Larepublik pou fer deba lo en rapor ki li swadizan in ganny tou dokiman, ki in swadizan anvoy kot Lasanble tou dokiman, dokiman lalis bann *perpetrators*.

Eski kestyon, parmi sa bann *perpetrators* i annan ki ozordi i trouve dan Gouvernman dan gro pozisyon ki nou le proteze? Eski kestyon parmi sa bann *perpetrators* i annan nou bann zanmi E nou bann dalon? Kestyon. Alors mon demann mon lekor ki rapor ki Onorab Georges vreman atraver ou Mr Speaker i oule nou al fer en deba oubyen i oule nou a ganny konsidere an Zilyet?

Dezyenm pwen, Onorab Esparon atraver ou in admet 4 diferan keksoz, in dir pou dir nou bezwen adres bann defi dan sa rapor parey Onorab Georges in dir. Me ki defi ki annan dan sa rapor, si *TRNUC* in sipoze fini fer son travay e

prezant en rapor avek Prezidan? Ki defi ki pou annan si bann determinasyon in fini ganny fer? Mon pa konpran kote defi pe vini.

Dezyenmman rapor i kompleks. Me ozordi ki nou konnen rapor i kompleks? Alors akoz rapor i kompleks nou bezwen plis letan. Alors lekel ki bezwen plis letan? Eski se *TRNUC* ki bezwen plis letan? Eski se Gouvernman ki bezwen plis letan? Eski se Lasanble ki bezwen plis letan? Nou, nou pa pou kapab sanz naryen dan sa rapor. Sa rapor i en rapor ki vin devan nou ki'n fini travay lo la.

Trwazyenmman, travay pa ankor konplete. Me Mr Speaker *with all do respect*, si travay pa ankor ganny konplete, ki mannyer nou annan en rapor? Pa mwan ki'n dir. *Mover* Mosyon e son segonder in dir. Si travay pa ankor ganny konplete ki rapor ki nou sipoze pe al debat lo la? Se pou sa rezon taler, mon'n enn bann rezon ki mon pa'n *move* sa Mosyon. Akoz mon ti pe antisipe sete sa kalite deba ki nou pou gannyen lo Mosyon Onorab Georges.

E katriyenm pwen, *TRNUC* i bezwen letan pou konplet tou dosye. Me lekel dosye ki reste ankor avek *TRNUC*, pou li konplete ki fer ki nou napa en

rapor ki konplet? Me lozikman en dimoun i bezwen sey eksplik mwan kote problem i ete? Akoz se zot ki pe dir sa bann *statement* Mr Speaker. Sa *mover* Mosyon, atraver ou e son lekip ki pe dir nou sa. So, mon pa ganny en konpran egzaktman ki nou sipoze fer deba lo la.

E se pou sa rezon Mr Speaker, ki mon bezwen met devan ou. Sa i montre prezan nou napa swa pou nou krwar. Be eski i annan serten keksoz ki pe ganny aranze dan serten fason? Eski i annan kek lezot kalite travay ki pe ganny fer e apre koz ek nou lo en baz nou bezwen bipartizan. Ki mannyer ou kapab envit nou pou vin bipartizan, kan lo en kote ou dir ek nou koumsa atosite i tonm devan nou laport? Me selman *perpetrators* ozordi dan Gouvernman dan gro pozisyon.

Eski mwan ki pa'n pran par dan sa bann keksoz, mon sipoze demann leskiz pou sa enn ki ti ansarz prizon Grand Police? Eski mwan? E eski mwan, mon sipoze demann leskiz pou sa enn ki ti al dan prizon pou espyonn bann prizonnyen? Ou vwar?

I annan Mr Speaker e se pous a rezon ki mon pe adres Lepep Seselwa. I annan tout en mank volonte lo lapar

Gouvernman pou adres sa size. Ozordi se Gouvernman ki pe dir nou sa size i konpleks.

E ozordi ki Gouvernman pe komans koz nou poudir rapor pa konplet. Me si rapor pa konplet Mr Speaker, akoz ki Prezidan Larepublik in fer en *statement*, ki dir li in fini anvoy rapor kot Lasanble? konmsi se Lasanble ki bezwen fer en desizyon lo la. Mwan mon dir non Mr Speaker.

Mwan mon dir ki, Lasanble Nasyonal i devret demann Gouvernman pou fer le neserer pou pey dimoun zot reparasyon. E enplimant bann rekomandasyon ki Komite *TRNUC* in met dan son rapor. Akoz sa pa kapab dir mwan rekomandasyon osi pa konplet, pa kapab dir mwan determinasyon pa konplet.

Mr Speaker, mon pa ganny en konpran ki mannyer ozordi dan Lasanble, nou koman en *Caucus* nou ekspekte fer en deba lo en keksoz. Lo en size ki relye avek en rapor ki pa konplet. Eski sa i pa en vyolasyon nou privez koman Manm Lasanble? E permet mwan Mr Speaker, pou adres 2 lezot size.

Nou osi annan, nou osi annan Mr Speaker - nou osi annan en lot size enportan ki nou bezwen konsidere la. E sa

se en size enteraksyon kote mazoriter avek *TRNUC*. I enportan pou nou adres sa size. Nou ganny sa rapor premye ki ti ganny table atraver Clerk ki ti table sa rapor lo *Papers Laid*. Me lot i vin par en lot laport.

So, mwan mon bezwen pran zis sa bann determinasyon, ek sa rekomandasyon koman keksoz ki mon krwar poudir i konplet. E si i annan sa bann rekomandasyon ek sa bann determinasyon, *then* mon dir se Gouvernman ki bezwen adrese. Akoz i annan en problem dan Mosyon Onorab Georges, atraver ou Mr Speaker. Dan son lentervansyon Onorab Georges in koz lo *impose en charge* lo Gouvernman.

Ki nou, nou pa kapab fer koman Lasanble. Mwan mon pe remet sa boul dan lanmen Gouvernman, se ki travay in sipoze ganny konplete e fer ou louvraz.

Pa pas *the buck* avek Lasanble Nasyonal, pou nou prezan dapre zot al diskit en rapor, ki annan en bann defi, ki kompleks ki pa ankor konplete e ki *TRNUC* i bezwen letan pou konplet son dosye.

Mr Speaker sa bann parol i pa mon parol, i bann parol ki mon'n tande la ozordi apre midi. Prezan Mr Speaker, mon

bezwen adres ou e demann ou avek tou respe. Si nou, nou pa ankor ganny rapor konplet, nou pa ankor ganny lalis bann *perpetrators*. Si sa bann dokiman ki la pa ankor konplete Mr Speaker. Ki mannyer nou pou asize pou nou ekout sa deba?

Ki mannyer nou pou asize pou nou debat sa size? E eski pa i ti pou fer plis sans pou nou anmenn en Mosyon ki demann Gouvernman, pou pran son responsabilite? Eski pa i ti pou fer plis sans pou nou dir ek Gouvernman, enplimant bann rekomandasyon travay in fini ganny fer?

Sa ki mon vwar Mr Speaker e mon pa pe *mean sa as a disrespect*. Mon vwar ki Lasanble pe zis *delay, delay* pou pran en desizyon lo en size ki'n sipoze annan determinasyon ki'n ganny fer. E ozordi ki nou pe tann leskiz ki rapor pa ankor pare, oubyen rapor i bezwen ganny fer ankor.

Avek tou respe Mr Speaker, i difisil pou mwan vwar ki mannyer mwan ek mon *Caucus* dan Lasanble nou kapab asize e partisip dan *what is clearly en pre-arranged* - en *pre-arranged* - en keksoz ki'n ganny aranze, zis pou ki en kote latab ki annan en mazorite vin anvoy labou lo nou.

Kan saler pa nou ki sipoze resevwar sa labou. Me se lotorite ki'n ganny sa rapor e in anvoy li kot Lasanble. E in anvoy li an bout.

Prezan mon demann ou pou klarifye en keksoz Mr Speaker, atraver ou lofis. Si se *State House* ki'n anvoy sa premye rapor ki ti manke, ki manner *State House* li osi in ganny zis en bout rapor?

Ki manner i annan; sa kestyon i bezwen ganny reponn. *Because it goes to the heart of the matter* ki devan Lasanble ozordi. Eski *State House* pe *withhold* lenformasyon ki *TRNUC* in donn li? Eski i annan lezot keksoz ki *TRNUC* in met devan ki nou, nou pa konnen?

Mr Speaker mwan mon pou dir avek ou, ki ozordi apre midi, fransman mon dezapwente ki manner sa Lasanble pe fer keksoz.

Akoz sa ki'n arive bomaten nou'n ganny en lapel pou linite dan sa Lasanble, bomaten nou'n vwar ki poudir ou pa kapab demann en lape linite e fer sa bann prosedir ki nou'n fer bomaten.

Dezyenmman, nou pa kapab dir pou dir nou annan en lapel linite. E apre anmenn en Mosyon fer lapel pou linite, dir ou pe anvoy en lanmen avek nou me selman par deryer ou

vire ou pran en kouto ou plonz dan nou ledou.

Pa kapab fer sa Mr Speaker, sa pa apel en lapel linite. En lapel linite se si Lasanble i dir be *ok*, *TRNUC* in fer son travay, in fer son bann determinasyon annou pran aksyon lo sa determinasyon pli vit posibil. Annou pran en desizyon!

Kwa ki pe anpes nou pran en desizyon lo sa bann determinasyon, si nou dir pou dir sa rapor i devan nou? Rezon Lepep Seselwa, rezon nou'n tandre apre midi. Rezon se ki lo kote mazoriter i dir ou rapor pa konplet, i dir ou rapor i kompleks. I dir ou rapor pa ankor fini.

Me Mr Speaker ki manner nou kapab set letan kan nou napa en rapor ki konplet. Se pou sa rezon Mr Speaker ki mon krwar poudir ti'n devret annan en *attempt* pou met en rapor devan nou, ki anmenn tou sa bann lenformasyon.

I bezwen annan en rapor ki anmenn tou sa bann lenformasyon. Akoz sa dimoun ki'n inisye sa diskisyon, se Prezidan Larepublik li menm. Mon pa pou, mon pa kapab kestyon keksoz ki Prezidan in dir. Me mon bezwen demann en kestyon. Si nou, nou'n ganny

en rapor ki Prezidan ti'n gannyen, ki mank bann bout ladan. Eski Prezidan li menm in lir sa rapor pou war i annan bann bout ki manke? Eski li menm i annan rapor ki pa konplet?

Akoz levidans i konkret devan nou, prezan ki nou ganny sa rapor. E prezan ki mwan mon'n met sa *pen drive* e depi bomaten, kan mon'n resevwar sa *pen drive* mon pe gete mon pe regard tou sa bann dokiman.

E mon ti a kontan ki nou sey ganny en pe proteksyon koman Manm Lasanble, pou resevwar lenformasyon ki nesese pou nou kapab fer nou louvraz.

E mon dezapwente Mr Speaker. Mon dezapwente aköz mwan mon'n swazir bomaten pou pa pran letan Lasanble e pou anmenn nou *droite au but*, pou anmenn nou ver en vre finisyon. Pou anmenn nou ver en vre konklizyon lo sa size. Pou anmenn nou ver dir Gouvernman fer le nesese pou pey dimoun zot reparasyon. E enplimant bann rekomandasyon ki Komite *TRNUC* in met dan son rapor o pli vit posibil.

Pou anmenn nou laba kot *TRNUC* in anvi anmenn nou. Be zot pa sa ki zot le fer. Zot pe retourn nou ankor deryer pou

nou al revwar rapor ki kompleks ki pa konplet. Mr Speaker mon sa ki mon pe al dir la, e sa ki mon pe al fer mon fer li an tout respe.

Mon pa kapab an bonnfwa asize e partisip dan en deba kot mon napa tou lenformasyon. Mon pa kapab an bonn fwa asize e respekte, e respekte lefe ki ou vin dir ek mwan poudir rapor pa konplet, rapor i kompleks, rapor i manke.

Mr Speaker mon pa kapab aktive e aksepte ki Lasanble Nasyonal pa'n ganny respe. Pa'n ganny respe par lefe ki nou pa'n kapab table sa rapor devan Lasanble Nasyonal. E finalman Mr Speaker mon pa kapab aksepte ki nou kontinyen fer soufrans sa bann dimoun ki nou dir in soufer. Kontinyen pou plis letan zis aköz nou les kor pwen politik.

Desizyon i devan nou Mr Speaker, determinasyon in donn nou, rekomandasyon in donn nou. Sa ki reste pou fer se ki Gouvernman i enplimant sa bann determinasyon. E i enplimant sa bann rekomandasyon. Avek sa Mr Speaker an liny avek *Standing Order* mon pou *exercise* mon drwa ozordi apre midi, pou mwan proteste par montre ki poudir lafason ki keksoz pe

ganny fer avek sa rapor i en problem pou mwan.

E la mon oule met kler lo rikord Mr Speaker. Mon oule met kler lo rikord mwan mon napa okenn problem avek diskrit sa rapor. Mon napa okenn problem avek pran sak sapit sa rapor. Sete sa mon lide orizinal mon napa okenn problem al dan tousala mwan mon *ok*, ek diskrit sa rapor. Me aret dir nou i konpleks, aret dir nou i pa konplete, aret dir nou poudir isi, aret dir nou poudir i laba. Si rapor in fini ganny fer Mr Speaker nou diskrit li annou fer determinasyon, lo bann determinasyon sa rapor.

E annou aksepte sa bann determinasyon e annou *deal* avek sa bann rekomandasyon, i senp!

Mon pa war akoz nou bezwen konplik lavi pou al dan en Mosyon pou rod 4 sepa 5 pwen, si nou le donn plis larzan donnen me annou deal ek sa bann keksoz ki la. Non Mr Speaker, ou konnen ki pe arive? Sa i akoz en kote pe swazir pou fer politik avek sa size *TRNUC*.

E mwan Mr Speaker, mwan Mr Speaker mon pou enplor ou anba *Standing Order* mon pou *exercise* mon drwa apre ki sa deba lo sa rapor in fini mon a retourn dan Lasanble zot a pran desizyon ki

zot in pran e nou ava kontinyen.

Me selman Mr Speaker mwan ek mon *Caucus*, pa pou partisip dan sa deba, pou nou kontinyen ekoute poudir rapor pa konplet e rapor i konpleks.

Mon remerci ou Mr Speaker, pou donn mwan letan pou koze mon remerci ou Mr Speaker, pou permet mwan pou *state* pozisyon mon *caucus*. E mon ti a kontan met lo rikord Mr Speaker ki tou dimoun i tande ki lafason ki mon'n koze i okenn ka en mank respe pou ou, *for the Chair* e nou Lasanble. Me i montre ki poudir mon pa satisfè e mon pa dakor avek lafason proses pe ganny fer dan sa Lasanble an sa ki konserne travay ki nou bezwen fer. Mon remerci ou Mr Speaker.

(APPLAUSE)

MR SPEAKER

Onorab Pillay! Mon pou zis fer en remark avan ou sorti, se ki ler ou ti lev lanmen ou'n dir mon pa pe dout ou lentansyon, me selman mon ti mazine i bon pou ou montre ou vre lentansyon. Me selman ou a konpran aprezan akoz mon dout ou parol ler ou dir ou le fer en tel keksoz.

E ozordi ou'n swazir pou koz avan, zis pou permet ou sorti dan Lasanble. Mon aksepte sa mwan, ou proteste, ou proteste. Mersi, nou a kontinyen Onorab Esparon ti'n lev son lanmen, ou annan en *point of order*?

HON REGINA ESPARON

Mersi Mr Speaker. Mr Speaker mon oule *raise en point of order* anba 61(1)(d), zis pou mwan anba *interpretation* pou mwan koriz en *misapprehension*. Mon pa'n dir pou dir i annan defi dan rapor, annan diferans ant *challenges in the report* avek *challenges around the report*. Mon'n dir i annan defi otour sa rapor, bann defi konpansasyon bann keksoz koumsa. Mon pa'n dir i annan defi dan rapor mwan. Zis pou koriz *Leader Lopozisyon*. Mersi Mr Speaker.

(All US Members walked out as a sign of protest)

MR SPEAKER

Mersi Onorab. Mon aksepte ou klarifikasyon. Nou a kontinyen Onorab Woodcock.

HON WAVEL WOODCOCK

Mersi Mr Speaker. Mr Speaker sa *walking out* ki ou pe war *United Seychelles* fer ozordi apre midi i en keksoz byen

kalkile, akoz nou tou nou konnen poudir zot per sa rapor akoz bann laverite ki dan sa rapor.

(APPLAUSE)

HON WAVEL WOODCOCK

Mr Speaker. Ozordi nou pe war lipokrizi dan tou son splander, sirtou par *Leader Lopozisyon*. Mon a eksplik sa lipokrizi, annou get Mosyon orizinal *Leader Lopozisyon* ki'n retire bomaten. Mosyon anmennen par Onorab Sebastien Pillay,

In accordance with Order 30 of the standing Orders, the assembly shall resolve itself into a Committee to discuss the report of the Truth Reconciliation and National Unity Commission."

Li i pe akiz nou konmkwa nou pe met retar avek sa proses selman sa Mosyon ki i ti anmennen orizinalman li menm Mr Speaker sa Mosyon ti pou met plis retar avek sa travay ki sa *Commission* in fer.

(APPLAUSE)

HON WAVEL WOODCOCK

Dapre son Mosyon ki in anmennen Mr Speaker, nou ti pou bezwen pran sa rapor sapit par sapit, ka par ka e i annan environ 374 konplent Mr

Speaker bann atosite bann e vyolasyon drwa imen pandan 1977 ziska 1992 pandan letan parti inik.

Si nou ti fer sa Mr Speaker, ti pou pran nou ankor lan, 2an nou ti pou bezwen al refer travay *TRNUC* ki ti pou met plis retar lo bann propozisyon ki Onorab *Leader of Government Business*, Onorab Bernard Georges in propoze dan son Mosyon, ki i pe vin avek solisyon rekomandasyon avek e bann aksyon tanzib pou nou soulaz e donn konpansasyon e *sort out* sa *issue* e met sa size koudeta par deryer nou en fwa pou tou Mr Speaker.

Lentansyon *US* Mr Speaker se pou zot taye menm, akoz zot per sa rapor Mr Speaker. Zot pa anvi koz lo sa rapor Mr Speaker sanmenm sa zot in taye akoz zot konnen Mr Speaker. E mon pou dir ou en keksoz mon pa pou bliy sa zour dan nou *caucus meeting* Lendi, avan ki *LGB* ti deside pou li al dan *ABC* pou enform *ABC*, konmkwa i ti annan lentansyon pou li anmenn en Mosyon, pou nou debat lo sa rapor, i ti anmenn sa dan *ABC*.

E zis apre ki i ti diskrit sa dan *ABC*, deswit apre, ki *Leader* Lopozisyon ti fer Mr Speaker? I ti taye i ti anmenn en Mosyon, e

la in war son Mosyon i en problem pou li e son bann Manm pe met presyon lo li, akoz napa enn ant zot ki anvi nou al an detay lo rapor *TRNUC*.

Bomaten i vini i sey fer krwar, "Arr ou konnen" i sey amann son Mosyon pou pran bann pwen ki *LGB* in met dan son mosyon byen kalkile pou li amann son Mosyon Mr Speaker. Apre i a dir nou ki pe sey met retar avek travay Lasanble Nasyonal Mr Speaker.

(APPLAUSE)

HON WAVEL WOODCOCK

Ipokrizi dan tou son splander! Mr Speaker sa Komisyon ti ganny etabli pou fer keksoz vremen enportan, laverite. Akoz Lepep Seselwa ti deserve pou konn laverite ki'n arive dan nou pei pandan parti inik e menm bann lezot keksoz ki'n arive en pti pe apre ki nou ti retourn dan miltiparti.

Dezyenmman Mr Speaker, lentansyon se pou donn dimoun *closure* e apre pou nou anmenn rekonsilyasyon nasyonal. Rekonsilyasyon e linite dan nou pei. Sa ki zot in fer ozordi Mr Speaker i montre poudir zot napa okenn lentansyon pou anmenn linite dan sa pei! Me mon pe enplor zot mon bann frer ek ser dan

Lopozisyon, sanz zot mantalite! Annou serye nou dan nou travay dan sa Lasanble Nasyonal!

Mr Speaker 375 konplent, en kantite Mr Speaker. Mr Speaker 396, (*sorry* 596 mon *mistake* Mr Speaker, 496. Mr Speaker ler ou pe kalkil tou sa bann keksoz ki'n arive, in ariv en moman dan nou pei kot nou bezwen pran bann desizyon.

TRNUC in fer en louvraz, Lepep Seselwa in war ki'n arive rapor ki zot pe dir zot napa lenformasyon lo la in ganny sorti ou kapab *download* e i an piblik, tou dimoun i annan akse avek, tou lede kote in ganny kopi rapor. La in ariv sa moman pou nou rod solisyon pou nou fer bann rekomandasyon tanzib pou nou *deal* avek rekomandasyon ki *TRNUC* in fer sorti dan sa rapor.

Mr Speaker i kler parey mon'n dir poudir i pa lentansyon *US* pou zot depouy sa rapor, menm si dapre zot, zot anv i pa zot lentansyon pou zot met retar avek sa travay, ouswa pou get dan *welfare* sa bann dimoun ki dayer zot parti in viktimize.

Menm si ozordi zot pe zwe bon boug ki zot pa ti la, zot pa okouran, zot pa konnen. Selman ozordi mon war Mr Speaker poudir zot *Leader* i

ankor pe glorifye Prezidan Albert Rene, atraver bann *statement* ki zot ankor pe fer Mr Speaker!

“Si zot mor dousman pa nou lafot”

“ Si zot mor vit pa nou lafot osi”,

“En bann pou fini anba pon.” Zot ankor pe servi sa bann kalite fraz, sa bann kalite *statement* ki zot Prezidan ti fer dan lepase dan bann letan ki i ti pe fer sa bann atosite, sa bann krim! Si zot vreman senser reste dan Lasanble vin ed nou depouy sa rapor, travay lo sa rapor, ed sa bann viktim ganny *closure* Mr Speaker.

E *LGB* son Mosyon ki in anmennen i kler, i detaye, i pe rod solisyon. In propoze ki an Zilyet nou pran sa rapor nou debat lo la e dan nou bann deba nou ava fer bann rekomandasyon. Nou ava gete bann fason ki mannyer nou pou *deal* avek sa bann rekomandasyon ki dan sa rapor ki *TRNUC* in fer.

1) in dir rezondet akoz *Leader of Government Business* in anmenn sa Mosyon se pou konklir travay ki reste pou Komisyon fer. Laverite in sorti. Ozordi nou konnen ki'n arive avek Claude Monnaie.

Claude Monnaie e mon konn son fanmir vreman byen

Mr Speaker, mon konn son fiy, mon konn son madanm. Ozordi nou konnen ki'n arive avek Hassan Ally Mr Speaker mon pa al an detay lo la sa nou ava al pli tar aköz i vremen fermal.

Ozordi nou konnen ki'n arive avek Damandra Eulentin, e ozordi nou'n war dan sa rapor ki kantite alegasyon bann zenn fiy ki'n ganny vyole, vyole par ex Prezidan Albert Rene. Wi, i dan rapor Mr Speaker kot bann madanm in vin devan in rakont zot parkour, sa bann labi, sa bann *rape* ki zot in sibir anba miltiparti.

Mr Speaker *LGB* osi pe demande ki nou etabli en arshiv pou sa komisyon gard rikord. Aköz i enportan pou nou gard rikord Mr Speaker? Pou nou ganny referans pou nou aprann en lesen, pou nou pa zanmen dan nou listwar, ouswa dan nou fitir repet ankor sa ki'n arive aköz in anmenn bokou divizyon e met bokou retar nou pei.

In sizer en fason pou komemor bann viktim Dezyenm Repiblik Mr Speaker, tir Zonm Lib zet dan bannann Mr Speaker! Mon rekomandasyon olye met en stati Albert Rene *Peace Park*, met en stati ki pou komemor tou nou bann fer ek ser ki'n ganny touye, vyole, bate, viktimize met dan prizon,

fors an egzil, fer en stati met dan *Peace Park* pou komemor nou bann frer ek ser ki sa Gouvernman.

(APPLAUSE)

HON WAVEL WOODCOCK

SPUP, SPPF, United Seychelles in fer pandan Dezyenm Repiblik Mr Speaker. Sa i en fason ki nou kapab komemor nou bann frer ek ser ki'n perdi zot lavi, ki'n soufer vyolasyon son drwa Mr Speaker.

Sa ki pli enportan Mr Speaker se pou nou debat e konsider en mekanizm pou konsider konpansasyon e imerasyon pou sa ki pe soufer, sanmenm Mr Speaker zot pe met retar, sanmenm zot in *walk out* Mr Speaker.

Ou konnen aköz Mr Speaker? Mwan mon an deor mon koz ek bokou Seselwa, nou tou bann Manm lo nou kote nou koz ek bokou Seselwa, ou konnen ki Seselwa deor i dir en bon pe? Mon kapab dir en gran mazorite, zot krwar ki *US* ki merit pey konpansasyon bann viktim.

(APPLAUSE)

HON WAVEL WOODCOCK

Aköz zot ki loter sa bann atosite ki'n arive dan nou pei!

Vann zot *assets* e pey sa bann viktim. Se *SPUP*, *SPPF*, *US* ki'n merit pe fer reparasyon, me an menm tan i annan en cours nou popilasyon - sa mon pe dir ou tou bann fason rezonnen la deor - i annan en kous popilasyon ki i pe dir ki i responsabilite Gouvernman menm si ladministrasyon in sanze, pou pey konpansasyon.

Me le kestryon ki nou bezwen demande, me eski nou annan, eski nou annan sa mwayen ekonomikman? Ki lenpak finansyel lo pei ki pou annan si sa larzan i sorti dan *taxpayers money* dan kof Leta? I annan serten konplikasyon nou bezwen mazin lo la. Tousala nou bezwen konsider tou sa nou bezwen diskite, tousala nou bezwen koze e etre fran.

Bokou zenn ki'n ne apre 1977 zot annan zot rezervasyon lo servi zot larzan, zot larzan ki zot in pey *tax* pou pey konpansasyon bann atosite ki zot pa'n form par ladan.

E osi bann viktim osi pou bezwen osi pe pey bann lezot viktim, akoz i annan bann viktim osi viktim i pey *tax* li. So, ou pe demann sa bann dimoun ki pa'n form par sa atosite pou pey konpansasyon.

So, tousala i bann kestryon ki la deor ki nou bezwen debate,

me si nou rekonnèt poudir nou bezwen rod en fason pou *compensate* bann viktim. E dela i annan serten travay ki pe ganny fer, parey nou'n war deza nou Gouvernman pe fer en legzersis pou rann plizyer bann dimoun zot later ki'n ganny sezi par Gouvernman avan.

So, i annan sa volante pou nou rod en fason pou donn reparasyon sa bann dimoun. I enportan Mr Speaker parey mon'n dir nou bezwen anmenn linite nasyonal. Sa i lenportans e bi prensipal ki benm Lasanble ti etabli sa *Truth and Reconciliation (TRNUC)*. Nou pa kapab pronons sa travay. E pou Rekonsilyasyon Nasyonal arive nou pa kapab kontinyen *condone* bann atosite ki'n arive, sirtou pandan letan parti inik.

Prezidan Faure, Onorab Georges in dir dan *Tête à Tête*-i ti dir "ki sa bann atosite Dezyenm Repiblik pa ti merit arive." I pa zistifye. Me kontrerman avek Mr Faure, nouvo kandida *US* Mr Herminie e plizyer Manm parti *US* enkli bann dan sa Lasanble Nasyonal, zot pe glorifye defen Albert Rene! E sa bann atosite!

I annan ki'n dir koumsa, "I byen, ti byen sa bann atosite in anmenn nou kot nou'n arive ozordi". E get kot nou'n arive

ozordi zot in *walk out*, zot in taye.

Mr Speaker *Leader of Government Business* in detaye i kler e i pe vin avek bann propozisyon solid, e sa Mosyon pou donn tou Manm loportinite e ase letan pou koz lo rapor *TRNUC*. E Zilyet nou a vini nou ava depouy sa rapor. I pe koz lo, *Leader* Lopozisyon pe koz lo propagann fer politik lo sa rapor Mr Speaker? Mon a dir ou ki propagann ki *US* in fer avan ler ki son Mosyon i vin devan Lasanble.

I servi son bann *rumor mills*, son bann zwer, son bann *fake profile* ek lezot bann siporter nou met lo rezo sosyal plizyer bann *statement* ki repete la Mr Speaker.

Mon kapab depouy sa *speech* ki *Leader* Lopozisyon in fer, *LOTO* in fer e met tou sa bann *post*, sa bann propagann *US* lo *Facebook* e met ansanm ou war poudir zot in fer en travay kalkile, zot konnen ki zot pe fer, zot konnen ki zot azanda. La mon ava dir ki *Leader* Lopozisyon in dir pou montre ou ki fason zot sey manipil nou pep Seselwa deor.

Ki in dir li? “Nou pe sey protez bann *perpetrators* aköz zot *LDS*.” Mr Speaker i fer riye, tou Seselwa la deor in ekout lo *SBC* nou ekout nou swiv plizyer

TRNUC lo *SBC*, rapor nou annan tou Seselwa i konn laverite lekel bann *perpetrators* i ti *live* li Mr Speaker.

E plizyer sa bann *perpetrators* in vin devan, zot in admet poudir kote, lekel ki’n donn zot lord pou fer sa bann atosite pou touy sa bann dimoun. Zot in koz laverite avek en kondisyon ki zot ganny *amnesty*. Zot in vin devan, aköz si i pa ti pe donn *amnesty* nou pa ti pou zanmen konnen ki’n arive dan Dezyenm Repiblik!

Zot in vin devan sa ki’n koz mansonz, sa ki pa’n koz laverite pou annan konsekans me i annan en bann ki’n vin koz laverite e ozordi nou konnen.

MR SPEAKER

15minit Onorab.

HON WAVEL WOODCOCK

Bann *state agent* Mr Speaker ki’n enlike dan sa bann keksoz e tou sa bann atosite Mr Speaker in arive anba Dezyenm Repiblik, e sete lekel parti ki ti la Mr Speaker? Sete zot parti. Pa manz zot bannann apre anvoy zot lapo lo nou.

La i sa lokazyon ozordi Mr Speaker pou nou fer sa prosis, pou nou vin ansanm pou nou determinen ki fason ki nou pou *deal* ek sa rapor. Ki manner nou pou depouy sa

rapor, vin avek bann propozisyon bann rekomandasyon tanzib *of course* an prenon kont bann rekomandasyon ki *TRNUC* in fer, prezan nou annou vin, annou rod solisyon.

Annou *gave a way forward*, kwa ki nou kapab fer pou nou remedye sa ki'n arive dan lefase, e rod en fason pou nou soulaz nou bann frer, nou bann ser la deor ki'n viktim, ki'n ganny abize, ki'n ganny vyole, ki'n perdi zot lavi, ki'n soufer pandan parti inik.

Sa i sa moman sa lokazyon. Me i malere Mr Speaker pou konklir ki nou bann frer lo lot kote latab pa la, i montre klerman ki zot pa enterese zot rod tou leskiz pou zot pa la aköz zot per.

Zot per zot lonbraz, zot per zot pase me selman ler i arive ler pou fer zot konvansyon, zot tou zot mont devan, zot bat lanmen zot dir bravo Albert Rene pou tou sa ki in fer. Olye ede anmenn reparasyon; ed nou pei bouz devan.

Avek sa de mo Mr Speaker mwan mon pou siport sa Mosyon anmennen par *LGB* ozordi. Aköz mon krwar nou pou ganny solisyon *going forward*, avek sa 2 mo mon dir ou mersi Mr Speaker.

(APPLAUSE)

MR SPEAKER

Mersi Onorab. Mon pou aplik sa limit letan aköz zis pou lakantite Manm ki nou annan ki oule koze. Onorab Philip Arissol.

HON PHILIP ARISSOL

Mersi Mr Speaker. Bonn apre midi Mr Speaker, bonn apre Midi tou koleg Onorab. Tou dimoun ki pe swiv nou e osi bann *US* ki pe get nou lo televizyon.

Mr Speaker ler nou konsider rapor Komisyon Laverite, Rekonsilyasyon e Linite Nasyonal, *TRNUC* ki ti ganny soumet avek Lasanble Nasyonal annakor avek Lalwa *TRNUC*, i enportan pou nou rod fason pou konklir e konsider lenportans travay sa komite, tel ki etabli en fason kree e pou protez larsiv ki sa Komisyon in akimile.

Swazir en fason pou komemor viktim Dezyenm Repiblik ki ti sibir bann atosite. Rapor *TRNUC* i en letap enportan dan direksyon pou rezourd vyolasyon drwa imen, ki ti arive pandan letan Dezyenm Repiblik. E i enportan pou ki larestan travay Komisyon *TRNUC* i konplete, pou kapab realiz sa i neser

pou ki nou koman en Lasanble nou pa zis depouy sa rapor, me vin avek bann rekomandasyon.

Mr Speaker rekomandasyon kot viktim e osi bann ki'n asiste sa bann vyolasyon ouswa komet sa bann tel aksyon i kapab finalman ganny en *closure*. Pou ki nou koman en Lasanble nou kapab batir lo progre koman en Nasyon, (eskiz mwan Mr Speaker) pou nou koman en Nasyon nou kapab batir lo progre e evite ki bann tel sityasyon pa zanmen repete dan nou pei, e i enportan ki travay Komisyon i ganny konplete dan son totalite e ki nou bann zanfan e pti zanfan i ganny enstri ki ti vreman arive pandan sa letan.

Sa i ava vin atraver etabli en lenstitisyon devoue, ouswa en lorganizasyon ki responsab pou konserv e prezerv sa bann dokiman tre enportan ki sa Komisyon in dekouver. Sa i kapab enplik travay e lenstitisyon ou arshiv ki egziste deza; tel ki Libreri Nasyonal ki an renovasyon, ouswa Mize Nasyonal, ouswa etabli en nouvo lenstitisyon spesyalman pou sa lobzektif.

Mr Speaker komemorasyon viktim Dezyenm Repiblik i en parti enportan dan prosesis

rekonsilyasyon, sa i kapab enplik kreasyon moniman, nonm semen ouswa lespas piblik an loner sa bann viktim ouswa etabli en dat kot sa bann viktim a ganny onore.

E fer ki sa dat i vin en levennman anyel, kot pei i onor sa bann viktim. Konpansasyon e reparasyon pou viktim e pou bann fanmir, i osi ganny konsidere koman enportan. Sa i kapab enplik konpansasyon finansyer, akse avek swen lasante ouswa bann lezot servis ouswa bann form sipor.

Mekanizm pou asiste bann viktim ouswa zot fanmir avek en konpansasyon e reparasyon i devret zis transparan e aksesib pou tou viktim e bann fanmir ki'n sibir anba sa sistenm ki'n vyol zot drwa.

Mr Speaker an zeneral i enportan pou nou abord sa bann problem avek sansibilite e respe pou tou bann dimoun ki'n eksperyans e ganny afekte par sa bann vyolasyon drwa imen, pandan sa letan Dezyenm Repiblik.

Travay da direksyon pou rekonsilyasyon e gerizon pou depan lo zefor e komitman pep Seselwa pou met sa bann zafer deryer nou e regard ansanm ki manner nou koman en Nasyon nou kapab rekonstri nou pei.

An plis aksyon spesifik pou sa bann sityasyon i enportan pou kontinyen ankouraz en kiltir drwa imen, lazistis e rekonsilyasyon dan pei.

Sa i kapab enplik konpanyan ledikasyon e sansibilizasyon zefor pou ankouraz enklizyon sosyal ekonomik ek egalite, avek linisyativ pou ranforsi lenstitisyon e proses demokratik.

Mr Speaker Mosyon ki Onorab Georges in prezant devan nou Lasanble lo rapor *TRNUC*, i montre langazman Gouvernman *LDS* pou abord sa size vyolasyon drwa imen pandan Dezyenm Repiblik dan son totalite; etabli en letan an Zilyet kot sa travay i a kapab ganny fer.

Savedir pa zis koz lo sa rapor me anmenn rekomandasyon pou ferm sa sapit, ankouraz rekonsilyasyon e linite nasyonal pou ki nou koman Seselwa nou kapab ini e viv koman en vre nasyon.

Mr Speaker avek sa 2 mo, mwan mon pou aport mon sipor pou Mosyon Onorab Georges. Mersi.

(APPLAUSE)

MR SPEAKER

Mersi Onorab. Onorab John Hoareau.

HON JOHN HOAREAU

Mersi Mr Speaker. Mr Speaker dabor mon oule remerci - avan mon komanse mon oule remerci tou bann *Commissioners* Mrs *Mcintyre*, *Mr Green*, *Mrs Purvis* ensi ki lezot bann *Commissioner's* mon pa tro mazin zot non, pou sa gro travay ki zot in fer pou dekouver laverite. Avan mon komans mon prezantasyon, mon ti a kontan osi lir detrwa laliny nou manifesto anba "Transformation to a new Seychelles" ki Prezidan Wavel Ramkalawan in ekrir.

Son *forward* i lir koumsa; "Nou pei in antre dan en letan, dan en nouvo letan. Ozordi nou kontan e fyer ki nou pe fer Sesel retourn lo en semen liberte e demokrasi. Nou dimoun i konnen ki zot kapab koze e zot kapab ganny tande. Zot konn zot drwa imen e zot konn zot drwa koman en sitwayen." Sa i sa detrwa laliny ki'n provok mwan pou mwan kapab fer mon prezantasyon ozordi.

Mr Speaker i enportan pou piblik konnen e konpran, ki premyerman Lopozisyon pa oule sa pep inifye. Lopozisyon pa oule ki nou annan en konklizyon pou sa bann viktim

ki'n soufer, atraver atosite par zot Gouvernman.

Sa ki Lopozisyon i anvi se kontinyen diviz sa pep. Kontinyen gaspiy letan Lasanble atraver en Mosyon, ki ti pou kidnap letan Lasanble pou LOTO ganny airtime san restriksyon dan en Staz Komite ziska zour eleksyon 2025.

Seselwa ozordi nou pe deal ek en lopozisyon ki sitan fay politikman, ki zot sel zouti e stratezi politik se pou senm divizyon, kre rankin, kre konfizyon e anpandan lo tou rimer lo *social media*, pou zot fer pas koman laverite. Zis parey en dimoun ki pe noye e i pe sey atrap en fey ki flote o bor li, pou li sey sov son lavi. I pa drol alor ki zot pe perdi sipor de zour an zour.

Mr Speaker si US i le reste relevan pou zot, zot bezwen denons sa koudeta. Zot bezwen denons atosite ki'n ganny komet par zot parti, ki sanz non parey kanmeleon. Zot bezwen denons zot per fondater ki ti vol sa pei. Zot bezwen anmenn nouvo lide demonstre matirite politik dan plas fer kankan ek Speaker tou lazournen.

Zot bezwen ede konstrir sa pei olye reste zis pri dan negativite e *boycott*, zot bezwen pran sa gitar en lakord ki zot zwe avek sa note mefyans,

mefyans, mefyans zet sa dan bin.

Mr Speaker ti mon swe pou vwar en joint Motions lo sa size parey ex Prezidan Faure dan son sazes ti dir ler i ti fer sa interview dan *Tête à Tête* Si nou rapel byen ler Leader Lopozisyon dan 6enm Lasanble Onorab Ramkalawan *ti* anmenn sa Mosyon pou etabli *TRNUC*, (*TRNUC*) i ti fer li koman en joint Motion bipartizan kot i ti ganny sipor *US*.

I ti propoz Mosyon e sete Onorab De Commarmond ki ti segonde, alor akoz la Lopozisyon pa'n sezi sa loportinite pou fer menm parey. Zis i montre ou ki Lopozisyon i la pou detri linite. Zot pa serye. Les mwan dir zot en joint Motion pa'n arive akoz Lopozisyon in mentenir pou li kit son pozisyon lo sa size.

In le *kidnap* letan Lasanble senpleman pou li ganny letan pou li fer son politik bon marse.

Mr Speaker Mosyon Onorab Georges ki devan nou i enn ki'n byen detaye a plizyer morso oubyen lobzektif. Premyerman nou bezwen rekonnnet ki travay ki Komisyon pou Laverite Rekonsilyasyon Linite Nasyonal pa ankor ariv a son lafen. Pandan sa 3an edmi ki sa komisyon in travay in

ekout anviron 496 konplent, e entervi plizyer santenn dimoun ki'n swa bann viktim oubyen bann lezot temwen.

Bann ka i varye depi mert, disparisyon, anprizonnan san zize, akizisyon later, viktimizasyon dan travay, pouse dan travay, labi fizik, labi seksyel, persekisyon e lezot problem ki direktman ou endirektman lye avek sa rezim barbaric ek diktater, ki ti kontrol pei pou sa 43an. Dan sa 496 ka, 321 ka i bann ka direk parey nou apel li bann prima facie admissible cases.

27 ka i bann ka ki bann dimoun, sorry 27 ka i pa'n ganny admet vedit napa ka pou reponn. 22 ka i bann ka ki'n ganny retire e 126 ka i reste pending ziska prezan. Alors sa travay li menm an term bann ka ki reste pending i annan nesite pou al o pli o profon pou etabli si i annan en fot ki'n ganny komet, alor pou rann lazistis pou sa bann dimoun nou bezwen kontinyen fer sa travay sa lenvestigasyon pou rod en solisyon pou zot.

Petet la mon ti ava sizere ki en tribinal i ganny formen pou ekout sa bann ka ki tonm dan sa kategori.

Dezyenman Mosyon pe demande ki en larsiv i ganny dezinyen pou tenir sa bann

dosye *TRNUC*, ler nou get listwar Sesel depi ler bann premye zans setadir sa 15 Blan, sa 3 Endyen e sa 8 Afriken ti met lipye lo zil Ste Anne, avek bi pou komans en letablisman, rapor anyel total in ganny fer.

Sa bann rapor in ganny garde koman bann temwen aktivite imen e sa bann sours in ganny dokimante dan bann liv e dan nou Mize Nasyonal e dan nou larsiv.

Sa i fer ki ozordi nou zanfan i kapab lir e konnen, konn listwar nou desandans e nou legzistans koman en pep metisaz. Alor Mr Speaker i toutafe normal ki listwar resan nou pei dan Dezyenm Repiblik, i osi ganny en repozitwar kot nou zanfan e nou pti zanfan i a ganny sans vwar e pran lesan dan sa ki'n pase, i enportan ki sa ki'n pase pa zanmen repet son lekor.

E la mon oule propoze ki ler nou diskit sa rapor ki Gouvernman i donn sa legzistans, en bon lekout. E i osi idantifye en repozitwar pou listwar resan koman en priyorite nasyonal. Mon okouran ki osi ki Fondasyon Gerard Hoareau, in osi demann en morso later pou fer en memoryal pou sa koz.

Mr speaker parey loter sa Mosyon in fer resorti, nou pou

bezwen fer en refleksyon lo ki fason nou komemor sa bann viktim. Mon konnen ki i annan bokou portre ki'n ganny anmennen koman laprev serten atosite. Dizon parey bann portre ki'n ganny pibliye dan bann zournal, ki ti raport lo sa bann lensidan.

Menm si bann lartik ki ti pou prop Gouvernman sa lepok, me bann portre i reste touzour temwannayaz. E en sours ki nou kapab, nou kapab met li dan nou larsiv.

La mon pe mazin lensidan bonm dan loto Anse Forbans ler Simon Denousse ek Mike Asher ti ganny touye. E plase dan sa loto, tou sa bann portre Mr Speaker i bann temwannayaz vivid sa bann levennman. E nou bezwen garde pou nou bann zanfan kapab vwar.

Petet menm konsidere propoz en mize *wax model*, ki kapab ganny aranze pou depikte bann *scene*. Sa i a donn valer azoute lo kote tourism osi.

En tel lekspozisyon i annan potansyel pou vin en latraksyon touristik ki ava anmenn deviz. E parey *Rwanda* in fer avek sa sapit sanglan letan ti annan sa zenosid.

Mr Speaker size konpansasyon e reparasyon i enn ki bokou dimoun pe espere, pou konnen ki fason pou ganny

fer. Mwan mon pou siport tou lesey, pou *freeze* bann *assets* bann *perpetrators*, ki'n ganny idantifye. E servi sa larzan ou vann zot propriyete e pey bann viktim ki'n anmenn bann ka devan.

Nou'n vwar kot bann *perpetrators* ki'n akimil en ta larises atraver zot bann travay sal. Alor mon konvenki ki ler in arive pou retourn sa bann gran fortin avek sa bann dimoun ki zot in fer soufer. Legzanp *Maison Du Peuple* Mr Speaker. Bann lezot batiman e propriyete ki *US* e lezot bann dirizan ki'n ganny deklare *perpetrators* i posede. Se sa ki pou anmenn vre lazistis pou sa pep.

Se sa ki pou fer ki nou kapab ki sa bann dimoun in fer sa bann atosite i kapab pey lepo kase. Mr Speaker avan ki mon konklir, mon le fer remarke ki Mosyon pe osi demann en prosedir ki ganny etabli pou nou diskite sa rapor *TRNUC*.

Mr Speaker si nou pou diskite paz par paz i pou pran nou ankor 3an pou diskite. Mon pa krwar ki sa ki Lepep i anvi nou vwar. Mon pa krwar ki sa i en legzersis ki pratikab osi, antan ki Lasanble i annan plizyer lezot keksoz osi pou fer. Alor sa ki Lepep i anvi konnen se ki pou arive avek tou sa

laverite ki'n ganny dir? Dan sa ka, dan sa travay - e parey mon'n dir e dan sa size konpansasyon i en size ki nou bezwen koz lo la.

I annan size rekonsilyasyon e linite nasyonal e tousala i egalman enportan. lafason ki nou Lasanble i diskit sa rapor pou bezwen reflekte serten matirite politik. E en zefor pou nou ini sa pep e anmenn rekonsilyasyon. Mon asire ki lezot Manm pou ranforsi sa pwen.

Mr Speaker mon krwar ki sa legzersis ki nou pou fer lo rapor *TRNUC* pou enn ki pou osi ranforsi nou demokrasi. E pou ede anmenn lazistis pou bokou bann ki'n sibir viktimizasyon anba sa diktatir ki'n la pou 43an.

Pou bann sirtou ki ankor pe mars avek larm dan lizye, pou zot vwar en *closure* dan zot ka. Mon konpran zot soufrans. I osi annan bokou dimoun ki'n reste Sesel osi ki pa'n al lazil politik, in sibir tout sort labi e viktimizasyon, alor zot osi mon konpran zot soufrans. Mon bann frer ek ser fodre pa ki *SPPF*, Parti Lepep, US pa zanmen vin ankor o pouvwar dan sa pei!

(APPLAUSE)

HON JOHN HOAREAU

Si nou fer sa fot nou les sa arive, listwar pou repet son lekor! Seselwa pou konn en pli gran revanz par sa bann bandi kile pouvwar a tou pri. Mr Speaker avek sa mon pou remersi ou.

(APPLAUSE)

MR SPEAKER

Mersi Onorab. Bon pou respekte en pe nou lorer, sirtou an relasyon avek medya ki transmet Lasanble, mon a pran poz la e nou a rebran 4er. Mersi.

(BREAK)

MR SPEAKER

Nou a kontinyen avek Onorab Adelaide.

HON FRANCOIS ADELAIDE

Mersi Mr Speaker. Bonn apre midi tou dimoun a lekout. Mr Speaker mon annan en plezir pou koz lo sa Mosyon Onorab Georges. Akoz parey in dir bomaten sel 2 Manm ki reste mon krwar i Onorab Georges li menm avek mwan. E sa letan mon ti ankor mon bann premye letan dan Lasanble Nasyonal.

E ler sa komite ti decide pou ganny etabli mon ti *look forward* pou mwan al lo sa komite. Akoz vi ki oparavan

mon ti'n deza tande en pe bann atosite ki ki'n arive. E petet en pe bann move zizman.

So, mon ti enterese pou mwan al lo sa komite. E petet koman en zenn *MNA* pou mwan osi fer mon kontribisyon. Mr Speaker sa Mosyon la ki nou pe pran, parey nou dir bomaten ti dan 2 Mosyon. E dimoun pe demann mwan ki nou pe diskite? Vre ti annan 2 Mosyon enn pou Onorab Pillay avek enn pou Onorab Bernard Georges.

Me selman pou Onorab Pillay, ti Mosyon ki nou ti pou pran premye. Akoz Onorab Pillay i ti pe demande pou ki Lasanble i ganny transformen koman en komite, pou nou kapab diskite rapor *TRNUC* ki bokou dimoun i konnen poudir sa rapor i vreman en gran rapor. E in pran en bon pe letan pou bann dimoun vin devan, pou zot koz lo la.

E Komisyon osi ti annan zot bann travay ki pou fer. E si nou ti pran li parey onorab ti pe demann Lasanble pou pran, Desanm ti pou arive, 2024 ti pou arive. E nou pa ti pou zanmen fini diskite sa rapor parey li i ti anvi fer.

E Mr Speaker e se sa rezon ki li i ti decide apre bomaten ler nou'n tande ki i decide anmenn en lot Mosyon, mon krwar ler in get pou Onorab Georges vi ki

avan zot sipoze annan en Mosyon ansanm pou montre sa linite Lasanble pou nou kapab diskite sa size ki dabor i vreman konpleks. E i pou ouver bokou boubou.

E mon konnen malgre nou anvi rekonsilyasyon nasyonal, i pou pran en pe letan pou nou kapab arive *achieve* sa *process*.

Mr Speaker mannev bomaten ki'n arive e apre midi avan ki zot *US* in kit Lasanble. I montre poudir vreman ti annan en mannev met retar dan sa travay. Me selman mon fyer ki nou *LDS*, nou en Lasanble ki serye, nou'n reste. E nou pe debat sa pou ki nou ava konnen ki mannyer nou pou antreprann sa Mosyon, ler i pou vini parey Onorab Georges in dir an Zilyet.

Vi ki sa mwan, mwan Zen, koudeta ti an Zen. E la nou lazournen konstitisyon i an Zen. E avan i ti nou lafet lendepandans ki ti le 29 Zen ankor. Tousala i petet kapab deranz en pe bann fason panse bann sitwayen. So, mon krwar avek sa sizesyon ki Onorab Georges in mete, mon krwar in montre poudir nou kapab fer keksoz en pe diferaman. Me selman ki nou *attend* menm lobzektif.

Mr Speaker Onorab Georges in anmenn son

Mosyon. In byen eksplik son Mosyon. Nou tann dir pou dir sa rapor ki'n anmennen, sa rapor pa konplet ouswa i mank bout. Me mon krwar atraver sa Mosyon, i ti la letan kot si Lopozisyon ti en Lopozisyon serye kot zot ti kapab anbelir sa Mosyon. Akoz en Mosyon se pa en keksoz ki'n ganny *cast in stone*.

I dir ou en Mosyon se en komansman konversasyon. Annefe nou sipoze anbelir li, pou ki ler loter Mosyon i fer son *right of reply* i kapab konsider enn de bann pwen ki relevan. E ki nou kapab fer antre dan sa Mosyon.

E parey mon dir si Lopozisyon ti serye, sa ti devret en fason ki mannyer zot ti kapab fer zot kontribisyon. Wi lalis *perpetrator* be i ti en keksoz ki ti kapab demann Onorab Georges pou li met dan son Mosyon. E mon osi mon pou zwenn li akoz nou bezwen konnen lekel bann *perpetrator*.

Si nou anvi diskite en rapor nou bezwen ganny li antye. Me selman Mr Speaker i enportan pou ou konpran poudir sa *truth and TRNUC*, i pa en keksoz ki ou kapab fer dan en dele letan, akoz i annan dimoun ki korpere. I annan dimoun ki pa vini. I annan dimoun ki pa pou

zanmen vini. E i annan dimoun ki'n mor.

Mr Speaker ki mannyer ou ekspekte ou ganny en rapor ki konplet parey Lopozisyon pe dir nou. I vremen difisil, me nou bezwen kapab apresye bann dimoun ki'n annan sa lafors pou vin devan, tou an respektan bann dimoun ki'n santi zot petet en pe moralman ba. Ouswa petet zot pa anvi koz lo zot problem. Ouswa petet i annan bann ki'n fini war *closure* osi.

So, i enportan pou nou kapab fer sa bann prosedir byen, pou ki nou fer pli mwens ditor. Akoz Mr Speaker sa prosesis ki nou pas atraver i pou en prosesis ki fermal. E i pou annan bokou bann dimoun ki mon konnen sa boubou pou reouver. Onorab Georges in dir nou bezwen konklir travay *TRNUC*, Mr Speaker vre.

Parey mon dir, ou pa kapab ganny tou keksoz. Akoz i annan enn de bann keksoz kantmenm Komisyon, Komisyoner zot in le gannye me i pa'n posib pou zot gannye.

Dezyenm bout lo Mosyon Onorab Georges, nou bezwen protez larsiv. Mr Speaker wi, i vremen enportan. Akoz mwan ler mon ti lekol ti annan lesan politik ki mon ti ganny

brainwash. Mon ti ganny *brainwash* avek sa bann lesan politik, ki finalman ler mon ti aprann mon vre listwar mon ti trouve poudir bann sesyon politik dan lekol zis in gat mon letan.

E petet ozordi mon ti pou kapab pli lwen, be *anyway* Bondye ki plan ki son zanfan i anvi vini. E ozordi mon en Manm Lasanble e mon krwar mon ase zenere avek tou sa ki mon'n kapab akonplir.

E i enportan Mr Speaker ki nou annan sa larsiv pou ki sa bann keksoz pa repet ankor. I pa repet ankor dan nou pei. E nou zanfan i konpran ki'n pase, i konnen ki'n pase. E nou bezwen *teach* zot poudir vyolans i pa fason pou rezourd problem pou ou anpes dimoun koze. Me plito rod en lot fason pou nou kapab konpran kanmarad. Menm dan tou diferan pwennvi, diferan panse, me selman i bezwen annan en fason ki nou bezwen fer. Vyolans i pa, i pa en fason pou nou kapab fer rezourd problem Mr Speaker.

Mr Speaker sa bout konpansasyon i enn ki pli enportan. I enn ki pli enportan ler Onorab Pillay pe demann nou pou nou diskite sa rapor ki pou anmenn nou parey dan son Mosyon ziska 2024 apre pli tar.

Me i annan bann ka ki'n fini, ki'n fini pase. E konpansasyon i enn sa rekomandasyon ki Komisyon in demande.

So, eski i pou byen, pou nou kapab retard sa prosesis pou nou kapab geri bann touzour ki mon krwar ki zot bann fe in ganny etabli. E ki keksoz i kapab marse pou zot. Tout an mazinan ki i annan ki i annan bann dimoun ki zot osi zot pa pou gannyen zot konpansasyon sitan vit. Akoz petet i annan ankor bann dokiman, i annan ankor bann levidans ki manke.

Me selman pou sa bann ki son bann *case* in konklir, mon krwar i enportan par egzant parey ki Onorab Georges in dir. Nou ava diskite an Zilyet e nou fer sir ki nou pa pe tro tard li. pou ki sa bann dimoun zot ava ganny en *closure* pou zot bann *case* ki zot annan. Mr Speaker lot bout ki Onorab Georges dan son Mosyon e ki mon pou siporte i annan sa bout promouvwar rekonsilyasyon nasyonal.

Annefe i sa 2 bout ki mon krwar nou devret antas bokou latansyon avek konpansasyon avek promouvwar rekonsilyasyon nasyonal Mr Speaker. Akoz si koman en Lasanble nou pa kapab fer sa 2 bout, mon krwar nou pou

ganny marke dan listwar Lasanble koman bann Manm ki Seselwa pa pou zanmen bliy nou. Mon konnen poudir tou dimoun i pans diferaman. Me selman si nou'n ganny en travay pou nou fer mon krwar Lasanble kot i kapab ede kot i kapab anmenn son sipor son soutyen, mon krwar nou devret ase brav pou nou kapab fer li.

No matter what ki bann rezistans ki pou annan, ki bann vatevyen ki pou annan Mr Speaker, mwan mon krwar koman en Lasanble serye sirtou la dan nou kote *LDS*, mwan mon krwar nou devret kontinyen. Nou devret kontinyen pouse pou ki sa bann dimoun sa ki zot anvi zot kapab vwar arive san tard pli bokou letan.

Mr Speaker avan mon terminen, mon ti a kontan *remind* Lasanble Nasyonal Mr Speaker, mon fek sorti ankor dan letan *break* mon vwar nou premye komite ki mon war zot in met li devan dan *lobby*. E ler mon get sa bann dimoun lo la Mr Speaker, i vremen *remind* mwan sa bann letan ki parey mon ti dir, ki mon ti ankor en zenn Manm Lasanble Nasyonal. E dezormen sa i pou mark mwan dan mon parkour.

E mon pa pou kapab pa fer mon *duty*, akoz mwan osi

mon ti donn lanmen drafte Lalwa. Mon konn tre byen ki i annan dan Lalwa e mon konnen ki *end results* ki sa komite ti anvi vwar.

E Mr Speaker pou fini i annan zis en pti keksoz mon oule *remind* Seselwa. Bomaten nou'n ganny dir poudir nou, nou pou servi sa size koman seval batay. Mr Speaker mwan mon anvi dir avek Seselwa *yes* nou ki ti fer sa Lalwa. E i ti ganny *assent* an 2018e se pa Prezidan Ramkalawan ki ti *assent* sa Lalwa. Se Prezidan Faure a sa letan e i ti trouve li menm li dan son konferans de pres —*Tête à Tête* menm mon trouve ki in en pe tay isi tay laba.

Me selman li osi in aksepte poudir nou bezwen annan sa rekonsilyasyon nasyonal. E mon ti a kontan ki tou dimoun, tou dimoun sa eksepsyon menm kantmenm parti *US* mon konnen petet ozordi zot pa la. Me dan deba zot pou la an Zilyet. Annou sey travay pou nou at *least* pou anmenn sa rekonsilyasyon nasyonal pou nou pep.

Nou pe ganny peye avek sa pep. Pep pe *look forward* lo nou. So, mon krwar nou bezwen met nou diferans dekote e vremen anmenn sa keksoz ki mon krwar sa pep i bezwen. E mwan

mon krwar nou ava listwar i ava marke poudir sa 7enm Lasanble, in fer son travay ki i ti annan e zot in fer li an tout fransiz. E priye ki linite nasyonal i renye dan nou dimoun a lavenir.

Mr Speaker mon pou dir avek Onorab Georges mersi bokou pou sa Mosyon. E kont lo mwan pou mwan pou ganny sa siport avek mwan. Mersi.

MR SPEAKER

Mersi Onorab. Onorab Desheila Bastienne.

HON DESHEILA BASTIENNE

Mersi Mr Speaker. Bonn apre midi Mr Speaker. Bonn apre midi tou koleg Onorab e tou dimoun a lekout. Mr Speaker Mosyon anmennen par Onorab LGB, i annan pou fer avek rapor Konmisyon Rekonsilyasyon e Linite Nasyonal. Sa rapor in ganny depoze devan Lasanble Nasyonal an konformite avek Lalwa TRNUC. Mr Speaker sa rapor i annan en gran lenportans. E lanpler sa rapor pe refer sorti tou bann aksyon kriminel ek kriyorite degradab ki'n ganny komet dan en pti pei, ki nou ti toultan refer li koman en paradi dan Losean Endyen.

Kot bokou nasyonalite ti reve, pou vin pas en letan avek pep sa pei. Mr Speaker nou a

dakor ki sa travay konmisyon TRNUC pa'n enn fasil. Sa Komisyon in dedye zot letan pou fer en travay nob. E fer tou dan zot kapasite pou anmenn laklerte ek repons dan bokou kestyon ki'n reste san en repons pou bokou lannen.

Mr Speaker fodre nou osi note ki TRNUC, in war li oblize vin dan Lasanble a 2 fwa, pou vin demann *extension* pou zot kapab konplet sa travay. Se pou sela rezon Mr Speaker ki i vremen enportan ki nou etabli en fason pou protez arshiv sa komisyon parey dan Mosyon pe rekomannde.

Mr Speaker sa rapor i devwal en listwar vremen fermal. Kot sak fwa en manm okenn fanmir ki'n pas atraver sa bann kriyote, in tann pe koz lo la zot ganny frison. Mr Speaker malgre nou pou rod tou fason pou koz lo sa rapor, pou ki nou pa konny boubou person, i pa pou arive. Sa ki'n arive napa fason kasyet. ni *avoid* koz lo la dan sa Mosyon.

Sak fwa ki sa bann tel kriyote i ganny mansyonnen, i annan fanmir ki ganny kosmar. I annan ki zot lizye i ranpli ek larm. I annan ki zis kontinyen demande, akoz sa bann tel aksyon ti bezwen arive. Ki drwa ki Bondye li menm ti donn en pti group dimoun pou tortir

dimoun, pou touye, pou pran zot propriyete, pini dimoun pa donn zot travay akoz senpleman zot lopinyon politik.

Mr Speaker ziska ozordi bann viktim ankor pe kontinyen demande oli lekor mon garson, mon frer? Oli lekor mon papa? Oli lekor mon msye? Ki'n arive avek zot? Ki kalite soufrans zot in pas ladan? Eski zot ti napa drwa en lopinyon? Ki mannyer nou, nou pou anmenn en tel reparasyon?

Mr Speaker bokou fanmir ankor pe ganny difikilte pou aksepte. Pou serten sa bann sikatris i ankor ovif. Leker i ankor pe blese. Zot ankor dan en fernwar, akoz zot napa en leksplikasyon pou zot zanfan e pti zanfan, ki ozordi zot osi zot pe sey rod laverite. Mr Speaker i annan bokou dimoun ki kontinyen demande akoz mon bezwen perdi mon propriyete, e al egzile zis akoz mon lopinyon ti diferan?

Mon pa ti en Seselwa? Mon ti napa drwa koze dan mon prop pei? Ki mannyer mon pou reganny mon byen? Sa ti mon propriyete. E nou a pran kont Mr Speaker ki sa rapor in ariv devan Lasanble Nasyonal e ki bokou fanmir pe kont lo sa Lasanble, pou fer en tre bon deliberasyon pou koz avek nou leker, vin fran, prouv larealite.

E aksepte lekel ki sipoze pey bann viktim konpansasyon.

Mr Speaker i annan Seselwa ki'n forse al egzile, ozordi letan zot vin Sesel zot napa landrwa reste. Ou war zot pe pas kaz an kaz, port an port zot pe sey rod en landrwa kote zot kapab reste pandan letan ki zot ti pe esper zot konpansasyon.

Mr Speaker fanmir pe esper sa rapor *TRNUC* ki koz lo reparasyon, konpansasyon e osi linite nasyonal avek bokou pasyans.

Bokou fanmir i anvi konnen ki desizyon final pou ganny pran. E ki fason zot pou ganny rekonpanse. Fanmir bann viktim pe esper en *closure*, e en *closure* ki vreman senser.

Mr Speaker loter Mosyon pe osi propoze ki nou sizer en fason komemor bann viktim Dezyenm Repiblik.

Propoz mekanizm pou rekonpans e osi reparasyon pou bann ki'n soufer. E osi pou promouvwar rekonsilyasyon ek linite nasyonal.

Mr Speaker dapre tou sa bann tel rekomandasyon ki pe ganny demande dan sa Mosyon, mon pou siport sa Mosyon. Akoz i tre enportan ki letan apropiye i ganny akorde pou en deba senser e byen detaye e byen kalkile i ganny fer

lo sa rapor *TRNUC* dan Lasanble Nasyonal. Mersi Mr Speaker.

(APPLAUSE)

MR SPEAKER

Mersi. Onorab Henrie, ou ti'n lev ou lanmen mon krwar, non?

HON GERVAIS HENRIE

Mersi Mr Speaker. Koleg Onorab e tou dimoun a lekout, sirtou bann dimoun Mont Buxton mon dir zot bonn apre midi. Mr Speaker sa legzersis ki devan nou ozordi ki dayer nou komanse. E nou pe annan lentansyon kontinyen pli tar, dan tout laverite i repoz lour lo nou zepol.

Parski nou santi responsabilite ki nou annan devan nou. E ki mannyer nou fer lazistis dan sa prosesis ki nou rann zistis bann dimoun ki'n sibir. E ki nou pa ofans bann dimoun ki pe annan en nivo lekspektasyon.

Alor se sa ki mon anvi bann dimoun laba deor i konpran nou. E senpatiz avek pozisyon ki nou ladan koman bann imen ki viv avek zot dan en kominote. Mr Speaker leskiz i kapab en zes vid, zis en keksoz nou fer pou apez lakoler lezot. Me ozordi koman en politisyen, mon rekonnet rol ki bokou

politisyen dan letan parti inik in zwe dan sa peryod tris dan lavi nou pei Sesel.

Zot aksyon ouswa sa ki zot pa'n fer e refize fer in ede bokou pou detri konfyans nou pep dan sistenm politik, prosesis politik. E bann akter politik. E se sa ki'n kre sa mefyans ki *US* ozordi pe koz for lo la.

Menm si mon ti annan selman 5an an 1977, e 20an an '92 letan miltiparti i retourn Sesel. Zanmen mon'n en manm sa parti ki ti o pouvwar sa letan, ouswa vot pou zot dan okenn eleksyon. Mwan mon anvi prezant en leskiz koman en politisyen, a tou viktim bann politisyen sa lepok.

Mon konsyan ki bann politisyen *SPUP*, *SPPF*, Parti Lepep e ozordi *US* in koz bokou soufrans nou pep. Mon demann Bondye papa pou pardon zot, me pli enportan pou ou sa viktim *St Mathieu* i dir "ler ou pardon lezot dimoun ki'n fer pese kont ou, Bondye Papa a pardonn ou".

Mr Speaker Mosyon ki devan Lasanble Nasyonal ozordi i table par Dirizan Zafer Gouvernman, pe demann larepons ouswa direksyon kler e defini lo 5 pwen spesifik. I regretab ki nou napa en Mosyon bipartizan devan nou ozordi. Ki alor nou ti ava decide

ansanm koman en lenstitisyon nasyonal enportan. Sa prosen letap sa prosesis laverite, rekonsilyasyon e linite nasyonal nou pei e nou pep parey tou ti komanse isi anndan an 2018.

Pou etabli konteks kot nou'n arive la apre midi, mon war li mon responsabilite pou enform Lasanble e Lepep Seselwa ki sete wi, Onorab Georges ki ti enform ABC. E si nou konstat *minutes meeting ABC* le 3 Me, 2023 ki ti pou table en Mosyon lo size *TRNUC*.

Malerezman Dirizan Lopozisyon in esey zwen malen, taye e depoz en Mosyon avan *LGB*, ki ti ariv lo *Order Paper* preske dir 1 mwan pli tar, dan semenn 6 e le 7 Zen. En Mosyon ki pa ti pou anmenn nou okenn par. Me senpleman diskit rapor *TRNUC* laliny par laliny, paragraf par paragraf, paz par paz en legzersis ki ti ava pran pros 3an edmi parey ler Lasanble ti pe travay lo revizyon Kod Sivil.

Me sa legzersis parey Lopozisyon ti oule, ti pou zis en gaspiyaz letan, retar e *highjack* azanda Lezislatif parti o pouvwar pou rezon politik, ler zot konn tre byen ki sa formil pa ti pou donn okenn direksyon kler. E defini lo ki arive avek travay *TRNUC* apartir konmela.

Pour kontinyen Mr Speaker, mon oule dir mersi tou dimoun san eksepsyon, ki dan en fason ou en lot in enplike dan legzistans e reisit travay *TRNUC*.

Mersi pou zot krwayans e vizyon. Mersi pou bann ki'n vin devan e partaz zot laverite. Mersi pou bann ki'n ankouraz lezot pou vin devan demann pardon, tir tou sa ki zot annan lo zot leker. Me mon pli gro mersi i pou bann ki kontinyen pri pou Sesel e son pep pou.

Ki Bondye e tou bann lezot lenerzi pozitiv dan nou liniver i vey nou pti pei, e anpese ki nou pas atraver sa moman tris brouyar sanglan e pa imen dan legzistans nou pti nasyon.

3an edmi *TRNUC* in konplet son manda e soumet son rapor avek Prezidan Larepiblik Mr Wavel Ramkalawan, parey Lalwa *TRNUC* i presize. Prezidan a son tour i bezwen prezant sa rapor avek ou koman Speaker Lasanble Nasyonal. E parey tou rapor e piblikasyon ki ganny depoze isi, i kapab size en deba zisteman ki pe komanse ozordi.

Bi *TRNUC* sete pou travay e trouv laverite bann sirkonstans otour levennman koudeta le 5 Zen, '77, ki ti anmenn bokou divizyon politik e soufrans nou pep. Pandan sa

3an edmi, *TRNUC* in anrezistre 496 ka. E fer 272 *hearing* dan ki 1164 temwen e sispe in paret devan sa Komisyon. Sa Komisyon in asiz 266 zour e 3kar bann ka ki zot in *deal* avek in konsern later.

Mosyon devan nou pe demann 5 keksoz spesifik parey mon'n dir, parmi trouv en mwayen pou konklir travay ki reste. Wi, nou konnen poudir *TRNUC* ti deza demann 2 ekstansyon Lasanble Nasyonal. E i annan apepre 126 *cases* ozordi ki *pending*.

Alor wi nou bezwen trouv en fason pou ki sa bann travay i konplete pa ki neserman ki mon annan egzaktaman larepons pou sa enn la, me mon swete ki kolektivman koman en pei nou kapab trouv fason.

Mosyon i osi demande pou etabli en fason pou protez arshiv sa Komisyon. E mon partaz lopinyon tou bann Manm ki'n koze avan mwan, ki'n demande par egzantp en seksyon dan sant kiltirel Victoria i ganny rezerve pou sa. Mon ti ava propoze ki petet ti ava vin anba patronaz *Human Rights Commission*. E osi Mize Nasyonal ki annan alokasyon bidzeter, pou kapab prezerv sa bann dokiman par egzantp pou *digitalized* bann dokiman.

Pou annan en legzibisyon permanan lo koudeta e son *aftermath*. Koman en Nasyon fodre zanmen nou obliy ouswa kasyet sa peryod sagrinan nou listwar. Pou ki lavenir i pli briyan ki yer, ki nou dir zanmen ankor. E i bezwen annan dimoun tel ki bann istoryen e *researchers* pou anbelir sa ki *TRNUC* in dekouver ziska la.

Lo size en fason pou komemor bann viktim Dezyenm Repiblik; mwan osi dakor avek bann sizesyon ki'n ganny fer tel ki en moniman, en landrwa spesyal kot dimoun i kapab rasanble pou diskite, fer *rally* ouswa selebre.

En zour dan lannen par egzantp *World Democracy Day* ki tonm le 15 Septanm. Nou kapab servi pou komemor. Koman i ava vin en seremoni ofisyel ouswa par egzantp lanmes, kot nou kapab onor bann ero nou demokrasi, onor sakrifis ki bann ki'n brav pou debout kont tou le mal dan nou pei.

Kot i annan bann kozri dan sirtou bann lenstitisyon skoler kot bann valer e drwa ki ganny site dan nou Konstitisyon i ganny promouvwar e rapele. Mosyon pe osi propoz en mekanizm pou konsider konpansasyon e reparasyon pou bann ki'n

soufer. La, la nou pe adrese sa Mosyon ki *Leader* Lopoziyon pe sey fors dan nou lagorz.

Mon repete propoz en mekaniz pou konsider konpansasyon e reparasyon pou bann ki'n soufer. Nou bezwen lazistis Mr Speaker. Lazistis reparasyon i bezwen enn ki adekwa ki rezonnab, ki pei i kapab *afford*. En komite dirize par bann viktim in deza komans serten travay anliny avek Polisi reparasyon ki zot in fer li anliny avek seksyon 3(7)(e) e (i) anba Lalwa *TRNUC*.

Me letan pou tann Dirizan Lopoziyon i demande par egzantp i dir "Lekel ki pou demann pardon si li?" E apre i target enn de endividi. Mon ti ava annan sa pou dir li Mr Speaker. Be lekel ki pou peye, Gervais Henrie? Mon pa'n fer okenn krim mwan dan letan parti inik.

E zisteman dimoun ki mwan mon reprezante dan distrik Mont Buxton par zot ki'n fer sa. E mwan personnelman, i oule anmenn son Mosyon nou ti ava dir ek li sel laliny ki nou ti ava dir dan son Mosyon, ki Leta Sesel i komans en prose legal, pou sezi byen tou sa bann ki responsab enkli zot parti politik!

(APPLAUSE)

HON GERVAIS HENRIE

E larzan ki leta i ramase i partaz avek bann viktim. *US* i annan zot zafer later la zot pe tay dan tou direksyon pe sey vann tou bann bout posib. Koman 2020 ti arive zot ti vann sa bout St Louis. Zot in vann sa bout la English River o bor klinik. Zot in vann sa bout Beau Vallon o bor lekol Beau Vallon. E la zot pe fors Nasyon pou vann sa bout kot *printing NISA* i ete R7milyon.

Mwan mon dir Leta etidye sa dosye later, komans prosesis legal sezi zot byen vann e partaz larzan avek viktim koudeta '77!

(APPLAUSE)

HON GERVAIS HENRIE

Mr speaker Mosyon i osi koz lo promouvwar rekonsilyasyon e linite nasyonal. Rekonsilyasyon i geri bann blesir ki ankor ovif dan en sosyete ki pe soufer. E Sesel nou ankor pe soufer.

Rekonsilyasyon i redwir mefyans ant sitwayen avek Gouvernman, alor i enportan. Rekonsilyasyon i dwatet en prosesis enkliziv kot nou bezwen regarde e vwala kot nou koman en Lasanble, nou ti merit vin ansanm e propoz bann reform striktirel dan bann lorgann Leta ki dan lepase in

annan bann mankman. E i permet sa bann labi kont nou pep!

I annan ki pa ti la me i annan ki ti la. Lafors sekirite nou pei Larme, Lapolis kot zot in enplik. E ki mannyer nou kapab fer sir ki zanmen zot fer ankor sa bann keksoz, an term depi ledikasyon bann zofisye avek bann striktir pou fer sir ki sitwayen i ganny tou proteksyon kont zot.

Ki mannyer nou kapab ranforsi lefikasite bann gardyen nou demokrasi tel ki *Human Rights Commission, Ombudsman, ACCS, Lakour, Lasanble* bann parti politik, medya parmi bokou lezot.

Ki mannyer nou promouvwar dyalog, konsiltasyon? Ki mannyer nou fer i annan partaz pouvwar dan pei ouswa balans pouvwar? Ki mannyer nou epanouir nou pep pou idantifye, konpran e koz kont lenzistis? Ki mannyer nou promouvwar linite parmi bann parti politik, zis parey ozordi mon admir linite ki annan ant bann relizye atraver *SIFCO*.

Mr Speaker nou kapab e nou merit pe fer ankor plis. E nou dir ki Mosyon pe demande nou bezwen trouv en letan apropiye pou deba plis ankor lo sa travay. E mwan Zilyet pe

ganny propoze mon napa difikilte pou mwan partaz sa.

Mr Speaker an konklizyon dan labsans parti Lopoziyon ozordi, yer i annan en keksoz ki'n arive dan Lasanble. E in bles mwan. Sak fwa nou'n pran *break* 10er, midi, 3er Lopoziyon *Leader* Lopoziyon, parmi en Sekreter Zeneral zot parti ki dan Lasanble in kontinyelman sant en sanson "me depi le 5 Zen 77 dat ki zanmen nou a bliye dan listwar nou pei. Sa ki ti krwar nou enferyer sa zour ti konn nou valer." I en afron sa. I bann Manm ki pe sante konmsi zot pe pas en disel dan ou boubou. Dan mon fanmir nou annan viktim ki'n al devan *Truth* dan sa prosis ki'n pase. Propriyete mon fanmir in ganny pran.

Sa parti in responsab pou touye, pou disparet, pou legzil forse, pou sezi propriyete prive, pou pran biznes prive ouswa *nationalized*, pou detansyon ilegal, pou bat dimoun, pou pa donn dimoun travay atraver *security clearance*, pou pa donn lakaz e *scholarship*.

E la mon oule adres lazenes Seselwa. Bokou zot ki pe siport sa parti ozordi, se zot ler nou, nou ti zot laz ki ti pas dan sa kalite viktimizasyon avek *US*. E ozordi lazenes Seselwa pa bezwen let nou

down ki zot kontinyelman swiv sa parti, ki si i le retourn o pouvwar zot pou fer egzaktteman parey!

Ler zot pe koz “*bring it on!*”
Ler zot pe dir “zot sel opsyon pou Sesel” lazenes Seselwa mazine ki demen ou kapab en viktim sa parti politik!

(APPLAUSE)

HON GERVAIS HENRIE

Mr Speaker ler mon pe koz lo lazenes, mon met portre Mr Gilbert Morgan. Mon pa ti konn li mwan, me Mr Gilbert Morgan 43an a laz 43an pase, a laz 30an i ti al pran en drink *Reef Hotel*. I ti en papa 2 zanfan ki bokou nou zenn ozordi parey zot al *Boardwalk*, zot al *Beach Shak*. Ler i ti lo bar en dimoun ti vin kri li apre zanmen nou’n war Mr Morgan ankor.

Lazenes Seselwa mazine i ti kapab ou. Mon sit parol son fiy devan *TRNUC* son fir Sharon ti dir devan *TRNUC*, “Ler mon papa ti ariv dan sa destinasyon final e sorti dan loto, eski i ti konnen ki ti pe al arive avek li? Eski ou ti vwar lafreyer dan son lize? Avan mon papa ti respir son dernyen respirasyon ki ti son dernyen parol? Eski i ti sipliy ou pou son lavi? Eski i ti dir ou pran swen avek mwan? Eski i ti dir “dir Sharon mon

kontan li?” 30an i ti annan e i ti kapab en zenn Seselwa ozordi.

Mr Speaker sa ki’n arive ant ‘77 ek ‘92, e apre kontinyen akoz sa parti in reste o pouvwar ziska 20, fodre zanmen i arive ankor dan nou pei e mon pe kont lo lazenes Seselwa pou sov Sesel! Mersi.

(APPLAUSE)

MR SPEAKER

Mersi Onorab. Onorab Romain.

HON GEORGES ROMAIN

Mersi Mr Speaker. Bonn apre midi Mr Speaker. Bonn apre midi tou dimoun a lekout. Mr Speaker mon pa pou long lo sa Mosyon akoz bokou in ganny dir. Mosyon anmennen par Onorab Georges ti’n plis ki ler pou vin devan nou Lasanble an vi ki nou ti’n ganny sa rapor pou travay lo la osi avek demann piblik la deor Mr Speaker.

Mr Speaker, mwan osi mon pou dakor avek loter Mosyon, letan apropiye i merit ganny akorde pou deba ganny fer lo rapor *TRNUC* par Lasanble Nasyonal. E la ki nou fek ganny lot bout rapor ki ti manke.

Mr Speaker i vreman enportan pou nou diskite sa rapor, akoz sa travay ki’n ganny

fer par *TRNUC* i enn ki fer mont en kantite lemosyon parmi nou popilasyon. E sirtou parmi bann ki'n ganny afekte direkteman avek bann lensidan ki'n ganny dekri, kot nou'n vwar bokou larm in koule Mr Speaker.

I bann keksoz ki nou bezwen ed nou popilasyon konpran sa ki'n arive dan listwar Sesel. E osi demontre bann keksoz ki zanmen i devret ariv ankor dan nou pei. Mr Speaker mon repet ankor ki zanmen i merit ariv ankor dan nou pei.

Mr Speaker parey mon'n dir mon pa pou long. Avan mon terminen mon ti a kontan senpleman dir avek *LOTO*, anba zot ansyen ladministrasyon ki tou sa bann kriyote, viktimizasyon in arive. E la ou pe dir avek sa Gouvernman fodre pey konpansasyon o pli vit posib.

Mr Speaker, depi ler sa Gouvernman in vin o pouvwar, i pe war li pe zis pey konpansasyon, pou bann move desizyon ki'n ganny pran par sa ansyen ladministrasyon. Mr Speaker sa i demontre nou ki kalite Gouvernman ki ti pe diriz nou pei dan sa letan.

Alors Mr Speaker mon pou dir avek loter Mosyon Onorab Georges mon pou donn li tou

mon sipor pou sa Mosyon. Mersi Mr Speaker.

MR SPEAKER

Mersi Onorab. Onorab Bistoquet.

HON ROSIE BISTOQUET

Mersi Mr Speaker. Bonn apre midi Mr Speaker. Bonn apre midi tou bann Onorab. Mr Speaker mon pa pou tro long dan mon lentervansyon, akoz en bon pe in ganny kouver par larestan Onorab ki'n koz lo la. Be selman mon pa kapab pa met mon de pti mo pou mon kapab donn sipor sa Mosyon.

Alors Mr Speaker, sa Mosyon in vin a en bon moman parey nou'n trouve. En bon moman akoz Zen 1977, spesifikman, la nou'n trouve. Nou fek pas dan... Nou ankor dan sa mwan Zen, le 5 Zen ki zot ti trouve poudir ler ti annan en dirizan voras ki ti pran kontrol nou pti popilasyon Sesel.

Pa atraver en prosedir normal ou demokrasi. Me atraver, par egzanp nou dir en prosedir normal - en eleksyon. Me zot ti fer li atraver en levennman. Ti tre tris, ti tre fermal pou pep Seselwa ann antye, kot nou ti komans avek en versman disan. E parey nou'n trouve, par en Koudeta

1977. E sa in kontinyen ziska 1992.

Sa rezim mon pa konnen kalite rezim i apele. Me petet sa ki mon apel li, mon pou apel li en rezim disan. Akoz dek ki sa rezim ti vin o pouvwar, rezim disan ti kontinyen verse partou dan nou pei, ziska parey mon dir 1997...1982...'92. En kantite Seselwa in vin viktim, e sa in kree en kantite divizyon parmi Lepep Seselwa. In kree lanmertim. In kree sirtou lafreyer parmi nou.

Mr Speaker, apre nou konn byen atraver sa lanmertim, lafreyer, en kantite dimoun in pas atraver, pas dan prizon. Zot in ganny torture, zot in ganny bate. E menm i annan zot in ganny disparet. E menm osi, par egzantp nou ti trouve dan sa *Truth*, i annan i annan in ganny met dan pti kaso ki zot pa kapab ni lev zot likou anler. E sa i fermal; pou en imen.

E parey mon dir Mr Speaker, i annan lezot ankor lanmertim ki zot in pas atraver lafreyer. I annan ki'n perdi travay. I annan ki'n ganny pouse dan travay. I annan ki zot zanfan, menm zot pti zanfan ti vin viktim sa bann atosite ki sa Gouvernman ti fer avek son pep. E zot konnen poudir par egzantp, i annan ni menm lekol,

liniversite, sa bann dimoun, zot zanfan pa ti kapab ale.

Mr Speaker, granmersi sa Lalwa *Truth* ki'n ganny etabli ki ti aprouve par zot prop Prezidan. Prezidan Danny Faure. Apre tro bokou ki - sirtou ti ganny *lead* par Parti *LDS* apre ki zot ti'n trouve poudir ti annan tro bokou dimoun ki ti pas atraver sa bann sityasyon, kot zot bezwen anmenn zot soufrans devan pou zot fer sir ki zot lavwa i ganny tande.

Akoz zot osi. Mon krwar sa Lalwa mannyer letan in anmennen, in ed zot osi pou fer zot sorti sa ki ti annan lo zot leker. Sirtou bann ki'n perdi papa. Bann ki'n perdi frer. Bann perdi ser. Bann ki'n perdi later. Bann ki'n perdi biznes. Bann ki'n perdi tou sa ki zot ti annan, gras a sa rezim ki nou apel li en pouvwar ki ti tre voras, Mr Speaker.

Granmersi *Leader LDS* ki ti sanze douler sa bann dimoun, nou Seselwa. E zot in met zepol ansanm, met zefor ansanm pou fer pase sa Lalwa. E sa nou konnen ti gras a lo 15 lo 10 ki nou Lasanble Nasyonal ti annan.

Mr Speaker, koz lo merit sa Mosyon. Nou bezwen osi ki nou geri nou pep. Nou bezwen annan linite nasyonal. Nou

bezwen annan, trouv nou dan en sityasyon kot viktim i ganny *closures*, i ganny gerizon.

E osi alor i byen ki sa Mosyon in ganny anmennen devan, e mon kontan ki dapre son bann rekomandasyon, i annan divers kalite rekomandasyon anba la. E enn sa bann rekomandasyon mon krwar ki pli enportan ki mon krwar nou tou nou'n koz lo la, se reparasyon.

E reparasyon li i vin dan diferan laform. E enn de ladan ki mon pou tire, ki mon pou kapab repet ankor ki bann lezot in dir; i annan sa kreasyon en sipor mantal. Ki sa i tre enportan, aköz en kantite dimoun i ganny abize. En kantite dimoun in ganny bate. En kantite dimoun zot pa ankor war zot fanmir ziska prezan. En kantite dimoun ki'n ganny perdi zot biznes, perdi travay.

E mon krwar sa sipor psikososyal i ava ede pou zot pa...Menm ki zot pa pou kapab bliye be selman zot kapab ganny en sipor. E osi mon'n trouve poudir i pou annan en repons kot zot kapab...Tou bann *case* pou ganny etidye *on a case-to-case basis*. Non pa si sa ki'n tou ganny bate pou ganny parey. Be sak endividi, sak fanmir zot *case* pou lo en

case-to-case basis kot i a ganny rekonpanse atraver sa sistenm.

E osi sa ki mon'n vwar anba sa rekomandasyon se pou kree en fon. Pa zis pou bann viktim me pou bann lezot fanmir ki soufer. Aköz petet i en keksoz, en fanmir ouswa en viktim in ganny en maladi. Ouswa in ganny bate. Ouswa en nenport kwa ki'n anmenn li dan en sityasyon lonterm. Alors i pa pe kapab pey sa bann *bill* medikal, ouswa pran latizann ki petet i pou anmenn li ziska son lafen dizour lo sa later.

E en lot keksoz ki mon'n trouve se kree en *task force* pou fer en lenvestigasyon, pou bann viktim ki'n disparet kot personn pa konnen ziska prezan kote zot ete. E mon krwar sa i tre enportan. I tre, tre enportan aköz i annan manman. I annan papa, i annan frer, i annan ser. I annan fanmir ki ankor pe plere, zot larm i ankor pe koule ziska ozordi, aköz zot pa ankor konnen kote zot pros i ete.

E sa mon krwar Mr Speaker, ki i kapab ed lafanmir ann antye pou zot kapab fer en *closure*, ki demen zot a santi poudir zot osi zot in kapab ganny sa bon sipor. E avek sa Mr Speaker, mon pa pou koz tro lontan.

Mon ti a kontan an menm tan dir ki parey nou'n trouve

ozordi, i annan en kantite - sirtou nou group *US* lot kote latab. Ozordi zot in file, zot in ale. Akoz ler pou pran desizyon, zot pa oule pran desizyon. Me selman mon krwar in ler pou zot aret vin parey en lyon anba lapo mouton. Mersi Mr Speaker.

(APPLAUSE)

MR SPEAKER

Mersi Onorab. Onorab Flory Larue?

HON FLORY LARUE

Bonn apre midi Mr Speaker. Mersi Mr Speaker. Mr Speaker, ozordi i en zour vreman istorik. Kekfwa bokou nou pa pe realize, me nou pe form par listwar. Nou'n tann Onorab Adelaide ki'n apresye sa. Ki letan i ti form par komansman sa linisyativ, ozordi i santi li ki in *gain* en leksperyans, e i form par listwar.

Mr Speaker, letan nou pe get sa rapor, nou bezwen tras son listwar pou bann ki pa tro konpran, kekfwa ganny en nide lo ki'n arive. Ozordi *TRNUC* in prezant nou avek en rapor ki annan 6 parti e en lalis bann *cases* avek rekomandasyon.

Dan *Volume I*. Dan *Volume I*, nou annan nou 288 paz - Lentrodiksyon ek

Background. Dan *Volume II*, 133 paz - *Historical Context and Overview of Main Evidence*. *Volume III*, 128 paz - *Legal Framework and Case Determinations*. *Volume IV*, 98 paz - *Amnesty*. *Volume V*, 90 paz - *Reparation*. I annan en pti *Volume* Rekomandasyon avek 6 paz. An total ki fer nou 743 paz. Sa i san regard sa plis ki 500 ka avek son rekomandasyon ki li i annan plizyer paz.

Mr Speaker, letan nou regard sa an detay, nou bezwen osi prezan pran ki mannyer i ti komanse. Sa kalite dokimantasyon deza ki annan sa kantite paz. Zis ek son nimeron paz, si nou fer en resers, nou pou vwar si nou pou lir li en sel kou, i pou pran nou 25 erdtan, ki fer nou apepre 32 paz par erdtan.

Si Mr Speaker, nou ti pas dan sa dokiman, parey nou ti pe ganny demande par sa premye Mosyon ki Onorab Sebastien Pillay ti pe anmennen, nou kapab imazinen kantite letan i ti pou pran nou avek 34 Manm ki ti pou debat lo sa Mosyon a plizyer repriz.

E i ti pou en keksoz ki si *TRNUC* in pran 3an pou fer, *imagine* kantite letan ti pou pran nou. Nou bezwen alor konklir ki son lentansyon pa ti pir. Akoz *Standing Orders*.

Standing Order 30 i dir ki; nou a pas dan sa papye paragraf par paragraf.

Mr Speaker, *TRNUC* apre son formasyon avek sa kantite letan ki'n pran in donn nou en rapor. Me kote tousala ti komanse? An Septanm 2016, 6enm Lasanble letan ti'n fek ganny formen avek en nouvo parti ki ti'n fek ganny formen, *LDS* avek son 15 syez, anba *Leader of the Opposition* sa letan, Onorab Wavel Ramkalawan ki osi Prezidan ozordi, ti table en Mosyon le 2 Novanm 2016 ki ti pou *setup Truth Reconciliation and National Unity Committee* dan Lasanble. E sa Mosyon ti pase apre deba.

Manda sa komite ti pou li ekout e rikord bann *grievance*, bann ki'n ganny afekte depi 1977, pou *carry out* en *study* bann diferan prosis rekonsilyasyon ki arive, e donn son rekomandasyon avek Gouvernman. Fer bann rekomandasyon lo bann Polisi pou adopte en bann fason fer ki pou retir divizyon politik e promot linite nasyonal Sesel. Lobzektif ti pou fer ki nou ganny laverite apre tou sa bann lannen.

Mr Speaker, sa komite se en Komite Bipartizan, avek Onorab Wavel Ramkalawan

koman *Chairperson* e Onorab Charles De Commarmond koman *Vis-Chairperson*. Bann lezot Manm ti enkli Onorab Nicholas Prea, Onorab Bernard Georges, Onorab Francois Adelaide, Onorab Basil Hoareau ek Onorab Simon Gill.

I ti resevwar li 315 *grievance forms*, e zot ti *setup* en *symposium* le 22 Avril 2017, pou sansibiliz piblik lo ki manner sa Komisyon pe ganny *setup*. Komite ti deside ki pli bon aksyon pou fer se pou drafte en Lalwa e propoz sa Lalwa. Zot ti ganny en lasistans en *expert* enternasyonal, Mr Richard Rogers, e rapor ti ganny prezante a Lasanble, e Prezidan Faure le 14 *Juin* 2018 *State House*.

Proposed Bill, Mr Speaker ti ganny debat dan Lasanble le 1er e 2 Out 2018, e ti ganny pase a lafen lazournen le 2 Out 2018. E *The Truth, Reconciliation and National Unity Act* ti ganny enakte le 14 Septanm 2018 par Prezidan Faure. Apre nou'n war apwentman bann Komisyoner. E le 9 Out 2019 zot ti komans zot travay.

Lasanble Nasyonal, Mr Speaker, ti prosede pou li *handover* bann *files* ki zot ti'n annan, e Komisyon ti konmans

hearing kot *National House* le 9 Septanm 2019.

Mr Speaker, sa ki nou fer ozordi i vin listwar demen. Alor nou vwar kreasyon *TRNUC* depi son komansman, ziska ler ki zot ti tann premye *hearing* le 9 Septanm 2019, i dan li menm en traze istorik ki ozordi nou kapab koz lo la. Rapo final Mr Speaker, ti ganny donnen avek Prezidan an Mars 2023.

Aprè sa travay in ganny fer, Prezidan ti transmet sa rapo avek ou Mr Speaker, koman latet Lasanble Nasyonal. Sa, Mr Speaker, i dan Lalwa *TRNUC* anba 11 (4) ki dir; “*The president shall make the final report public and lay a copy before The National Assembly within one month of receiving it*”.

E vre ou ti ganny en kopi sa rapo. E *State House* lo son *website* Mr Speaker, ti met tou kopi sa rapo pou ki Manm piblik i kapab *download*. Mr Speaker, mon bezwen refer referans avek letan Onorab Pillay ti dir nou pli boner ki i pa'n ganny rapo konplet, e ki *State House* pe kasyet serten... In fer alegasyon ki *State House* pa'n donn nou tou dokimantasyon.

Mr Speaker, en dimoun, en zabitan ki sorti Glacis ki li i ti en viktim sa sistenm, in

anvoy mwan en mesaz, e in dir mwan ki, dir Onorab Pillay ki li i ti kapab *download* tou rapo, avek tou lalis lo *website State House*.

E i demande si ozordi, atraver ou Mr Speaker, ozordi bomaten ki Onorab Pillay i deside pou al get dan sa rapo, e deside ki i mank morso ladan. Depi en bon pe letan Mr Speaker, i ti'n kapa retournen al get son rapo. Si i ti enterese depi ler sa rapo ti lo *website State House*, i ti ann *download* son rapo e i ti a ganny rapo ann antye.

Alor Mr Speaker i montre ki in fer en zes pares, e i pe servi sa koman en leskiz. Mr Speaker tou sa ki nou dir i sansib e *somewhere* sa i pe afekte en dimoun.

Mr Speaker, letan ki rapo in ganny donnen avek nou, e nou koman Lasanble, nou kapab deside pou nou regard en rapo, ouswa pa regard en rapo; dan sa ka, lenportans sa ki'n arive i fer ki Lasanble Nasyonal i santi ki nou bezwen donn sa rapo; pa zis en pti letan me en gran porsyon letan. E la nou vwar validite sa Mosyon ki Onorab Bernard Georges in met devan nou.

E la Mr Speaker, nou bezwen vwar en fason pou konklir travay ki reste pou

Komisyon fer. Nou'n ganny dir serten alegasyon ki travay i sipoze konplete. Me si nou'n ganny dir par Onorab Georges ki i pa'n ganny konplete, olye demande dan ki fason? Akoz? Kontrer nou denigre sa prosesis?

Mon tann Onorab *Leader* Lopozisyon i denigre sa prosesis, e i dir ki rapor pa konplet akoz travay pa'n fini.

Mr Speaker, la, la loportinite. Akoz letan nou, nou pou fer sa Mosyon e nou pou fer sa letan, mon pe propoz 2 a 3 semenn. Nou kapab envit bann Komisyoner *TRNUC* e demann zot, kisisa? Kestyon zot pou nou kapab annan en konprenezon lo kisisa ki zot pe sey dir nou. E pou piblik konpran ki travay ki nou le fer.

Mr Speaker, en lot pwen in dir nou etabli en fason pou protez arsiv sa Komisyon. Mwan osi mon dakor ki nou bezwen servi en landrwa stratezik. E mon krwar ki Libreri Nasyonal i kapab kefwann annan en landrwa ki nou kapab dedye sa dan sant lavil pou sa arsiv.

Pou komemor bann viktim Dezyenm Repiblik, Mr Speaker, nou bezwen regard bann lezot pei parey *Germany*, ki li avek listwar atosite dan Premye, Dezyenm Ger Mondyal, zot in

fer li en *must* ki zot kontinyelman met sa dan tou keksoz. Pou fer ki pep Alman i toultan mazin sa atosite ki ti arive pou en rezon selman, pou zot pa zanmen komet li ankor.

Sa Mr Speaker i a donn nou loportinite, pou nou kefwann anmenn Minister Ledikasyon e montre lenportans ki sa listwar i annan par sanz nou liv listwar ki i vin en listwar korek, e sa i ava en fason pou nou komemor bann viktim Dezyenm Repiblik.

E parey Onorab Henrie in anmenn en portre Mr Morgan, tou pep Seselwa a kapab annan sa ekrire an blan ek nwar dan nou liv listwar. Alor mon krwar sa i en fason ki nou kapab komemor bann viktim. Nou koz lo propoz en mekanizm pou konsider konpansasyon e reparasyon pou sa ki'n soufer.

Mr Speaker, larzan pa zanmen ase. Me parkont i enn bann mekanizm ki'n ganny propoze dan rapor. E la Mr Speaker, mon konpletman siport Onorab Henrie an dizan ki tou *assets* sa parti i bezwen ganny met devan. E i bezwen ganny pran. E i bezwen ganny *allocate*. Bann *assets* son larzan i bezwen ganny *allocate* avek bann ki'n soufer.

(APPLAUSE)

HON FLORY LARUE

Be parkont, eski i pou ase? Si pa ase Mr Speaker, annou pran ase loportinite. Letan nou zwenn koman sa group, pou nou anmenn Minister Finans. Akoz en Mosyon, Mr Speaker, pa pou *binding* lo Gouvernman. Sa rapor son rekomandasyon i reste sa - en rekomandasyon. I pa *binding* lo Gouvernman.

Alor Mr Speaker, ti a bon ki nou annan en konversasyon konzwent avek Minister Finans, pou nou fer ki nou konpran byen ki menm si pei pa pou kapab *allocate* tou keksoz en sel moman, nou pa pou kapab zis met li akote e le pase, e zis dir ki nou napa.

Nou bezwen annan en plan ki fer sir pou nou kapab fer sa bout rekonsilyasyon e *national unity*, nou pou bezwen regard sa kote finansman.

Wi, bann dimoun ki'n komet sa larzan *tax* ki nou pou kontribye pou pey sa bann latrosite, pa nou ki'n form par ladan. Mwan mon ti ne an '78, Mr Speaker. Me parkont, i par nou listwar. I par fer nou en Seselwa. Bokou nou fanmir, nou zanmi, lezot dimoun atraver, parey Onorab Henrie in dir, zot ti prezan koman en politisyen. Zot ti prezan koman en zofisyen dan Gouvernman, me

selman nou pa'n kapab fer naryen.

Ozordi nou bezwen nou tou koman en pep, pey sa ki nou bezwen peye koman en det Mr Speaker. Pou nou mazine dan le fitir, ki fodre pa zanmen i ariv ankor ankoz nou pa le en lot det. Finalman i ganny demande pou promouvwar rekonsilyasyon e linite nasyonal.

Mr Speaker, sa i vin dan tou form. E enn bann legzanp bomaten ti nou langaz ki nou servi. E i annan lezot kalite form ki nou a kapab depouye, met devan. E avek bann nide konkret pou nou promouvwar Rekonsilyasyon Nasyonal e Linite Nasyonal.

Mr Speaker, parkont letan nou koz lo *TRNUC* ti komans le 5 Zen 1977, nou koz lo *SPUP*, *SPPF*. Sa parti ki ti komans sa traze. Son *Leader*, Albert Rene.

Ozordi Mr Speaker, nou'n war parti Lepep/*US* vini. Mr Speaker, sa parti ki zot dir, napa okenn zot ki'n fer naryen. I menm parti ki an egzistans. Fodre pa nou oublie. Zanmen sa parti ki ti fer Koudeta le 5 Zen '77, in deza fermen, Mr Speaker. Zot in zis sanz zot non!

(APPLAUSE)

HON FLORY LARUE

Mr Speaker, letan ou, ou annan en bout later. ou donn ou zanfan. Ou zanfan i donn son zanfan. I menm bout later Mr Speaker. Ozordi sa parti i ankor menm parti ki ti fer Koudeta. Menm si bann dimoun ki la pa ti partisipe. Alor Mr Speaker, sel fason pou zot tir sa lo zot lanmen, pou nou aret dir zot ki ti fer Koudeta, fodre sa parti i fermen!

(APPLAUSE)

HON FLORY LARUE

Fodre zot ouver en lot parti politik, apre resisite. La zot a kapab dir ki zot en nouvo parti, Mr Speaker. E la mon bezwen sit Mr Faure letan i dir;’ ‘Sel keksoz ki asosye avek, se zot parti dan lepase. “Zot asosye Mr Speaker. Zot kapab pa kontan, me zot asosye.

Donk, ki ou pou fer. Mon kontinyen sitasyon; “Donk ki ou fer, ou bezwen pronons ou lekor, ou bezwen dir, *ok*, nou *apologise*, ki nou annan lenstans labi imen, ki nou annan vyolasyon labi imen’. Ferm sitasyon.

Mr Speaker, ni en *apology*. Ni en *apology* nou pa gannyen. Menm sa, zot...Letan nou pe koz lo rekonsilyasyon nasyonal, menm sa Onorab Pillay pa kapab donn pep Seselwa Mr

Speaker. Mr Speaker, nou pa kapab - nou pa kapab zis vini dir donn larzan parey Onorab Pillay in dir.

MR SPEAKER

15 minit. 15 minit Onorab.

HON FLORY LARUE

Olye *apologise* i dir donn larzan. Mr Speaker, i pe sit...I pe ensit en santiman dan sa bann dimoun ki pe esper en konpansasyon, ouswa en desizyon lo konpansasyon. Akoz desizyon pa ankor ganny pran.

E ozordi avek nou problem ekonomik, i pa kapab vini, sit sa. Akoz letan i pe fer sa bann viktim annan sa *hope*, me selman kekfw nou konnen sa larzan pa pou vini. Mr Speaker, i pe fer zot pas dan labi, ankor. I en lot form labi ki i pe fer.

Alor annou sey ekoute, annou sey annan enpati. Letan zot pe ekout nou lo televizyon laba lot kote annan en *empathy* pou dimoun ki'n pas dan sa bann zafer. Annou donn sa letan e nou konsyans. Annou travay prop pou nou anmenn bann vre solisyon. Akoz menm si i pa pou *binding*, i pou en led pou Gouvernman Mr Speaker. Alor mon siport sa Mosyon ki Onorab Georges in anmenn. Mersi.

(APPLAUSE)

MR SPEAKER

Mersi Onorab. Onorab Waven William.

HON WAVEN WILLIAM

Mersi Mr Speaker. Mr Speaker bokou in ganny dir lo sa Mosyon. Me sa ki mon ti a dir mwan se ki koman en Lasanble, mon bann Manm Elekte, nou devret les nou ganny gide par nou kreater letan nou pe fer sa bann deba, an menm tan rod solisyon.

Mr Speaker mon osi anvi dir ki dan Labib i dir, “ sa ki pas anba lili, pour ganny met lo twatir lakaz”. *E the truth will always prevail*. Mr Speaker lo sa Mosyon, mon ti a kontan dir ki enn, dan lafason ki'n ganny drafte i fer bokou sans, i donn en direksyon.

Me an menm tan mon ti a ava dir ki nou bezwen *focus* lo lesansyel dan sa Mosyon e an menm tan i annan serten bann konsern ki'n ganny souleve, ki koman parti mazoriter e Gouvernman, nou konnen poudir i annan en ta keksoz ki arive vitman. Sirtou lot - kot i konsern sa size reparasyon.

Mr Speaker mon anvi gidans, mon pa konnen si loter Mosyon, ouswa ou menm pli tar

ki pour fer sa. Vi ki nou konnen ler nou pe koz lo bann zafer *assets* reparasyon, nou'n tande poudir i annan en ta keksoz ki pe arive - *disposal*.

Mon ti ava demande ki letan nou pran, ouswa letan nou komans bann deliberasyon, ki nou vreman swazir bann size kot nou pa kree bokou retar, me pour kapab adres problem vitman.

En legzanp mon anvi donner se ki, si nou konnen poudir i annan *disposal of assets*, e mwan mon pa pour dakor parey bokou dimoun ki *taxpayers money*, i ganny pran pour peye pour reparasyon. Sa mon pa pour dakor Mr Speaker.

E alor i pour enportan ki letan menm si nou pe dir nou pour pran sa deba an Zilyet, ki i mon krwar i normal, Me ki nou bezwen osi sipor L'Egzekitiv ouswa bann lezot lazans, pour fer sir ki letan Lasanble i fini son deliberasyon, ki solisyon, prosisis pour ganny solisyon pour reparasyon, i pa osi tarde kot i posibil.

Mr Speaker lot keksoz osi ki mon anvi touse se ki, letan Mosyon pe dir ki nou bezwen trouv en mwayen pour konklir travay ki reste pour Komisyon fer. Petet dan sa deba osi nou pour bezwen vwar, eski i annan sa nesesite pour prolonz travay

Komisyon, koman sa Komisyon ki'n *start the process*?

E taler mon'n tann en Manm koz lo petet en Tribinal, me eski ozordi nou annan ase Lalwa, ouswa nou annan tou bann lazans ki'n ganny kree *onboard* pour vyolasyon dwa imen, pour nou kapab travay ansanm pour fer sir ki solisyon i ariv osi vit?

Mr Speaker mon lot pwen se ki, wi i enportan ki nou etabli en fason pour protez arxiv sa Komisyon. Mr Speaker i tre enportan sa, e an menm tan ki fason ki nou fer dan en fason ki lo kote listwar, nou bann zenn, nou bann zanfan, i osi ganny sa sans pour kapab konpran byen kwa ki'n arive.

Mr Speaker mwan anvi dir osi ki nou bezwen a tou pri, lo 4, lo senkyenm *bullet point*, "Promouvwar rekonsilyasyon e linite Nasyonal."

Mr Speaker i evidan ozordi, ki i annan divizyon dan bann distrik o nivo Nasyonal. E dan en serten sans Mr Speaker, ou pa anvi blanm popilasyon an zeneral, akoz se bann dirizan politik, parti politik, ki'n anmenn serten doktrinasyon, ki'n fer ki serten kous popilasyon, mon pa poudir, mon poudir petet atraver serten linyorans.

Me zot in pri Mr Speaker atraver sa bann doktrinasyon.

Mr Speaker, ou vwar sa ozordi o nivo distrik e ou demann ou lekor koman sa reprezantan ki fason ou pour kapab kontribye pour anmenn sa rekonsilyasyon, dan *housing estate*, dan kominote e osi o nivo nasyonal?

So mon santi poudir nou annan en gro travay pour fer e i pour enportan ki nou les sa lespri partizan de kote, me anmenn sa lespri bipartisan me i domaz ki dan sa Prozedlwa, Komisyon i dir ki sa rapor pour ganny soumet avek Lasanble Nasyonal e ozordi ou vwar poudir zis en kote ki la e lot kote ki ti pe dir, "Pa file kaptenn" be zot, zot in file la.

(laughter)

HON WAVEN WILLIAM

Mr Speaker lo en travay enportan, ozordi zot deside Mr Speaker pour zot pa abord sa size e zot konnen poudir zot Mosyon zot ti anmenn devan, i pa sitan kale, i napa en direksyon.

Parey ou'n dir Mr Speaker ki mon dakor avek ou, zot pe met retar travay Lasanble, me kontrerman avek Mosyon Onorab *Leader* *Zafer*

Gouvernman, i pour vremen donn en direksyon.

So Mr Speaker mon demann mwan se ki enn, an *juillet* nou ganny en gidans kler, en azanda kler ki fason nou pour atak sa travay, ki bann dimoun ki pe espere deor la pe kont bokou lo nou, ki zot vwar poudir nou pe atak sa travay avek pridans avek lasazes, pour nou ganny en solisyon.

Mr Speaker avek sa de pti mo, mon remerci Onorab Georges pour sa Mosyon e mon anvî dir li ki mon pour donn tou mon sipor. Mersi.

MR SPEAKER

(Off- Mic)

HON NORBERT LOIZEAU

Mersi Mr Speaker. Bonzour tou dimoun, tou dimoun a lekout espesyalman dimoun mon zabitan mon distrik Bel Air. Mon dir zabitan mon distrik Bel Air Mr Speaker aköz, distrik Bel Air in en distrik kot bokou fanmir, i annan fanmir ki'n sibir bokou. E distrik Bel Air osi in osi en landrwa kot bokou sa bann atosite in ganny arive sirtou dan rezyon Sans Soucis e en pe partou.

E la Mr Speaker i fer mwan mazin mon frer Sony. Mon dir mon frer Mr Speaker aköz mon'n grandi ek li, mon'n

reste kot lafanmir, e nou ti mars ansanm Mr Speaker.

E toulezour mon zwenn lafanmir. E la mon anvî dir avek son bann ser, Anne-Marie, Christine son frer Gill ek James ki mon leker i avek zot e mon pour donn zot tou sipor dan zot demars, pour zot vwar laklerte lo lanmor zot frer.

Mr Speaker ler mon pe koz lo sa, mon anvî dir zot mersi osi. Si ozordi mon'n arive dan politik, se aköz zot. E pandan bann letan, mon'n vwar sa bann keksoz, mon'n vwar zot manman kot pe plere, mon'n vwar zot frer, zot ser, zot tou ler nou monte sorti lekol, nou koze nou pe rakonte. Annefe mon'n vwar zot soufrans Mr Speaker.

E sa ki pli enteresan ankor, se ki apre sa bann lensidan parey, zot frer enn ki'n lekol en pe pli byen James, li i ti pe ganny en pe targete, mon krwar zot pour mazin li sa enn ki ti dan *Truth* pe koze.

E ki ti bezwen parfwa sove e ti al reste *Canada*, aköz son lavi ti malere. I pa ti kapab marse e erezman Mr Speaker mwan mon ti la pour mwan kapab siport li ler i pe al en landrwa aswar. Rezon pour sa, se ki aköz mwan mon fanmir ti *SPUP* e tan ki mon ek li, zot pa ti kapab fer li nanryen.

Me selman Mr Speaker par kont sa pa ti anpes zot mars deryer nou. Zot ti mars dernyen nou partou, me selman zot pa ti kapab fer nou nanryen. E erezman i ti kite i ti al *Italy*. I ti al *Italy* in fer en pe letan, e mwan mon ti trouv mwan mon tousel, e erezman pour mwan Mr Speaker mon pa'n vin en target, petet se ki akoz mon manman pa ti ankor mor, e ti en siporter *SPUP*. Alors mon ti ganny enn pti pe proteksyon.

Mr Speaker sa Mosyon devan nou mon'n komans koumsa Mr Speaker, akoz mon konn lafanmir, e i enportan ki zabitan Bel Air i konn enn pti pe zistwar nou distrik mannyer nou'n pase Mr Speaker. Akoz bokou kan Larme ti dan nou distrik e parfwa menm pour marse ou ti per aswar, ler ou tann son en *jeep* Larme, ou ti bezwen pran rigol, kasyet.

Lontan ler gard bate i monte pour al veye Legzil, si nou pe asize lo kab telefonn nou pe zwe gitar, nou zwe enn pti lanmizik, nou ti ganny bate Mr Speaker, kot nou ti bezwen al kasyet nou sak fwa nou tann son sa bann *jeep* pe monte.

Be Mr Speaker, sa Mosyon i en Mosyon ki serye, e mwan ler mon ti'n tande sa Mosyon pe vini, Mr Speaker toultan mon ti anvi gidans en dimoun en pe pli

saz, e mwan dan mon lespri toultan mon ti'n pans *Bishop French*, akoz *Bishop French*? Defen. Akoz i ti en dimoun, in deza reste dan distrik Bel Air koman *Bishop* e i en dimoun ki mon ti byen avek.

E ler mon ti tann son temwannayaz dan *Truth*, dan *TRNUC* lo televizyon Mr Speaker mon ti vwar be ki sa, sa zonm ki mwan mon merit al kot li pour donn mwan gidans spirityelman, pour mwan kapab partisip dan okenn deba ki vin dan Lasanble ki konsern *TRNUC*.

Mr Speaker mon ti pe ariv kot - mon ti anvi al kot li akoz *beautiful soul* Mr Speaker e ler mon'n ekout son zistwar lo lafason i ti ganny trete, lo lafason zot ti senm bennzin toultour son lakaz pour detri en *beautiful soul* - parey mon dir - parey *Bishop*, sa ti donn mwan kouraz pour mwan al kot li.

Me erezman Mr Speaker, ler mwan mon ti pe mazin pour mwan fer sa depar pour al kot li pour mwan ganny sa direksyon, *Bishop* ti kit nou.

Me alors, malerezman in kit nou Mr Speaker, me selman mon'n ekout son temwannayaz dan legliz atraver Onorab Georges, atraver *Father Wavel*. Mr Speaker mon'n vwar sa grander lespri ki zonm ti annan,

sa leker pardonnen ki *Bishop* ti annan.

E mazine ou, en zonn ki'n perdi son frer, e ki zot in *attempt* pour ekstermin li, in toultan annan sa lespri pardonnen dan son lespri. E sa en keksoz ki Mr Speaker, mwan mon anvi ki nou, nou fer ozordi dan sa Lasanble. Nou pardonnen e nou bouze.

E ozordi Mr Speaker mon kontan Mosyon ki Onorab Georges in vin avek. Mosyon Onorab Georges ler mon get li a mon avi Mr Speaker, i en Mosyon ki anvi vin geri en boubou ki'n ovif, pandan plizyer lannen.

E sa Mosyon osi Mr Speaker i enportan pour nou kapab *put the matter to rest* enn fwa pour tou. Atraver trouv en solisyon. Se sa ler mon get Mosyon, se sa ki mon vwar.

Mr Speaker se trouv en solisyon e met sa *matter to rest* akoz ozordi bann fanmir ki'n pas dan bann sityasyon terib, parey mon bann frer ser lafanmir Elizabeth - zot pa anvi vin ekout ankor en *TRNUC* lo televizyon ki'n pran 3an kot zot leker in desire, zot in soufer.

Mr Speaker mwan mon pa'n get enn mwan. Konnen akoz mon pa'n gete? I fermal, ti fermal pour gete, be zot, zot pa anvi vin get sa ankor zot. Zot,

zot pli anvi rod *closure*, rod *closure* pour zot sityasyon ki zot ladan.

Menm si i annan Mr Speaker ti dir ki *TRNUC* i en telenovela! Mr Speaker ki mannyer ou kapab dir en keksoz koumsa? Kot bann dimoun pe eksprim zot konsern, pe met zot douler devan e serten dimoun lo kote - dan Parti *US* i dir telenovela Mr Speaker!

Sa pour mwan mon kondann sa e mon pa krwar, ki bann keksoz parey bann komanter parey, i merit ganny fer ler serten fanmir pe soufer.

E Onorab Pillay in dir ki li i pa anvi; li i pa anvi ki, ki bann fanmir - i pa anvi fer bann fanmir soufer atraver koz lo sa bann - koz lo sa dokiman la ki *TRNUC* in anvoy kot nou.

Me selman Mr Speaker premye Mosyon ki Onorab Pillay ti vin avek, ti pe fer egzaktaman sanmenm, ki li in dir i pa anvi fer. Zis mazine, Onorab Woodcock in fer sa, in koz lo la byen *Committee Stage* pour anmenn sa dokiman dan *Committee Stage* pour nou *go through step-by-step* Mr Speaker. Kan nou ti pour fini?

E pa bliye *Committee Stage* tou Manm i kapab koz kantite fwa ki i le; kantite fwa ki nou kapab koze nou ti pour koz

lo la, e sa ti pour vin en *burden* lo bann dimoun ki pe ekoute - i zis konmsi nou ti pe al reouver en boubou, nou ti al met disel ladan e fer dimoun pli soufer.

E pa bliy Onorab Pillay i kontan koze Mr Speaker, i pour koz a tou moman; a tou moman i pour koze pour li ganny *mileage* politik. Me Onorab Georges ki'n fer Mr Speaker, Onorab Georges dan son Mosyon, in vin ek en Mosyon ki pe tous bann pwen spesifik. E ler Onorab Georges i dir trouv mwayen pour konklir travay ki *TRNUC* i reste pour fer, eski i mal?

Mr Speaker sa Komisyon in partisip dan en loperasyon, dan en travay, ki i annan en ta letan! Plis ki 40an, e li in sey fer sa travay dan 3an. E mwan pour mwan 3an i pa ase. Se pour sa rezon ki petet zot le, zot le ankor enn pti pe plis pour zot kapab konklir.

Akoz en louvraz - en dosye 43an ou pa kapab fini li dan 3an, zot in seye me selman omwen zot in kapab fer li, fer o mwen serten keksoz. Mr Speaker be ler nou pe koz etabli en fason pour protez arshiv sa Komisyon, se sa en pwen enportan ki Onorab Georges pe fer sorti.

Nou bezwen fer sir ki nou bann dokiman i ganny proteze,

pour ki zenerasyon e de zenerasyon ki vini i kapab pas ladan pour zot konn zistwar nou pei. Partou i annan sa Mr Speaker.

Konpansasyon Mr Speaker. Konpansasyon i en size ki nou bezwen koz lo la. E dan dezyenm Mosyon Onorab Pillay, i apepre egzaktaman sa ki i pe demande. I ti a kapab koz lo sa Mosyon Onorab Georges akoz dan Mosyon Onorab Georges, i annan propoz en mekanizm pour konsider konpansasyon e reparasyon pour sa ki'n soufer. I egzaktaman parey dezyenm Mosyon ki Onorab Pillay ti anvi vin avek.

E Onorab Pillay in dir, si zot - bokou nou in koz lo la, si zot, si li ki pour reponn dan plas sa bann *perpetrators*? Ki pour peye? Mr Speaker parey Onorab Henrie in dir, lekel ki pour peye par nou ki pour peye. Se zot Gouvernman ki ti la.

E mwan Mr Speaker mon ti a kontan ki *US* ti ava la, pour nou kapab fer sa travay ansanm, pour nou kapab fer sa travay ansanm. Akoz lo kote - lo kote konpansasyon mwan dan mon distrik napa en dimoun Bel Air ki pe dir pran son *larzan taxpayers* ki li in kontribye pour vin donner. Non! Dimoun Bel

Air i dir mwan non! Zot ki merit fer sa, pa son larzan.

E menm kouzin Brian Victor, enn mon zanmi li osi ki'n pas dan sa sityasyon, son kouzin i dir mwan menm Brian i son kouzin, Brian ti koman son ser, son kouzen, pa pran son larzan, ki li i pe kontribye. Rod fason atraver *US*, parey i annan in dir later pe ganny vann.

Onorab, Onorab Henrie in fer sa byen, bann propriyete pe ganny vann. Ozordi i annan Maison Du Peuple ki zot pe okipe, *rent* ganny larzan, soulaz sa bann dimoun. E la ozordi Mr Speaker ler mon pe koz lo Brian Victor, Brian ti ganny promet en lakaz zot pour konstrir son lakaz lo son later Sweet Escott.

Prezidan Faure ti promet li, pour konstrir en lakaz pour li e ler 2020 ti perdi eleksyon, zot ti ale, zot ti kit Brian tel parey i ete, an krwayan ki Gouvernman *US*, li i pour vini, i pour vin fer sa pour Brian.

Be zot ki'n ofer Brian pour fer son lakaz, e Brian i dir mwan i pe desann Desanm. I ti kot mwan lot zour dan biro, i dir mwan i pe desann, i pe vin gete ki zistans zot ete Parti *US* pour konstrir son lakaz ki zot in promet li Sweet Escott!

MR SPEAKER

15 minit Onorab.

HON NORBERT LOIZEAU

Deza? Mr Speaker i annan bokou pour koz lo la, me mwan an terminan mon anvi dir zot sa gro dokiman *TRNUC* la Mr Speaker, mwan mon pa anvi al pas ladan mwan. Mon pa ni anvi al gete Mr Speaker, akoz i tousan, sa ki'n pase lo televizyon, lo radyo pandan bann letan ki *TRNUC* ti pe *broadcast*, in tro bokou pour Lepep Seselwa!

Mwan sa ki mon enterese Mr Speaker, mon anvi vwar en solisyon ansanm. Se solisyon nou bezwen rode. Ozordi i tris pour vwar mon bann frer *US*, kit lasal ale, olye vini pour travay ansanm, vini. Si fodre demann pardon ansanm.

Mwan osi mon fanmir ti *SPUP*, e la mon demann pardon lo non mon fanmir ki pa ti okouran, ki ti inyoran, ki ti pe ganny anbete, pour siport en sistenm ki'n fer sa Mr Speaker.

Mon annan tonton ki'n Minis, lo non mon fanmir, mon demann pardon nou'n dan *SPUP*, zot osi zot ti merit kapab fer sa, la ek nou, pour nou kapab ansanm, rod en solisyon pour sa problem ki pa nou ki'n kree, me plito parti ki zot, zot in siporte ki'n kree.

Mwan mon anvi Mr Speaker trouv rekonsilyasyon sa pep ki apel Seselwa. Kot linite Mr Speaker, kot linite ek lape i a rennyen dan nou pei. Kot i annan en pardon Mr Speaker parey David Philoe i sante i dir, “Nou tou nou benefisyé”.

E la an terminan mon anvi dir en keksoz, *quote* en keksoz ki Prezidan Nelson Mandela ti dir, “Parfwa pa zis larzan ki pour rekonfort ou, ki pour fer ou kapab *go on, move on* ek lavi Mr Speaker.”

Me Prezidan Nelson Mandela li i tir an Angle mon pour termin ek sa Mr Speaker mon pour *quote* “*In the end, reconciliation is a spiritual process which requires more than just a legal framework. It has to happened in the heart and mind of the people*”. Mr Speaker mon a remersi ou pour sa pti letan.

(APPLAUSE)

MR SPEAKER

Mersi Onorab. Mon a donn laparol Onorab Georges pour fer repons e konklizyon.

HON BERNARD GEORGES

Mersi Mr Speaker. Mr Speaker ler i tar, mon le premyerman remersye parey nou labitid dan

sa Lasanble, ler nou pe *wrap up* lo en Mosyon, remersye tou bann Manm ki'n pran laparol apre midi, pour siport sa Mosyon.

I annan en kantite bon lide ki'n sorti, plizyer rekomandasyon ki Manm in fer, ki pour donn nou, bokou materyo pour nou debat lo la ler nou arive debat lo sa Mosyon dan son antite.

Alor Mr Speaker, mon krwar ki nou annan en bon baz apremidi. Bann Manm in *focus* lo egzakteman sa ki nou devret fer koman en Lasanble, pour reponn a legzizans sa prosis *TRNUC*, e pour reponn a sa ki nou pep e nou pei i bezwen apre sa prosis.

I regretan mon bezwen dir ki nou'n bezwen fer sa deba apremidi, dan labsans Lopoziyon dan Lasanble Nasyonal, i regretan. I pa sirprann okenn nou, akoz nou ti'n fini vwar lapant ki zot ti pe pran depi bomaten.

Me i kantmenm regretan akoz pa pour nou! Nou, nou *ok* nou, nou, nou kapab travay nou tousel, nou pa bezwen annefe okenn dimoun pour vin asiste nou. I regretan pour Lepep Seselwa e Nasyon Seselwa, ki sa Lopoziyon ki isi dan sa Lasanble Nasyonal, in deside ozordi ankor enn fwa *let*

zot *down* dan en moman enportan.

(APPLAUSE)

HON BERNARD GEORGES

Me Mr Speaker mwan, mon bezwen dir avek mon bann Manm, komans abitye napa Lopoziyon dan Lasanble Nasyonal, Akoz mannyer mon pe get zot fason fer depi bomaten, i annan plizyer fwa ki nou pa pour vwar zot dan sa Lasanble Nasyonal e prepar nou an 2025 ler nou, nou retournen pour annan zis nou dan sa Lasanble Nasyonal!

(APPLAUSE)

HON BERNARD GEORGES

Let's get used to this akoz mon'n fini vwar se sa ki pe arive. Mr Speaker i doubleman tris ki olye Lopoziyon ozordi sezi sa loportinite ki zot annan, e ki zot prop Prezidan Mr Danny Faure in sizer avek zot semenn pase, lo televizyon Nasyonal, olye sezi sa loportinite ozordi pour zot premye pour vin dir nou *apologize* pour sa ki'n arive.

Nou menm nou, nou a fer premye pa, anver rekonsilyasyon e anver pey konpansasyon akoz se nou lafot, zot prefere - parey en

bann kapon - olye fer sa, taye kit Lasanble deryer!

(APPLAUSE)

HON BERNARD GEORGES

Me Mr Speaker - me Mr Speaker nou, nou, nou en Lasanble responsab e nou nou'n deside ozordi atraver Onorab Gervais Henrie - Deputy Speaker sa Lasanble poudir i *apologize* avek Lepep Seselwa pour sa ki'n arive. E atraver Onorab Loizeau pour demann pardon pour sa ki'n arive.

Sa se, sa se bann dimoun responsab. Sa se en leker kot Sesel i pour tou son zanfan Mr Speaker, sa se en leker rekonsilyasyon Nasyonal, sa i sorti kot nou, nou, nou konfront problem, nou sezi loportinite, nou dir bann parol ki merite ganny dir. Nou pa taye parey en bann kapon e kit travay deryer.

E la Mr Speaker sa ki pli gou - sa ki pli gou se ki zot in taye apre midi me solman ler zot vwar, ler zot vwar ki lapant in vir kont zot, ki zot fer? Zot poste en bann portre, zot poste en bann portre zot pe travay, zot pe travay dan zot *Caucus room*, zot pe travay dan zot *Caucus room*.

Sa ki pli gou, sa ki pli gou Mr Speaker se tou sa bann

portre i montre Onorab *Leader* Lopoziyon Onorab Pillay, parey en *Sir* ki pe pase, pe koriz travay son bann, son bann zelev.

(laughter)

HON BERNARD GEORGES

Li zis i pe fer letour, i pa pe travay li! Zis i pe fer letour i pe koriz travay son bann zelev.

Alor, alor Mr Speaker mon anvi dir kler la ozordi, mon anvi dir kler la ozordi, Mardi ek Merkredi i ganny rezerve pour Manm Onorab travay dan Lasanble, pa dan zot *Caucus room!*

(APPLAUSE)

HON BERNARD GEORGES

Si zot, si zot anvi travay koman en *Caucus* dan zot *Caucus room*, zot ava fer li dan bann lezot zour lasemenn. Mardi ek Merkredi i ganny rezerve pour travay isi dan sa Lasanble e etandonnen ki zot in prefere al travay dan zot biro olye isi, mon demann ou Mr Speaker koup lanmwatye zot lapey ozordi!

(APPLAUSE)

HON BERNARD GEORGES

Akoz-akoz i pa akseptab ki bann Manm Onorab i pour deside ki travay zot, zot pour fer olye desarz zot responsabilite anver sa pep ki'n vote pour anvoy zot isi dan sa Lasanble Nasyonal.

E la Mr Speaker mon anvi profit sa lokazyon, mon pa kontan e mon pa anvi koz lo en dimoun ki napa kouraz pour asiz dan sa Lasanble ekout mwan, me mon bezwen reponn de keksoz ki Onorab *Leader* Lopoziyon in dir ler li i ti pran laparol avan taye.

Premye keksoz ki i ti dir, i ti dir ki i ti konnen ki nou pe al zet son Mosyon, e donk se pour sa rezon ki'n deside revwar son Mosyon e sey anmenn en lot.

Mon anvi dir Mr Speaker, tre klerman avek Lepep Seselwa, parey ou, ou konnen e parey ou ou'n dir ou'n fer sa deklarasyon dan sa Lasanble Nasyonal, ki dernyen lentansyon ki nou, nou ti annan se zet Mosyon Onorab.

Se pour sa rezon ki mwan mon'n pran lo mwan menm, ler mon'n vwar de Mosyon lo *Order Paper* pour apel Onorab *Leader* Lopoziyon parey en *Leader* i devret fer, pour apel li e pour dir li annou pa fer sa, annou annan en Mosyon bipartisan kot nou tou lede nou kapab koz lo la.

E Mr Speaker ou, ou konn sa tre byen e annefe ou'n *adjourn* Lasanble Nasyonal pour permet sa arive. Olye sa arive ou konnen ki'n arive Mr Speaker, olye kontinyen ek son Mosyon si menm i pa ti anv en Mosyon bipartisan, i ale i sanze i sey anmenn en lot kalite Mosyon ki pli partizan ankor ki sa enn avan.

Sa Mr Speaker nou bezwen dir e nou bezwen kondannen, e mwan Mr Speaker mon pa pour aksepte ki bann Manm ki fer sa kalite demagozi i vini apre, e i sey kontournen e sey eksplik keksoz dan en diferan fason.

Dezyenm keksoz, Onorab *Leader* Lopozisyon i vini e i dir ki enn bann rezon, ki i pa kapab reste dan sa Lasanble e kontinyen avek sa deba se ki rapor pa ankor – napa en rapor konplet. Rapor i annan bann bout ki manke. Alor li i pa i pa kapab fer sa si rapor ti'n konplet, si rapor pa ti konplet i pa ti'n devret ariv devan sa Lasanble Nasyonal, e i pa konpran akoz ki i annan, ki nou dir ki i annan ankor travay ki pour ganny fer.

Well, Mr Speaker la mon bezwen dir avek Onorab e mon ekspekte ki i pe ekout mwan kot i ete apre midi - son Mosyon ki i pe rode, ki pe rod anmennen e

parey, i ti dir apre midi, i pe rod enn ki pour enplimant bann rekomandasyon- bann rekomandasyon sa Komisyon, sa Komisyon *TRNUC*.

Me mon anv dir li Mr Speaker! Si in ti'n lir, si i ti'n lir sa rapor ki devan li, pa sa bout ki i dir i pa la, me sa enn ki in annan depi detrwa semenn ki Clerk in sirkil avek nou, si i ti'n lir i ti ava vwar i annan en parti sa rapor ki annan bann rekomandasyon sa Komisyon, ki zot in fer.

I annan 48 rekomandasyon an tou e si i ti'n al lo dezyenm paz e i ti'n lir trwazyenm rekomandasyon i ti ava lir sa bann mo swivan: -

“The Commission recommends the establishment of a successor body to carry out further exhumations and investigation into cases, where the Commission was not able to conclude all the work needed”.

Zot menm zot, zot in dir dan en rekomandasyon ki li i pe rod ganny adopte, ki zot pa'n fini zot travay, zot travay akoz zot Komisyon in ariv a son lafen. E alor Mr Speaker, i pa akseptab! Ki en dimoun i vin devan sa, i vin devan sa Lasanble, i pa lir en rapor, i pa lir sa bout ki in gannyen, apre i taye i pe rod en rapor konplet. Be si ou anv en rapor konplet

lir *at least* sa bout ki ou'n fini gannyen. Ni sa ou pa kapab fer!

(APPLAUSE)

HON BERNARD GEORGES

E Mr Speaker pour bann dimoun laba deor konpran, Komisyon in fini fer tou son travay. In fini ekout tou bann keksoz ki i bezwen ekoute. Me i annan en bout ki i pa ankor kapab tradwir, akoz in ganny arive an Kreol e i pa'n kapab komans fer transkripsyon.

Se pour sa rezon ki sa 136 pa devan nou ozordi, zot in fini ganny travay, zot la dan en lespas *video* ek *audio*, me zot pa ankor ganny transkri lo papye, pour ki en zizman an ekri, en rapor dan sa 126 i kapab ariv devan nou.

Alor Mr Speaker annou konpran sa tre byen, e annou rezet sa bann lakizasyon ki en bann ler zot vwar, ki Mosyon ki zot anmennen pa reponn a legzisans sa pep, e sey rod en fason pour sorti, zot in rakont tou sord lalang devan sa Lasanble Nasyonal.

E alor Mr Speaker mon vin finalman lo Mosyon ki devan nou li menm. Ki sa ki pour arive prezan? En fwa ki nou'n adopte sa Mosyon apre midi, ki lot letap? Ki mannyer nou pour tradwir sa ki nou'n fer ozordi, e

sa Mosyon ki nou'n pase dan en desizyon sa Lasanble Nasyonal?

Alor nou bezwen premyerman decide kan nou pour fer sa deba, *in extenso* lo sa rapor? Kan eski nou pour, nou pour fikse sa bann dat e lekel pour fikse sa bann dat? Mwan mon pe propoze se *Assembly Business Committee*, parey mon'n dir ki en Komite bipartisan Lasanble, ki ava asize e ki a determinen, konbyen zour nou bezwen pour fer sa deba?

Nou bezwen determinen ki longer bann diskour sak Manm, pour kapab pran? Ki longer i pour ete? Ki kantite fwa, sak Manm pour kapab koze, en fwa oubyen plis? Lekel ki pour *focus* sa travay?

Mwan mon'n propoz 5 pwen me i posib ki annan lezot pwen e sa *focus* ki mannyer i pour ganny ankadre? Eski pour ganny ankadre atraver en Mosyon? E la ankor enn fwa i annan posibilite, ki sa Mosyon i en Mosyon bipartisan otour lekel nou pour debat. Oubyen, eski parey nou'n fer pour *Air Seychelles*, nou pour fer en deba zeneral e apre pour annan rapor, ki Lasanble pour prepare pour anvoy kot Gouvernman, si posib en sel rapor, si pa posib en rapor avek en rapor minoriter?

Alor Mr Speaker tousala se bann keksoz ki nou pour bezwen prevwar koman en Lasanble, dan en fason pour donn tou posibilite, pour tou Manm, atraver bann rankont ki nou pour fer dan nou distrik, bann sizesyon ki nou bann elekteur pour donn nou; bann travay ki nou pour menm, nou menm nou, nou pou fer nou lir sa rapor, ki mannyer nou pour depouy sa rapor dan en letan apropiye san ki'n al *in excess*.

Me kot nou ava kapab fer lazistis, non-selman pour travay Komisyon, me pour bann viktim ek bann *perpetrators* e Lepep Seselwa ki pe esper sa konklizyon sa rapor.

Alor Mr Speaker sa se bann keksoz ki nou pour bezwen e nou pour bezwen fer. E la ozordi, an konklizyon mon bezwen retourn lo sa 5 pwen ki mon'n fer. E mon bezwen retourn enn pti pe lo la pour mwan ankadre an *quelque sorte*, sa proses ki nou pour bezwen pas ladan, sa travay ki nou pe demann ABC fer.

Premyerman nou bezwen trouv en mwayen pour konklir travay sa Komisyon. In arete i annan 126 ka ki pa ankor ganny transkrir, nou pour bezwen rod en fason pour sa ganny fer.

Apré i annan de lezot pwen ki mon krwar se sa de pwen, ki'n farous Manm Lopoziyon. Akoz sa zot pa'n tous lo la ditou, e mon konpran akoz zot pa'n tous lo la ditou. Enn se ki mannyer nou pour protez arshiv sa Komisyon.

Akoz nou bezwen gard sa arshiv dan en fason kot i pour *accessible*, i pour la. Enn pti parey Onorab Esparon in dir *Rwanda*, i annan son landrwa - ki mannyer nou pour komemor bann viktim Dezyenm Repiblik.

Bokou nide in ganny donner ozordi e lezot nide pour ganny donner ler nou vin debat lo sa keksoz.

Me sa 2 nou pa bezwen, nou pa kapab bliye, nou pa devret les Lopoziyon, anpes nou travay lo sa de lide. Nou pour bezwen e sa i tre enportan, propoz en mekanizm pour konpansasyon.

Se par nou ki pour deside ki mannyer dimoun pour ganny rekonpanse, me nou pour bezwen propoz en mekanizm avek Gouvernman, enn ki pour pran an konsiderasyon lefet ki i annan en limit lo sa ki Gouvernman i kapab fer. E i annan serten dimoun ki responsab pour sa bann atosite e ki ou pour bezwen pey lakonsekans zot responsabilite.

Alor e finalman Mr Speaker ankor enn fwa nou pa devret bliye - mon'n dir taler ki Sesel pour tou nou zanfan i en premye pa ver rekonsilyasyon Nasyonal, e vreman i en gro pa ver rekonsilyasyon nasyonal.

E LDS ler nou to swazir sa koman nou moto pou al dan eleksyon, nou ti konn tre byen ki si sa ki nou ti pe fer. Nou ti konnen ki se nou koman en parti politik ki'n komans sa proses TRNUC, ki pour bezwen fini li, pour anmenn lazistis anver tou Lepep Seselwa.

Alor se nou ki pour bezwen fer sa. E mon parol final, mon pran atraver de parol ki'n sorti apre midi par de Manm Lasanble. Onorab Philip Arissol in dir ki fodre nou travay avek sansibilite e avek respe. E mon krwar sa de mo tre, tre enportan. Nou bezwen sa travay ki nou pour fer an Zilyet, i pour bezwen ganny fer avek bokou sansibilite ek bokou respe. Akoz i pa zis fini en travay, me nou bezwen fer li dan lespri rekonsilyasyon ek linite nasyonal.

E Onorab Bastienne, in demann nou pour fer en deba senser. E mon krwar nou pour bezwen fer en deba senser. E nou pour bezwen annan sansibilite e respe e senserite

menm anver nou bann koleg dan Lopoziyon, ki pa'n montre nou sa respe apre midi ler nou'n fer sa deba. Me nou akoz nou leker i gran, e nou, nou konnen ki Sesel i pour tou son zanfan, nou, nou pour fer en deba an tout senserite e avek tou respe menm anver zot.

Alor Mr Speaker avek sa detrwa parol, mon ti a kontan ankor enn fwa remersi tou dimoun pour zot latansyon e pour sipor ki zot pour donn sa Mosyon. Mersi Mr Speaker.

MR SPEAKER

Mersi Onorab. Mon ava apel Manm pour vot lo Mosyon. Manm ki an faver lev lanmen silvouple? Byen tou Manm in vote. Mersi. Lo Mosyon anmennen par Onorab Georges, 23 Manm in vot pour 0 kont, 0 abstansyon. Mosyon in aprouve par tou Manm ki dan Lasanble. Mersi bokou.

Parey Onorab Georges in dir, nou a bezwen remet sa bann desizyon avek ABC *Assembly Business Committee*, pour deside ki mannyer nou pe pran li.

(Us Members returned to the House)

MR SPEAKER

Bon avan Manm i disperse, zot a donn mwan detrwa moman pour mwan konklir lo pwen ki nou ti komans avek bomaten. E mon le fer detrwa remark, avan mon donn mon desizyon e mon pe fer remark lo bann komanter ki annan pour fer avek Speaker. Mon pa pe repas lo deba ki'n ganny fer, me selman mon le koriz detrwa keksoz ki'n ganny dir dan Lasanble.

Premyerman mon deplor lefe ki laplipar komanter Lopoziyon i pa'n lo kondwit Onorab Loze parey Mosyon ti demande, me in lo kondwit Speaker. Mon pa konnen konbyen fwa mon tann met kondwit e desizyon Speaker anba kestyon, konmsi sa Mosyon ti lo Speaker.

E mon rezet sa bann lakizasyon ki'n ganny fer. Plizyer Manm in dir ki mon'n met zot deor akoz zot in demann en kestyon, oubyen lot kestyon. Zanmen mon'n met en Manm deor akoz in demann kestyon, mon'n demann - mon'n met Manm deor akoz zot konportman.

Petet ler mon ti'n blok enn zot kestyon, mon pa ti'n aksepte enn zot kestyon, petet. Me selman se lafason ki zot kriye oubyen ki zot mank respe Speaker, ki'n fer mwan met zot deor. Alor annou ganny sa kler.

Bokou Manm in dir poudir mon desizyon pour aksepte sa Mosyon, pa ti zistifye, akoz sa ti en keksoz ki ti kapab ganny rezoli dan en lot fason pli senp. Mon le fer resorti ki mon'n adres sa size dan Lasanble direkteman avek Onorab Loze avan, e lo plis ki en repriz.

E alor mon ti santi poudir avek sa sityasyon ki ganny met devan ozordi, mon ti napa nanryen plis poudir ki mon'n deza dir Onorab Loze. Alor solisyon sete pran sa prosedir annan en Mosyon lo en *matter of privilege*.

Bon apre in annan plizyer komanter ki mon pa'n swiv prosedir Lasanble. Mon le asir tou Manm e manm piblik ki mon'n etidye *Standing Orders* byen e ki mon'n fer tou mon fason pour fer mon desizyon swiv prosedir ki permet dan *Standing Orders*. E kot *Standing Orders* pa adrese lotorite Speaker i permet mwan pour mwan fer desizyon lo ki mannyer Biznes Lasanble i marse.

Alor an konklizyon, mon konsidere ki konportman Onorab Loze in donn en move limaz Lasanble, par sa mank respe pour Vis-Prezidan Larepublik, ki en zofisye enportan dan nou sosyete ki mon krwar Lasanble i devret

respekte. E osi in annan en mank respe pour Speaker Lasanble.

Mon aksepte ki Onorab Loze in prezant leskiz pour langaz ki'n servi dan son *post*. Me mon pour siport desizyon Lasanble pour en lot sanksyon, an sa ki konsern ki Onorab Loze i ganny sispann pour 2 *sitting* Lasanble, setadir le 20 e le 21 Zen 2023.

Mon pour kominik mon bann desizyon an ekrire pour Onorab Loze e pour rikord Lasanble. Mon a dir tou bann Manm ki sa i mon *ruling* lo sa size.

Finalman mon bezwen dir mon pa vreman kapab aksepte konportman Lopozisyon ki zot sorti pour en bout travay Lasanble, e zot retournen a lafen. Me zot desizyon lo ki mannyer zot fer zot travay, i zot desizyon, mwan mon bezwen zis pran mon responsabilite.

Lasanble i ava *adjourn*. Nou a rebran travay Mardi prosen le 20 Zen. *Adjourn*.

(ADJOURNMENT)